

## Yonee To tekepo Yoneeye hogugu

### *Yonee booka goo eyo bei*

Yonee booka hagee Yesu o hamamee dili odoo hee Yoneeye hogugu. Yayo to hogugu ee ma kulodu goo toowa hagosu. Yesu yo Keliso\* osoloso yo tei Godeeyo Owolo. Esiga iyo Yesu mapoo tei toga, iba gie badeli talaiso.

### *Toso odoo su paso*

<sup>1</sup> Daga mipoo hagee moodelega molome, To\* olo badebeiso. To oso Godee sabolo badebeiso. Osoloso To ee Godee. <sup>2</sup> Yo mipoo gie daga moodoo omapoo Godee sabolo badebeiso.

<sup>3</sup> Esiga bi hee yo mauwe moodele poogoo me. Esino bi susuga hedebe yimaga ka moodoo. <sup>4</sup> Esiga gie badeli eyo bei hedebe yoso. Gie badeli oso odoo susuga mapoo gadeebugu tenemeleeso. <sup>5</sup> Esiga gadeebugu oso neliga ma kulodu ka pounimoloso. Esiga gadeebugu egee neligasos semidilei tebile.

<sup>6</sup> Esiga biame omapoo Godeeye odoo hee diye diso, o hu ee Yonee. <sup>7</sup> Yayo odoo mapoo gadeebugu oso sibilei goo ee takalame simiso. Osoloso odoo susuga oso to yayo taka ee duloso tei ka

---

\* :: Keliso dee egee takoo hu eyo bei ee Godeeye hesia dolone ka takooso. **1:1:** Yon 17:5; 1Yon 1:1-2; Yili 19:13 \* **1:1:** To ee Yesu **1:3:** 1Kol 8:6; Kol 1:16-17; Hib 1:2 **1:4:** Yon 5:26 **1:5:** Yon 3:19 **1:6:** Mat 3:1; Luka 1:13-17, 76

talame. <sup>8</sup> Yonee yo gadeebugunee, esino yayo gadeebugu eyo goo ee odoo mapoo takalame ka simi. <sup>9</sup> Bei, tei gadeebugu oso odoo susuga mapoo pouni meli oso mipoo hamapoo sibilei ee olo koola tabaso.

<sup>10</sup> Esiga To ee mipoo hamapoo meleeso. Osoloso mipoo hagee yimaga moodoso. Esino mi odoo oso yo medee hoodo egele. <sup>11</sup> Yo o odoo mapoo simiso. Esino o odoo oso yo idile. <sup>12</sup> Esino edebeeyo yo idoloso yimapoo tei teme, yayo odoo egee bia dimapoo kitulugu teneeso, diayo Godeeyo owolo dio doloso dabalame. <sup>13</sup> Esino edebeeyo owee dio ama dio eyo sawoso, o, suso gilee, o, odoo heeso gilee goo maga diba Godeeyo owolo dio dee ka sele. Esino Godeeye goomoga goo omaga diba Godeeyo owolo dio diso.

<sup>14</sup> Osoloso Toso odoo su poloso ima kulodu badebeiso. Yayo iba diya sooloo dolone pidiliso. Osoloso yayo tei goodee ee takeliso. Osoloso yayo hu toowa toloso badeli goo ee iyo egeiso. Esiga Ma Godee maga simi, Owolo hedebe yayo hu toowa egeesi toloso ka badoso.

<sup>15</sup> Yoneeye o goo maga takolone toso neligidi egeese takaso, “Ayo takolone, odoo hee ama hamamee sibileiso dee takomo silimenee, odoo ee hagoso. Yayo kitulugu oso ayo kitulugu ee dagadi. Bei, a soomagelega badoboome, yo daga olo badebeiso.”

<sup>16</sup> Esiga sooloo dolone pidili goo toowa yimapoo egee molo maga biame susuga yayo iba ka pidimoloso. <sup>17</sup> Tei magoo goo ee Godeeye Moses maga

imapoo teneeso. Esino sooloo dolone pidili goo sabolo osoloso tei goodee ee Yesu Keliso maga simi. <sup>18</sup> Egeesi ma kulodu odo heeso Godee egele. Esino hedebe Godeeyo Owolo yayo imapoo Godeeyo goo ee yilige buguso. Bei, yayo Godee koola ogolone badolone yo tei Godee doloso ka badoso.

*Yoneeye takolone a Kelisonee dee taka  
(Mat 3:1-12; Maka 1:1-8; Luka 3:1-18)*

<sup>19</sup> Yelusalem mapoo debeli Yu odo dia wiligi odo oso Godee ogo odo ogo doloso debeli sabolo, osoloso odo abo Libaiyo bala\* maga Yonee mapoo diye diso, diayo Yonee yo tei odo ogumo doloso woosalame. Esem diayo Yonee mapoo dilesa egeese woosaso, “No tei odo ogumo?” diso. <sup>20</sup> Esem Yonee yo to nei takalai gowe. Esino yayo nei dimapoo egeese takaso, “A Kelisonee,” diso.

<sup>21</sup> Esem diayo see yimapoo egeese woosaso, “No odo ogumo? No Ilayayo?” diso.

Esem yayo nei egeese takaso, “Haye, a Ilayanee,” diso.

Esem see diayo yimapoo egeese woosaso, “No Godee maga to toloso kokodo takomo sili

---

**1:18:** Exo 33:20; Yon 6:46; 1Tim 6:16 \* **1:19:** Libaiyo bala eyo bei ee egeesi moloso. Eibalahameeyo amawe Yekobowo owolo hee eyo hu ee Libai. Osoloso Libaiyo bala ee ma kulodu debeli odo oso Yu odo dia tei moso ma kulodu tou opusomo opusomo di ee teliso. Esino Godee ogo odo ogo doloso debeli odo diba nose tei moso ma kulodu tou teliso. Diba Eloneeyo bala hedebe.

**1:21:** Deut 18:15, 18; Mat 11:14

odoo sibileigo neme bamelee,\* odoo ee nosomo?”  
dee takaso.

Eseme yayo nei dimapoo egeesee takaso,  
“Haye, asonee,” diso.

<sup>22</sup> Eseme see diayo yimapoo egeesee takaso,  
“No tei odoo ogumo? Iba goomogo, to nei nayo  
taka ee iyo todilesa ibada wiligi odoo iba diye di  
mapoo takalaiya. Esiga no tei odoo ogumo?” diso.

<sup>23</sup> Eseme nei Yoneeye Godee maga to toloso  
kokodo takomo sili odoo Aisayaye taka to ee  
dimapoo egeesee takaso,

“A miwe poogoo mi maga idageli odoo ee aso,

Niba Lodeeye sibilei eli medee hoodo  
magee.”

<sup>24</sup> Eseme Pelisi odoo dia wiligi odoo oso diye  
di odoo oso dilesa, nei Yonee mapoo egeesee  
takaso, <sup>25</sup> “Nayo takolone, no Kelisonee, osoloso  
no Ilayanee, osoloso no Godee maga to toloso  
kokodo takomo sili odoo osonee, dee takooso.  
Esino bei kasalame nayo odoo howo ka olugumo  
silala?” diso.

<sup>26</sup> Eseme nei Yoneeye dimapoo egeesee takaso,  
“Ayo wulo odoo howomoo oluguliso. Esino  
odoo hee nima kulodu badoso. Esino niba yo  
gooleedele. <sup>27</sup> Yo ama hamamee egee siboso.  
Esino a tekeponee, ayo o homo mapoo kali bi ee  
pidigilei.”

<sup>28</sup> Osoloso Yoden howo hodiokoo Yoneeye odoo  
howo olugumelee Betani mi mapoo goo ogoso  
peledabaso.

---

\* **1:21:** Yu odooso Godee maga to toloso kokodo takomo sili odoo  
Moses egeesi masi oso sibilei ee bameleeso. (Deut 18:18)    **1:23:**  
Isa 40:3    **1:27:** Yon 1:15

### *Yesu Godeeyo Lam be*

<sup>29</sup> Biame hee mapoo Yesu Yonee mapoo sibume ogoloso Yoneeye egeesee takaso, “Ege, hagee Godeeyo Lam beso.\* Yayo mipoo hamapoo debeli odoosoo dia goo tokenee susuga ee hapoloso boobado bigileiso. <sup>30</sup> Ayo takolone, odoosoo sibileisogo doloso takomo sileemeni, odoosoo ee hagoso. Bei, ayo egeesee takomo sileeso, odoosoo hee ama hamamee sibileiso. Esino yayo kitulugoo oso ayo kitulugoo ee dagadi, dee takeliso. Bei, a soomagelega molome, yo daga olo badebeiso, dee takeliso. <sup>31-33</sup> Esiga Isalael odoosoo Kelisowoo goo ee medee gooleedalame ayo diba howo olugulame ka simi.”

Esiga Yonee eyo egei goo ee egeesee takaso, “Ayo daga Keliso odoosoo ugu bele dolone medee kibiya gooleedele. Esino ayo odoosoo howomoo olugulame, Godeeye a diye dolone amapoo egeesee taka, ‘Nayo Keliso egeesee gooleedalaiso. Dio Tei sibileeso yibolo hodobo badoga agalaiso. Osoloso yayo odoosoo mapoo Dio Tei tenelaiso,’ diso. Godeeye egeesee taka duloso hamamee Dio Tei molo masi pusibileeso yimapoo pubalegeme egeiso. <sup>34</sup> Esiga ayo goo hagee tei ogoloso yo tei Godeeyo Owolo dolone to hagee ayo nimapoo ka taka.”

### *Yesuye o hamamee dili odoosoo daga hudi magoo*

---

**1:29:** Isa 53:6-7; 1Pita 1:18-19 \* **1:29:** Lam be dee egee takoo sipi be hu gie kauwa ee takoo. Bei, Isalael odoosoo oso tokenee goo hapalame sipi be gie kauwa wooloomaloso Godee mapoo teneliso.

**1:30:** Yon 1:15    **1:31-33:** Mat 3:16    **1:34:** Mat 3:17

<sup>35</sup> Biame hee mapoo Yonee o hamamee dili odoo bakadio dibolo hodobo mi hedebe omapoo tebisa meleeso. <sup>36</sup> Egeesee semelee omapoo Yesuye di ee ogoloso dimapoo egeesee takaso, “Niso ege, odoo egee Godeeyo Lam be ogoso,” diso.

<sup>37</sup> Esemе Yonee o hamamee dili odoo oso to egee duloso Yesuye di hamamee diso. <sup>38</sup> Esemе Yesuye bidi toboloso, odoo bakadio oso yima hamamee simi ee ogoloso, yayo dimapoo egeesee takaso, “Niba ogoo goo tala sibala?” diso.

Esemе diayo nei yimapoo egeesee takaso, “Labai, no kapoo badeliyo?” diso. Labai hu eyo bei ee eligili odoo dolone ka takooso.

<sup>39</sup> Esemе yayo nei egeesee takaso, “Niso sibilesо ege,” diso. Osoloso neli tigime, odoo bakadio hagoso Yesubolo dilesо yayo badeli mi ee egeiso. Esemе diba biame omapoo yibolo hodobo debeiso.

<sup>40</sup> Odoo bakadio hagee bia dia kulodu odoo hee o hu ee Endulu. Endulu yo Saimon-Pitayo omolo. <sup>41</sup> Esiga Enduluye Yesu ogoloso emei Saimon esiaso. Yo ogoloso yimapoo egeesee takaso, “Iba Mesaya egeiso,” diso. Mesaya hu eyo bei ee Keliso dolone ka takooso.\* <sup>42</sup> Osoloso Enduluye Saimon Yesu mapoo ido diso. Esemе Yesuye yo ogoloso yimapoo egeesee takaso, “Saimon,

---

**1:36:** Yon 1:29    **1:40:** Mat 4:18-20    \* **1:41:** Esiga Hibulu dia toso Mesaya dee egee takoo sabolo osoloso Guliki toso Keliso dee egee takoo goo eyo bei ee hedebe Godeeye hesia dolone ka takooso.    **1:42:** Mat 16:18

Yoneeyo owolo, nee hu see Kepas hedileiso.”  
Kepas dee egee takoo ee Pita dolone ka takooso.\*

*Yesuye Pilipi dio  
Nataniyol dio gilimadoo*

<sup>43</sup> Osoloso biame hee mapoo Yesu yo see Gelili mi mapoo dilame goomogaso. Esino biame omapoo yo odo hee Pilipi tugodoloso yimapoo egeesee takaso, “No ama hamamee sibe,” diso.

<sup>44</sup> Pilipi hagee Betesaida odo. Betesaida mi hagee Endulu dio Pita dio dia midee. <sup>45</sup> Osoloso Pilipiye dileso Nataniyol ogoloso yimapoo egeesee takaso, “Moses sabolo osoloso Godee maga to toloso kokodo takomo sili odo oso dia booka mapoo to hogugu oso takolone, odo hee hamamee sibileisogo, dee takemelee odo ee iyo olo egeiso. Yo Yesu, Nasalet mi mapoo badeli, yo Yosepeeyo owolo,” dee takaso.

<sup>46</sup> Esino Nataniyoleeye Pilipi mapoo egeesee takaso, “Goo tekepo oso Nasalet mi maga kasee sibileiyo?” diso.\* Esem Pilipiye nei yimapoo egeesee takaso, “No sibleeso ege,” diso.

<sup>47</sup> Esem Nataniyoleeye Yesu yima hegi simi ee ogoloso Yesuye o goo maga egeesee takaso, “Niso ege, odo hagee tei Isalael odo. Yo medee tei goo takeli odo,” diso.

---

\* **1:42:** Esiga Hibulu toso Kepas dee egee takoo sabolo osoloso Guliki toso Pita dee egee takoo hu eyo bei ee yo dolone ka takooso.

**1:45:** Deut 18:18; Isa 7:14; 9:6; Jer 23:5; Ezek 34:23 \* **1:46:** Yu odooso goolee, Nasalet mi ee haga goo toowanee, dee gweliso. Esiga odo hu toowa too oso mi omaga sibileime, dee gweliso.

<sup>48</sup> Eseme Nataniyoleeye nei yimapoo egeesee takaso, “Nayo a kasee gooleedoowo?” diso. Eseme Yesuye nei yimapoo egeesee takaso, “No daga Pilipiye dilesa egelega badoboome, no pigi homo bei mapoo badoboome, ayo no egeiso,” diso.

<sup>49</sup> Eseme Nataniyoleeye Yesu mapoo egeesee takaso, “Eligili odoo, no Godeeyo Owolo. Osoloso no Isalael odoo ibada wiligi odoo,” dee takaso.

<sup>50</sup> Eseme Yesuye nei Nataniyol mapoo egeesee takaso, “No homo bei mapoo badoboome, ayo egei goo maga nayo amapoo tei ka toowala? Esino goo hagee pepooko, no hamamee goo toowa agalaiso. <sup>51</sup> Esiga ayo nimapoo tei goo taka. Niyo Kei mi osulu yamagoloso mologa, Godeeyo momaiye oso Odoo Holo\* amaga dokodoo polo osoloso amapoo sibo domologa agalaiso,” dee takaso.

## 2

### *Yesuye howo ee wain i palame moodoo*

<sup>1</sup> Biame bakadio poogoloso hamamee Gelili mi toowa ee ma kulodu Kana mi pepooko mapoo odoo heeso sobo hu wo neso. Biame domo omapoo Yesuwo owee onosee omapoo badebeiso.

<sup>2</sup> Osoloso Yesu sabolo o hamamee dili odoo sabolo sobo hu wo ne ee agalame diba gilimadoloso debeiso. <sup>3</sup> Wo ne biame domo mapoo wain i

---

**1:49:** Mat 14:33; 16:16; Maka 3:11    **1:51:** Gen 28:12    \* **1:51:** Odoo Holo - Yesuye eyo nediliyo takolone, a Odoo Holo, dee taka hagee yo tei odoo dolone ka takomo silee.



hosudoo ee ogoloso Yesuwo oweeye Yesu mapoo egeesee takaso, “Wain i olo hosudoona,” diso.

<sup>4</sup> Esemé Yesuye nei owee mapoo egeesee takaso, “Mo wee, ayo ogoó goo talame no amapoo ka simiyo? Mo biame tugodele,” dee takaso.

<sup>5</sup> Esemé oweeye nei odoó moso kulodu tou teli mapoo egeesee takaso, “Niba Yesuye to nimapoo takooga duloso to egee te,” dee takaso.

<sup>6</sup> Egeesi ma kulodu sesepeni yugoso moodoo 6 omapoo bediga meleeso. Sesepeni 6 hedebe hedebe di egee howo 100 lita egeesi keeseli. Yu odooso dia adaga dia goo ee dodolone, sesepeni howo keesoo hamapoo dee sabolo, homo sabolo, osoloso bi abo hapeliso.

<sup>7</sup> Esemé Yesuye odoó moso kulodu tou teli dimapoo egeesee takaso, “Sesepeni susuga hagee howoso metamagise,” diso. Esemé diayo sesepeni susuga egee howoso metamagisaso.

<sup>8</sup> Esemé yayo tou teli odoó mapoo egeesee takaso, “Niba sesepeni omapoo howo keesaloso todileso, odoó sobo hu wo ne eyo wiligi odoó mapoo tenee,” diso. Esemé diayo egeesee moodooso. <sup>9</sup> Esino howo eyo see wain i paso. Esemé wiligi odoó oso wain i egee wulo nalo egeiso. Egeesi ma kulodu wain i hagoso simi eyo bei yo gooleedele. Esino o tou teli odoó diba olo gooleedoo. <sup>10</sup> Egeeseelone yayo sobo hulame simi giso ee idoloso yimapoo egeesee takaso, “Odoó susuga oso Yu odoó dia adaga dia goo ee dodolone, wo ne mapoo sibadee odoó mapoo daga wain i hadali keeneliso. Osoloso diba

wain i toowa naloso halabolone doga, see wain i haga koo hadali ee dimapoo keeneliso. Esino nayo wain i dooboo hadali ee magoo moloso, see epedee keedoloso ka teneeso,” diso.

<sup>11</sup> Esiga Gelili mi toowa ma kulodu Kana mi pepooko mapoo Yesuye daga malalo goo toowa opusomo di ee moodoo maga, yayo hu toowa toloso badeli goo ee eligiso. Esememe o hamamee dili odoosoo oso goo hagee ogoloso yimapoo tei tooso.

<sup>12</sup> Osoloso goo hagoso dileso koodobume, Yesuye owee sabolo, osoloso omolo dio sabolo, osoloso o hamamee dili odoosoo sabolo Kapeniyum mi mapoo diso. Osoloso diba omapoo dileso dobolone biame abo poogooso.

*Yesuye tei moso ma kuloduga  
odoo peegoo hasiso bugu*

*(Mat 21:12-13; Maka 11:15-17; Luka 19:45-46)*

<sup>13</sup> Osoloso Yu odoosoo dia Gababia wo nali biame ee olo koola tooboomme, Yesu Yelusalem mi mapoo palaso. <sup>14</sup> Osoloso yo omapoo peleso egeino, odoosoo susuga oso tei moso beele ma kulodu bulumakau be sabolo, osoloso sipi be sabolo, osoloso molo sabolo edebeeyo neiso talame, tosi-bileso odoosoo mapoo tenee domolome egeiso. Osoloso odoosoo aboso molee opusomo opusomo di ee tei moso eyo molee piligeli debi pooba mapoo dooboomme egeiso. <sup>15</sup> Osoloso Yesuye gowoolone tiso wei masi moodooloso wei oso sipi be sabolo, osoloso bulumakau be sabolo, osoloso odoosoo susuga peegoo hasiso buguso. Osoloso molee piligeli debi pooba bidige buguloso molee ko sabolo peegoo

kugobuguso. <sup>16</sup> Osoloso see molo neiso talame debei odoo mapoo egeesee takaso, “Bi susuga hagee toloso moso hamaga peegoo diyadee. Niyo mo Mamo moso ee bi teli moso dee na see,” dee takaso.

<sup>17</sup> Esiga goo hagoso peledaba ogoloso Yesu o hamamee dili odoo oso Godeeyo to booka mapoo hogugu oso taka goo ee egeesee gooleebuguso, “Ayo nee moso ee diya gooleeso.

Esiga edebeeyo a wooloomalaiso.”

<sup>18</sup> Esemme Yu odoo dia wiligi odoo tebisa oso bi susuga maloso gidebei odoo egee bia ee Yesuye tei moso ma kuloduga peegoo hasiso bugu goo ee ogoloso diayo yimapoo egeesee takaso, “No ogoso kitulugu toloso goo hageesee ka moodoowo? Esiga nayo kitulugu egee Godee maga too, dee takooga, nayo goo toowa opusomo di hee imapoo eligilei tekepo,” diso.

<sup>19</sup> Esemme Yesuye dimapoo nei egeesee takaso, “Niyo tei moso hagee guobigi. Egeeseega, ayo see tobu biame bakadio hedebe di ee ma kulodu tegelaiso,” dee takaso.

<sup>20</sup> Esemme diayo yimapoo egeesee takaso, “Iyo dugo 46 ee ma kulodu tei moso hagee tegeiso. Esiga biame bakadio hedebe di ee ma kulodu nayo saga kasee togo dalaiyo?” diso. <sup>21</sup> Esino Yu odoowo wiligi odoo hagee biaso Yesuye taka goo ee medee kibiya gooleedele. Bei, Yesuye tei moso eyo goo maga taka hagee, eyo nediliyo o su ee taka. <sup>22</sup> Esiga Yesuye toloso hogado polome, hamamee Yesu o hamamee dili odoo oso Yesuye

---

**2:17:** Psa 69:9    **2:19:** Mat 26:61; 27:40    **2:21:** 1Kol 6:19

**2:22:** Luka 24:6-8; Yon 12:16

taka goo hagee gooleebuguso. Egeeseelone di-ayo Godeeyo to booka maga taka sabolo osoloso Yesuye taka to omapoo tei tooso.

<sup>23</sup> Yesuye Gababia wo ne biame omapoo Yelusalem mapoo peleso goo toowa opusomo di moodoo ogoloso odoosusuga oso yimapoo tei tooso. <sup>24</sup> Esino Yesuye dimapoo haga tei dele. Bei, yo odoosusuga dia sooloo ma kulodu goo goolee ee yo olo gooleedoo. <sup>25</sup> Esiga yimapoo odoosusuga odoosusuga dibada goo goolee ee takalai ee bei me. Bei, goo goolee susuga dibada sooloo ma kulodu egee molo ee, yayo malalo olo gooleedooso.

### 3

#### *Nikodimaseeye Yesu mapoo simi*

<sup>1</sup> Esiga odoosusuga hee badebeiso, o hu Nikodimas. Yo Pelisi odoosusuga, osoloso Yu odoosusuga dia wiligi odoosusuga tebisa ee ma kulodu yinosee wiligi odoosusuga hee yoso.

<sup>2</sup> Osoloso yayo gesi sibilesosusuga Yesu mapoo egeeseetakaso, “Eligili odoosusuga, iba gooleedoo, no eligili odoosusuga Godeeye diye di ee noso. Bei, edebeeyo eyo goolee goo toowa opusomo di nayo egee moodoomo silo egeesi moodoolai tebile. Esino Godee nobolo hodobo badoga, nayo goo toowa opusomo di hageesi moodoolai tebileiso,” diso.

<sup>3</sup> Esemesusuga Yesuye nei yimapoo egeeseetakaso, “Ayo namapoo taka. Edebeeyo see soomagelega poogooga, yo Godeeye wiligi doloso badeli goo mapoo gadileime,” dee takaso.

<sup>4</sup> Esemé Nikodimaseeye nei yimapoo egeesee takaso, “Odoó kauwa ee oweeyo beliye maga see tobu kasee soomagalaiyo? Yo see holope poloso oweeye see tobu soomagalai tebile,” diso.

<sup>5</sup> Esino Yesuye see egeesee takaso, “Ayo namapoo taka. Edebeeyo howo maga osoloso Dio Tei maga see dia delega poogooga, yo Godeeye wiligi doloso badeli goo mapoo gadileime. <sup>6</sup> Mi odoó oso holope soomagoloso mi hamapoo debeliso. Esino Dio Tei oso gie badeli egee tenemolo odoó ee, Godeeyo owolo dio doloso badoboso kookaiyo gie badalaiso. <sup>7</sup> Esiga ayo namapoo takolone no see tobu soomagee dee hagee takoo duloso haga na dio di. <sup>8</sup> No pooso eyo goomoga maga sibulone goowa ee duliso. Esino yayo sibili eli sabolo osoloso yayo dili eli ee no gooleedele. Esiga Dio Tei oso odoó mapoo gie badeli egee tenemolo edebeeyo ogoloso koo gooleedeli.”

<sup>9</sup> Esemé Nikodimaseeye egeesee takaso, “Ha? Goo hagoso kasee peledabalaiyo?” diso.

<sup>10</sup> Esemé Yesuye yimapoo egeesee takaso, “No Isalael odoó dia eligili odoó, esino no goo hagee koo gooleedolo? <sup>11</sup> Esiga ayo namapoo taka. Iyo gooleedoo sabolo osoloso iyo egei goo ee Yu odoó nimapoo ka takomo siloso. Esino niyo ibada to mapoo tei talai ee ka gowooso. <sup>12</sup> Esiga ayo nimapoo mi goo maga takeme, niyo tei tele. Egeesi ma kulodu ayo see nimapoo Kei mi eyo goo maga takooga, niyo kasee tei talaisomo? <sup>13</sup> Odoó heeso bi Kei mi ma dokodoo egee molo

ee agalame pele. Haye. Hedebe Odo Holo ayo Kei mi mapoo ka badebei. Osoloso ayo Kei mi ma dokodooga mipoo hamapoo simiso. <sup>14</sup> Esiga daga hoogoo Isalael odo diba miwe poogoo mi mapoo doboome, Moseseeye hebise ki biso moodoo ee homo sabolo poudooso.\* Goo hedebe egeesi masi, edebeeyo Odo Holo anosee toloso egeesee poudileiso. <sup>15</sup> Goo egeesi maga edebeeyo amapoo tei toga, yo badoboso kookaiyo gie badeli talaiso.

<sup>16</sup> Godeeye mi odo diya sooloo dolone Owolo hedebe a meiyee diso, ayo mi odo ee halo talame. Esiga edebeeyo amapoo tei toga, diba Godee maga pileime, esino diba badoboso kookaiyo gie badeli talaiso. <sup>17</sup> Esiga Godeeye Owolo a mipoo hamapoo meiyee dee taka hagee, mi odo dia goo tokenee eyo nei tenelame ka meiyee dele. Esino mi odo oso amaga gie badeli pidili talame ka simi. <sup>18</sup> Osoloso edebeeyo Godeeyo Owolo amapoo tei toloso doga, dia goo tokenee eyo nei dimapoo dala tenelaime. Esino odo agayo amapoo tei telega doga, diba dia goo tokenee eyo nei talame ka doso. Bei, diba Godeeyo Owolo hedebe amapoo tei telega. <sup>19</sup> Gadeebugu mipoo hamapoo simiso. Esino mi odo oso gadeebugu egee goomegele poogoloso see neliga ono diya goomogaso. Bei, diayo dia suso goo moodoo ee diya tokeneega.

---

**3:14:** Num 21:9; Yon 8:28; 12:32      \* **3:14:** hebise ki biso moodoo - Daga hoogoo Isalael odooso Godee mapoo mesile poogoome, diba palame hebise diye diso. Esino Moseseeye hebise ki biso moodoo ee homo sabolo poudoome amapoo ogoloso diba hebiseso pa ee see weidooso.      **3:15:** Yon 20:31      **3:16:** Yon 3:36; 10:28; Loum 5:8; 8:32; 1Yon 4:9-10      **3:17:** Luka 19:10  
**3:18:** Yon 5:24      **3:19:** Yon 1:5, 9; 8:12

Goo egeesi maga Godeeye dia goo tokenee eyo nei tenelaiso. <sup>20</sup> Esiga goo tokenee teli odoe ee gadeebugu hegilone gadeebugu mapoo sibilei diya ebiliso. Bei, gadeebugu oso dia goo tokenee ee woola eligiyaga. <sup>21</sup> Esino edebeeyo Godeeye goomoga goo ee tomo siloga, diba gadeebugu mapoo sibilei ebileime. Bei, gadeebugu oso dia goo ee yilige buguga, goo susuga diayo moodoo ee Godeeye kitulugu maga ka moodoodoo doloso edebeeyo gooleedalaiso.”

*Yonee odoe howo oluguli oso  
Yesuwo goo taka*

<sup>22</sup> Osoloso goo hagoso dileso koodobume, Yesuye o hamamee dili odoe sabolo Yelusalem poogoloso see Yudiya mi toowa ee ma kulodu mi pepooko abo mapoo diso. Diba omapoo dileso dobolone odoe howo olugumeleeso. <sup>23-24</sup> Esino Yonee yo neliga moso ma kulodu tooselega badolone, Salim mi koola mapoo Ainon mi mapoo yayo odoe howo oluguso. Bei, mi omapoo howo toowa meleega, odoe susuga diba Yoneeye howo olugulame yimapoo sibumeleeso. <sup>25</sup> Egeesee semelee biame omapoo Yonee o hamamee dili odoe aboso Yu odoe dia adaga dia goo ee dodolone dee sabolo, homo sabolo, osoloso bi abo hapeli goo maga Yu odoe hee sabolo toso agadigaso. <sup>26</sup> Osoloso diayo sibilesos Yonee mapoo egeesee takaso, “Eligili odoe, daga Yoden howo hodiokoo odoe nobolo hodobo badebei ee no gooleedoo. Esiga nayo odoe egeeyo goo imapoo takemeni oso odoe howo ka olugumoloso. No ege,

odoo susuga oso no poogoloso see yimapoo ka duso,” dee takaso.

<sup>27</sup> Esino Yoneeye egeese takaso, “Edebeeyo eyo goolee goo hee moodoolai tebile. Esino Godeeye yimapoo kitulugu teneega, yo goo egee moodoolai ee tebileiso. <sup>28</sup> Esiga ayo nimapoo takolone, a Kelisonee, dee taka goo ee niba olo duso. Esino a wulo o eli moodoolame malalo diye di odoo ee aso. <sup>29</sup> Soboso giso obuoga, yo olo giso egeeyo. Odoo giso ido peli ee omapoo tobudulone, giso sibabeleso bameliso. Osoloso gisoso peledoboloso to taka ee duloso yo diya goomegeliso. Egeesi ma kulodu odoo giso ido peli masi ee aso. Esiga a epedee diya goomoga sabolo ka badoso. <sup>30</sup> Esiga Kelisoye toowa dolone, nei ayo pepooko dolone badalai tekepo.

<sup>31</sup> Esiga Kei mi ma dokodooga simi odoo oso odoo susuga dagadileso ka badoso. Esino mipoo hamapoo soomagoo ee mi odooso. Esiga yo wulo mipoo hageeyo goo ee takomo sili. Esino Kei mi ma dokodooga simi odoo yayo goo susuga diya dagadileso ka badoso. <sup>32</sup> Osoloso yayo egei goo sabolo osoloso yayo du goo ee takeliso. Esino odoo heeso o to mapoo tei koo teli. <sup>33</sup> Esino odoo agayo o to duloso tei too goo oso Godee yo tei goo takeli dolone ka eligiso. <sup>34</sup> Esiga Godeeye diye di odoo oso Godee maga to toloso takomo siliso. Bei, Godeeye o Dio Tei su goodegelega yimapoo olo teneeso. <sup>35</sup> Godeeye Owolo sooloo dolone goo susuga ee yayo wiligi doloso badalame kitulugu

---

**3:28:** Yon 1:20; Mat 11:10

**3:31:** Yon 8:23

**3:32:** Yon 3:11

**3:35:** Mat 11:27; Yon 5:20



yimapoo olo teneeso. <sup>36</sup> Esiga odoo agayo Owolo mapoo tei toga, yo badoboso kookaiyo gie badeli talaiso. Esino odoo agayo Owolo mapoo mesile poogooga, yo badoboso kookaiyo gie badeli talaimo. Esino Godeeyo kamana goo oso yimapoo kookaiyo osee malaiso.”

## 4

### *Yesu dio Samaliya sobo dio*

<sup>1</sup> Yesuye howo olugu odoo oso diya bei molone, yima hamamee deedeeso. Osoloso diayo Yoneeyo hamamee dili odoo ee dagadi goo ee, Pelisi odoo diba duso. <sup>2</sup> Esino Yesuye odoo howo olugumo sile. Hedebe o hamamee dili odoo oso odoo howo ka olugumo silee. <sup>3</sup> Esino Yesu yo Pelisi odoo oso o goo gooleedoo goo ee yo olo duloso, Yudiya mi poogoloso see Gelili mi mapoo wedi diso.

<sup>4</sup> Osoloso yo Gelili mi mapoo wedi dulone, Samaliya mi domo abaga dili eli omaga diso. <sup>5</sup> Yesuye Samaliya mi mapoo sibilesa mi edebeeyo bia Saika deli mapoo peledabaso. Esiga Saika mi edebeeyo bia hagee mi hee daga hoogoo Yekobeeye owolo Yosep mapoo tenee eyo koola omapoo moloso. <sup>6</sup> Esiga Yekobeeyo howo ou omapoo osee meleeso. Egeesi ma kulodu Yesu yo mi eli sage simiga kwasime, howo ou koola ogolone omapoo badebeiso. Biame egee osoko olo oo domo taba mapoo egeesee ka see.

<sup>7-8</sup> Osoloso Yesu o hamamee dili odoo ee edebeeyo bia mi mapoo nei neiso talame dime, Samaliya sobo howo ou omapoo howo kalame

---

**3:36:** Yon 3:16-18; 1Yon 5:12    **4:1:** Yon 3:22    **4:5:** Gen 33:19; Josh 24:32

simiso. Esemé Yesúye yimapoo egeesee takaso, “Nayo a howo keenee,” diso.

<sup>9</sup> Esino sobo egee yayo taka to ee dulosó díó diso. Bei, Yu odoosó Samaliya odoó maga pee-góoga booloogamo sílesibiliso. Esemé sobo ogosó Yesú mapoo egeesee takaso, “Nayo kasi maga amapoo howo keenee dee ka takala? Bei, no Yu odoó. Esino a Samaliya sobo,” dee takaso.

<sup>10</sup> Esemé Yesúye nei yimapoo egeesee takaso, “Nayo Godeeye wulo egee tenemolo goo ee gooleedolosó, odoó namapoo howo hoowa mó goo ee, no gooleedolosó badebei díepi, nayo amapoo kookaiyo gie badeli teneli howo ee hoowali. Osolosó nayo amapoo hoowa díepi, ayo nei namapoo howo egee teneli,” diso.

<sup>11</sup> Esemé sobo ogosó nei Yesú mapoo egeesee takaso, “Wiligi odoó, no gie badeli teneli howo ee kamapoo keelaiyo? Osolosó namapoo ou howo keli me. Osolosó howo ou hagonosée díya goobodomou. <sup>12</sup> Esiga íbada amawe Yekob pepooko dolone see nayo toowa dalame ka sala? Bei, íbada amawe Yekobeeye howo hagee ka ou, osolosó yayo owoló díó saboló osolosó o be saboló howo ou hedebe hagee naliso. Osolosó yayo howo ou hagee ímapoo poogoo diso.”

<sup>13</sup> Esemé Yesúye nei yimapoo egeesee takaso, “Edebeeyo howo ou hamapoo howo naga, díba see howo nala pagalaisó. <sup>14</sup> Esino odoó agayo howo ayo hagee keenee ee naga, yo see howo nala pagalaime. Esiga kookaiyo gie badeli teneli

howo ayo yimapoo tenelai oso yima kulodu howo ou masi molone, yimapoo badoboso kookaiyo gie badeli ee tenelaiso.”

<sup>15</sup> Esemе sobo ogoso nei yimapoo egeesee takaso, “Wiligi odoo, nayo egee takoo howo egee amapoo tenee, a hamamee see howo nala pegel-ega pagalame. Osoloso hamamee a hamapoo see howo kala sibilega pagalame,” dee takaso.

<sup>16</sup> Esemе Yesuye yimapoo egeesee takaso, “No dileso nomo ido sibe,” diso.

<sup>17</sup> Esemе sobo ogoso nei yimapoo egeesee takaso, “A giso me,” diso.

Esemе Yesuye nei egeesee takaso, “Nayo takolone, no giso me, dee egee takoo tei goo takoo.

<sup>18</sup> Bei, no daga giso dee tiadoo egeesi mapoo obiaso. Esino giso epedee nobolo hagee bado ee tei nomonee. Esiga nayo egee takoo, tei goo takoo,” dee takaso.

<sup>19</sup> Esemе sobo ogoso nei yimapoo egeesee takaso, “Wiligi odoo, a gooleedo, no Godee maga to toloso kokodo takomo sili odoo hee nosodoo.

<sup>20</sup> Samaliya bia ibada amawe dio oso mubi hagee ma dokodoo Godeeyo hu dokodoo poudiliso. Esino Yu odoo niyo takolone hedebe Yelusalem mi mapoo Godeeyo hu dokodoo ka poudilei tekepo dee takeliso. Esiga nayo amapoo takee, mi tekepo kamapoo iyo Godeeyo hu dokodoo ka poudileiyo?” dee takaso.

<sup>21</sup> Esemе Yesuye nei yimapoo egeesee takaso, “Emegei, no mo to mapoo tei te. Edebeeyo Ma Godeeyo hu dokodoo poudalame Yelusalem mapoo osoloso mubi hamapoo sibilega pagalai

biame ee olo siboso. <sup>22</sup> Samaliya odoo niyo goomoga poudili goo ee niba gooleedele. Esino Yu odoo iyo goomoga poudili goo ee iba gooleedooso. Bei, gie badeli pidili odoo ee hedebe Yu odoo imaga sibileiso. <sup>23</sup> Esiga biame olo siboso, esino biame ee olo simiso, tei yimapoo goomoga poudili odoo oso Dio Tei oso kitulugu maga, osoloso tei goo maga, Ma Godee mapoo goomoga poudalame. Bei, Ma Godeeye goo hageesi maga yimapoo goomoga poudili odoo omapoo diya goomegeliso. <sup>24</sup> Godee yo Dio. Osoloso yimapoo goomoga poudili odoo oso Dio Tei maga, osoloso tei goo maga yimapoo goomoga ka poudilei tekepo,” dee takaso.

<sup>25</sup> Esemе sobo ogoso nei yimapoo egeesee takaso, “A gooleedooso, Mesaya edebeeyo takolone Keliso deli ee sibileiso. Osoloso yayo sibileiso imapoo goo susuga medee eligileiso,” diso.

<sup>26</sup> Esemе Yesuye nei yimapoo egeesee takaso, “Odoo ee Mesaya aso, nobolo to egee komolo,” dee takaso.

<sup>27</sup> Egeesee semelee mapoo Yesuwo hamamee dili odoo oso edebeeyo bia mi ee ma kulduga wedi sibileiso egeino, Yesuye sobo sabolo to komolome, diya dio diso. Esino odoo heeso sobo omapoo woosolone, no ogo goomogolo, dee takele. Osoloso odoo heeso Yesu mapoo woosolone, nayo kasalame sobo sabolo to ka kamalala, dee takele.

---

**4:22:** 2Ki 17:29-41; Isa 2:3; Loum 9:4-5    **4:24:** 2Kol 3:17; Loum 12:1; Pil 3:3    **4:25:** Yon 1:41    **4:26:** Maka 14:61-62

<sup>28</sup> Osoloso sobo oso o ou howo keli omapoo magoloso see o moso bia takalame see wedi diso. <sup>29</sup> Sobo ogoso dilesos egeesee takaso, “Niba odoo hee hagee agalame sibe. Yayo goo ayo moodoo susuga ee takaso. Esiga odoo egee Keliso malaiso.”

<sup>30</sup> Esememe moso bia susuga Yesu agalame diyadeeso.

<sup>31</sup> Odoo susuga Yesu agalame sibataga molome, Yesuwo hamamee dili odoo oso Yesu mapoo egeesee takaso, “Eligili odoo, no nei ne,” diso.

<sup>32</sup> Esino Yesuye dimapoo egeesee takaso, “A nei moloso. Esino nei ayo nali ee niba gooleedele,” dee takaso.

<sup>33</sup> Esememe Yesu o hamamee dili odoo oso diesono egeesee takaso, “Odoo heeso yimapoo nei tenee bele?” dee takaga meleeso.

<sup>34</sup> Esememe Yesuye dimapoo egeesee takaso, “Mo nei ee Godeeye goomoga goo talai goo oso. Osoloso yayo a diye diso, tou yayo amapoo tenee ee tomo dimeleso hoo poogoo mapoo hosudalame.

<sup>35</sup> Niyos egeesee takeliso, ‘a bakadio bakadio di poogoloso nei howo segei tala dileiso,’ dee takeliso. Esino ayo nimapoo taka. Niba howo puo ogoloso nei howo segei\* mapoo ege. Bei, epedee hagee nei telegee ee talai biame hagoso.

<sup>36</sup> Esiga nei howo segei teli odoo oso dia tou eyo nei epedee hamapoo toso. Osoloso diayo odoo ee homokoko masi gooloogaloso tosililesos

---

**4:34:** Yon 6:38    **4:35:** Luka 10:2    \* **4:35:** nei howo segei - Yesuye wudu taka hagee tei neidee eyo goo maga takele. Esino edebeeyo Godeeyo to tekepo takomo dilei goo sabolo, osoloso odoo Godee mapoo gilimado sibilei goo ee wudu taka.

kookaiyo gie badeli talai mi mapoo mooloogoo mageliso, nei howo segeli odo sabolo, osoloso nei howo segei teli odo sabolo hodobo goomogalame. <sup>37</sup> Egeesi ma kulodu toso hagee takoo ee tei takooso, ‘Odo heeso nei howo segeliso. Osoloso see odo heeso nei howo segei ee teliso.’ <sup>38</sup> Esiga a niyo nei howo segele poogoo mi mapoo nei howo segei ee talame diye diso. Bei, mi omapoo odo aboso daga tou toowa tooso. Esino see niyo dileso talaiso.”

### *Samaliya odooso tei too*

<sup>39</sup> Samaliya soboso dileso o odo mapoo takolone, “Goo susuga ayo moodoo ee yayo amapoo taka,” dee takeme, Samaliya odo susuga mi omapoo debeli oso to hagee duloso Yesu mapoo tei tooso. <sup>40</sup> Osoloso diayo sibilesa Yesu mapoo egeese takaso, “No epedee ibolo hodobo hamapoo badebee,” diso. Esem Yesu yo biame bakadio dibolo hodobo omapoo badebeiso. <sup>41</sup> Egeesi ma kulodu odo susuga oso to yayo taka ee duloso yimapoo tei tooso. <sup>42</sup> Esem diayo sobo omapoo egeese takaso, “Nayo daga Yesuwo goo ee imapoo takeme, nee to duloso tei tooso. Esino iba epedee yayo takooga iso duloso tei toso. Esiga iba gooleedooso, odo hagee mi odo susuga dia gie badeli pidili odo osodoo,” diso.

<sup>43-44</sup> Egeesi ma kulodu Yesu eyo daga egeese takaso, “Godee maga to toloso kokodo takomo sili odo ee tei o moso bia oso goweliso,” diso. Yesu biame bakadio Samaliya mi mapoo badoboso see

Gelili mapoo diso. <sup>45</sup> Osoloso yo Gelili mapoo sibilesos peledoboome, edebeeyo yo ido diso. Bei, diba nosee Yesuye Yelusalem mapoo Gababia wo ne biame mapoo goo susuga yayo moodoo ee diba egeiga.

*Yesuye gamalee odoo eyo owolo tekepo pa*

<sup>46</sup> Osoloso Yesu Gelili mi toowa omapoo badolone see Kana mi pepooko mapoo diso. Daga mi omapoo howodee ee see yayo wain i palame moodooso.

Biame omapoo Kapeniyum mi mapoo gamalee odoo heeyo giso holo paiye badebeiso. <sup>47</sup> Esino gamalee odoo ogoso Yesuye Yudiya mi maga see Gelili mi mapoo simi goo ee duloso Yesu mapoo diso. Yo dilesos howolone egeesee takaso, “Mo holo paiyesos talame badoso. Esiga nayo mo holo tekepo palame Kapeniyum mi mapoo abolo sibe,” dee takaso.

<sup>48</sup> Esino Yesuye yimapoo egeesee takaso, “Niyo ayo goo toowa opusomos di moodoo ee egelega poogooga, amapoo tei talaime,” dee takaso.

<sup>49</sup> Esemes odoo ogosos nei Yesu mapoo egeesee takaso, “Wiligi odoo, mo holo teyaga, nayo saga sibilesos yo tekepo palame moodee,” diso.

<sup>50</sup> Esino Yesuye yimapoo egeesee takaso, “No see wedi di. Nee holo wedileiso,” diso.

Esemes odoo yo Yesuwo to duloso tei tolosos see o mi mapoo wedi diso. <sup>51</sup> Osoloso yo see eli domopoo osee dimolome, o tou teli odoo oso

sibileso yimapoo egeesee takaso, “Nee holo olo weidiloso badoso,” dee takaso.

<sup>52</sup> Esemе odoо ogoѕo nei dimapoo egeesee takaso, “Osoko howo domo kamapoo molome, yo kekebisa ka koododiala?” diso. Esemе diayo nei yimapoo egeesee takaso, “Eiyo osoko olo wudu magoo mapoo ka koododia,” diso.

<sup>53</sup> Esemе odoо yo gooleedoloso egeesee goolee-buguso, bei, eiyo osoko howo hedebe omapoo Yesuye yimapoo takolone, “nee holo weidileiso,” dee taka goo ee goolee buguso. Esemе odoо susuga o moso kulodu debeli sabolo osoloso yibolo Yesu mapoo tei tooso.

<sup>54</sup> Esiga Yesuye Yudiya mi maga see Gelili mi mapoo sibileso goo toowa opusomo di moodoo hagoso olo bakadio diso.

## 5

*Yesuye Betesada howo sawwili ou mapoo odoо hee tekepo moodoo*

<sup>1</sup> Osoloso goo hagoso dilesо koodobume, Yu odooso wo nali hee nalame Yelusalem mapoo polome, Yesu yinosee omapoo palaso. <sup>2</sup> Esiga Yelusalem mi beeleе mapoo osulu hee Sipi Be Osulu deli meleeso. Osoloso ee ma kulodu howo sawwili dadabayo ou toowa meleeso. Howo sawwili dadabayo ou o hu ee Yu odoо dia toso takolone Betesada deliso. Osoloso howo ou pee mapoo hau pooba dee tiadoo egeesi meleeso. <sup>3-4</sup> Egeeseelone odoо paigiga sabolo, osoloso odoо howo neliga sabolo, osoloso odoо kido todobia sabolo, osoloso odoо su kakawa



poogoo sabolo hau omapoo tieseliso. [Osoloso diba omapoo tiesamolone, biame abo mapoo Godeeyo momaiye heeso sibilesi howo egee wolabeleso bolone osee tiesameliso. Bei, momaiyeso howo wolomeleso koodobuoga, odoo daga malalo howo ee ma kulodu meili odoo ee tekepo peliso.] <sup>5</sup> Egeeseelone giso hee dugo 38 ee ma kulodu paiye melee onosee hau omapoo badebeiso. <sup>6</sup> Odoo daga yayo hoogoo pailoso badebei Yesuye ogoloso yimapoo egeese takaso, “No see weidilei goomogolo?” dee takaso.

<sup>7</sup> Esem e odoo ogoso yimapoo nei egeese takaso, “Wiligi odoo, howo weeleega, a pidilame ido meilei odoo hee me. Bei, a meilame seega, odoo heeso malalo meiliso,” dee takaso.

<sup>8</sup> Esem e Yesuye yimapoo egeese takaso, “No toboloso nee kida toloso di,” diso.

<sup>9</sup> Osoloso biame omapoo odoo egee see olo tekepo poloso o kida toloso diso. Esino goo hagoso peledaba ee Yu odoo dia hasali biame omapoo ka peledaba. <sup>10</sup> Esem e Yu odoo dia wiligi odoo tebisa oso odoo hagoso o kida toloso di ee ogoloso yimapoo egeese takaso, “Hasali biame hamapoo odoo heeso o kida toloso dilei tei,” dee takaso.

<sup>11</sup> Esem e odoo ogoso nei egeese takaso, “Odoo a tekepo pa oso amapoo takolone, mo kida toloso di, dee takeme a ka di,” diso.

<sup>12</sup> Esem e diayo yimapoo nei egeese takaso, “Odoo agayo namapoo takolone, nee kida toloso di, dee ka takala?” dee takaso.

<sup>13</sup> Esino odoo yo tekepo pa ee yo medee kibiya gooledele. Bei, odoo susuga oso diya mooloo-goodeme, Yesu yo mooloogoodoo ee ma kulodu esigaboodooso.

<sup>14</sup> See hamamee Yesuye odoo egee tei moso tegei ma kulodu badebei ogoloso yimapoo egeesee takaso, “No, no medee goolee, no epedee olo tekepo paso. Esiga no see goo tokenee na te. Nayo goo tokenee see tobu tomo siloga, goo tokenee toowa see namapoo peledbeyaga,” dee takaso. <sup>15</sup> Esemee odoo ogoso dileso Yu odoo dia wiligi odoo dimapoo takolone egeesee takaso, “Yesuye a tekepo ka pa,” diso.

<sup>16</sup> Egeesi ma kulodu Yesuye Yu odoo dia hasali biame mapoo goo hageesee teme, Yu odoo dia wiligi odoo tebisa oso komonolone yimapoo hegi goo tenelame bei mooloogooso. <sup>17</sup> Esino Yesuye dimapoo egeesee takaso, “Mo Ma biame susuga tou tomoloso. Esiga anosee biame susuga tou ka tomoloso,” diso.

<sup>18</sup> Yesuye to egeesee takeme, nei diayo yo wooloomalame diya goomogaso. Bei, yayo hedebe Yu odoo dia hasali biame ee gababile, esino yayo takolone, Godee yo tei Ama, dee taka goo omaga, eyo nediliyo yo Godee sabolo hodobo teiba neme.

### *Godeeye kitulugu Owolo*

#### *Yesu mapoo tenee*

<sup>19</sup> Esiga Yesuye Yu odoo dia wiligi odoo tebisa mapoo egeesee takaso, “Ayo nimapoo taka. Owolo ayo mawo goomoga goo hee talai tebile.

Esino Owolo ayo hedebe Maye teli goo ee ogoloso anosee goo ee teliso. <sup>20</sup> Maye Owolo a diya sooloo dalaga, goo yayo teli susuga ee Owolo amapoo eligiliso. Esemе niyo Owolo ayo goo moodoo ee ogoloso hoowoolame, Maye amapoo goo diya toowa moodolai eligileiso. <sup>21</sup> Egeesi ma kulodu Maye odoo wedia hogogaduloso see gie badeli egee tenemolo, egeesee solone, Owolo ayo odoo mawo goomoga mapoo gie badeli ka tenemoloso. <sup>22</sup> Esiga Maye odoo goo koo midili. Esino yayo Owolo amapoo kitulugu olo teneeso, ayo odoo susuga dia goo ee midilame. <sup>23</sup> Egeesi ma kulodu Maye goo egee moodooso, odoo susuga oso Ma mapoo goomogolone o hu dokodoo poudalame. Osoloso diayo Owolo amapoo goomogolone mo hu onosee dokodoo ka poudalame. Esiga odoo agayo Owolo amapoo goomoga poudilega badoga, yo Ma Godee a diye di odoo mapoo goomoga koo poudoso.

<sup>24</sup> Esiga ayo nimapoo ka taka. Mo to duloso a diye di odoo mapoo tei teli odoo ee badoboso kookaiyo gie badeli olo tooso. Odoо egeesee seli ee o goo tokenee eyo nei talaime. Yo teli maga dagadileso see gie badeli mapoo badoso. <sup>25</sup> Esiga ayo nimapoo ka taka. Biame oso sibileiso, esino biame ee olo simiso, odoo tei telega wedia oso Godeeyo Owolo mo to dulei. Egeesi ma kulodu edebeeyo mo to duloso tei toga, yo badoboso kookaiyo gie badeli talaiso. <sup>26</sup> Bei, Ma yo gie badeli eyo bei yoso. Esiga Owolo ayo gie badeli eyo bei doloso badalame, yayo kitulugu amapoo

olo teneeso. <sup>27</sup> Osoloso Maye Owolo amapoo kitulugu olo teneeso, ayo odoosusuga dia goo ee midilame. Bei, a Odoos Holo.

<sup>28</sup> Esiga ayo taka to hagee duloso niba haga na dio di. Bei, biame oso sibileiso, odoos wedia dia bi mapoo egee tiesamoloso oso Odoos Holo mo to duloso dia bi maga hogogadileiso. <sup>29</sup> Egeesi ma kulodu goo tekepo tomo sili odoos diba badobosogie badeli talame hogogadileiso. Esino goo tokenee tomo sili odoos diba dia goo tokenee eyo nei talame hogogadileiso. <sup>30</sup> Ayo goo mawo goolee ee tomo silei tebile. Bei, Ma a diye di oso goo midilei goo amapoo takooga, ayo goo egeesi ka midili. Esiga ayo goo midili ee diya tekepo. Bei, ayo mawo goomoga goo koo tomo sili. Esino ayo hedebe odoos a diye di oso goomoga goo ee ka tomo siloso.

### *Yesuwo goo taka*

<sup>31</sup> Esiga ayo hedebe mo goo maga takooga, edebeeyo mo to mapoo tei talai goo eyo bei mauwe dalaiso. <sup>32</sup> Esino mo Maye mo goo maga takomoloso. Bei, a gooleedoo, yayo mo goo maga egee takoo, ee tei takooso.

<sup>33</sup> Esiga niyo odoos abo Yonee mapoo diye diso. Esemeyayo dimapoo tei goo takaso. <sup>34</sup> Esino edebeeyo mo goo maga tei goo egee takoo goo ee tei beleso, a medee koo gooleeso. Esino niyo gie badeli talame ayo goo susuga hagee nimapoo takaso. <sup>35</sup> Yonee yo keme masi gadeebugunimapoo teneeso. Esiga niyo biame deiyepo

ee ma kulodu gadeebugu sabolo dabalame diya goomogaso.

<sup>36</sup> Esiga Yoneeye mo goo maga tei goo takomo siliso. Esino tou ayo temeleso hosudalame Godeeye amapoo tenee oso Yoneeye mo goo takomo sili ee dagadiso. Bei, tou ayo tomo sili oso Maye a diye di goo ee ka eligiso. <sup>37</sup> Osoloso mo Maye a diye di oso mo goo maga tei goo ka takooso. Esino niyo to yayo taka ee dule, osoloso o mudu egele. <sup>38</sup> Esiga niba Godeeyo to duloso nibada sooloo ma kulodu tei koo teli. Bei, niyo Maye diye di odo amapoo tei koo teli.

<sup>39</sup> Niyo Godeeyo to booka mapoo hogugu medee hesigaloso gooleedoloso dobolone, nei to oso nimapoo gie badeli tenelaiso doloso doso. Esino niyo to hesiga ee mo goo takeli. <sup>40</sup> Esino ayo nimapoo gie badeli tenelame seega, niyo amapoo sibilei koo goomegeli.

<sup>41</sup> Osoloso niyo see mo hu dokodoo poudilei, ayo haga koo gooleeso. <sup>42</sup> Bei, a gooleedooso, niyo nibada sooloo ma kulodu Godee goolee mauwe. <sup>43</sup> Esiga ayo mo Ma Godeeyo hu maga simiso. Esino niyo a koo goomogoso. Esino edebeeyo eyo goolee o hu maga siboga, niyo odo egee goomogolone yo idiliso. <sup>44</sup> Esiga niyo wulo edebeeyo nibada hu dokodoo poudilei goomogolone debeliso. Esino Godee hedebe yayo nibada hu ono dokodoo poudalame, niyo ki koo kituluguli. Esiga niyo amapoo kasee tei talaiyo?

<sup>45</sup> Esiga ayo Mayo mudugiyopoo niba odo tokenee dee takeeya dee na goolee. Niyo goolee,

Moseseeye niba pidilei gooleeso. Esino yayo Mayo mudugiyopoo niba odoo tokenee dalaiso. <sup>46</sup> Egeesi ma kulodu niyo Moseseeye taka to mapoo tei too diepi, niba ayo taka to mapoo tei teliyo. Bei, Moseseeye mo goo ee Godeeyo to booka mapoo ka hogugu. <sup>47</sup> Esino niyo Moseseeye to hogugu mapoo tei telega ka doso. Esiga niyo to ayo hagee takoo mapoo kasee tei talaiyo?”

## 6

*Yesuye odoo 5,000 mapoo nei pi  
(Mat 14:13-21; Maka 6:30-44; Luka 9:10-17)*

<sup>1</sup> Esemee goo hagosoo dilesoo koodobume, Yesu yo see Gelili abei hodiokoo du maga dalo soowaso. Gelili abei hageeyo hu hee ee Taibiliyes deliso.

<sup>2</sup> Egeeseelone Yesuye goo toowa opusomo di moodoolone, odoo paigiga susuga tekepo moodoo demelee maga, odoo mooloogoodoo toowa oso goo egee ogoloso yima hamamee mili diyadeeso.

<sup>3</sup> Esemee Yesuye o hamamee dili odoo sabolo mubi ma dokodoo peleso debeiso. <sup>4</sup> Osoloso biame omapoo Yu odoo dia Gababia wo nali biame ee olo koola tabaso.

<sup>5</sup> Biame omapoo odoo mooloogoodoo toowa oso yimapoo sibadee ee ogoloso Yesuye Pilipi mapoo egeese takaso, “Iyo nei moleeso kamapoo toloso odoo susuga hamapoo ka pileiyo?” diso. <sup>6</sup> Esiga Yesuye odoo hagee bia dimapoo moodolai goo ee yo olo gooledoloso badolone, see wulo Pilipiye tei too ee agalame yimapoo egeese ka taka.

<sup>7</sup> Esemé Pilipiye nei egeesee takaso, “Odoó susuga hagee bia dimapoo iyo nei toloso pilei ee, molee toowa kamapoo talaiyo? Bei, edebeeyo odoó susuga hagee bia nei pilame molee talame biame 200 ee ma kulodu tou toowa toga, molee oso odoó hedebe hedebe di mapoo wulo nei pepooko pilei tebileime,” dee takaso.

<sup>8-9</sup> Esemé Yesu o hamamee dili odoó hee Saimon-Pitayo omolo Enduluye Yesu mapoo egeesee takaso, “Hagee ma kulodu giso holo heeso wo si dee tiadoo sabolo osoloso di bakadio sabolo toloso badoso. Esino nei pepooko hagosó odoó susuga ee pilei tebile,” diso.

<sup>10</sup> Esemé Yesuye o hamamee dili odoó dimapoo egeesee takaso, “Odoó susuga hagee bia bulume doloso takee,” diso. Mi omapoo obu bouwe meleeso. Esemé odoó susuga go domo omapoo bulumaso. Egeesi ma kulodu hedebe gisowe hesiga ee 5,000 egeesi tugodooso. <sup>11</sup> Esemé Yesuye wo si toloso Godee mapoo goomoga to takoloso, wo si popeiloso odoó susuga mapoo piso. Osoloso di bakadio toloso goo hedebe o egeesi moodooso. Esemé odoó susuga oso nei egee naloso diya edigaso.

<sup>12</sup> Diba nei naloso oduguloso doboome, Yesuye o hamamee dili odoó dimapoo egeesee takaso, “Nei abo poogoo susuga ee misigamo di. Nei abo wulo gamenee peegeeyaga,” diso. <sup>13</sup> Esemé wo si dee tiadoo odoó susuga oso naloso abo poogoo ee, Yesu o hamamee dili odoó oso misigamo dileso bou tegei 12 egeesi metamagisaso.

<sup>14</sup> Odoó susuga oso Yesuye goo toowa opusomo di moodoo hagee ogoloso egeesee takaso, “Tei

takoo, odoo hagee Godee maga to toloso kokodo takomo sili odoo iyo sibileiso doloso bolone de-bei odoo ee hagosodoo,” dee takaga meleeso. <sup>15</sup> Esemme Yesuye dia wiligi odoo tabalame, Yesu mapoo sibilesa seselame gooleemelee goo ee, yo olo gooleedooso. Esino Yesuye olo ogoloso diba poogoloso see obusomo mubi ma dokodoo palaso.

*Yesuye howo ma dokodooga di  
(Mat 14:22-33; Maka 6:45-52)*

<sup>16</sup> Olo habedee mapoo Yesu o hamamee dili odoo oso yo balame abei mapoo mousu. <sup>17</sup> Esino Yesu sibilega molome olo neligaso. Esemme diba dia du mapoo toboloso Kapeniyum mi mapoo dalo soowaso. <sup>18</sup> Diba sudaso olo sulugamo diyadaga molome, i toowa simi oso howo ki toowa simiso. <sup>19</sup> Diba eli sage 5 kilomita egeesi diyadaga molome, Yesuye howo ma dokodooga dimapoo sibume egeiso. Esemme diba diya obulone dio diso. <sup>20</sup> Esino Yesuye dimapoo egeesee takaso, “Niba haga na ebi. Ayo siba,” diso. <sup>21</sup> Esemme diayo goomoga sabolo yo dia du ma kulodu dabeegee diso. Egeesee semelee mapoo haga booloogelega mi diayo di omapoo peledoboloso dia du omapoo oluguso.

*Yesu yo wo gie badeli teneli*

<sup>22</sup> Biame hee mapoo Yesuye nei pi odoo susuga oso du dali hedebe omapoo meilesa Yesu bameleso, daga omapoo du hedebe meeleega, diayo goolee Yesu omapoo badaba bele dolone. Bei, Yesu o hamamee dili odoo dibusomo daga malalo du egee toloso dime diayo egeiga. <sup>23</sup> Esemme biame



domo omapoo odoo du abo maga Taibiliyes mi maga sibilesa odoo mooloogoodoo toowa oso debei mapoo peledabaso. Daga mi koola omapoo Yesuye Godee mapoo goomoga to takoloso odoo susuga mapoo nei piso. <sup>24</sup> Esino diayo omapoo egeino, Yesu sabolo o hamamee dili odoo sabolo me neme, see diayo du omaga Yesu esilame Kapeniyum mi mapoo soowaso.

<sup>25</sup> Diayo abei daloso Kapeniyum mi mapoo peledoboloso Yesu ogoloso yimapoo egeese takaso, “Eligili odoo, no kopolone hamapoo ka simiyo?” dee takaso.

<sup>26</sup> Esem Yesuye nei egeese takaso, “Ayo nimapoo taka. Niyo a esiamo simi egee, ayo goo toowa opusomo di moodoo ee egeiga, niyo a ka esiamo sibile. Esino niba ayo nei pime ne oso diya edigaga, niyo wulo a ka esiamo simidoo. <sup>27</sup> Esiga niba nei saga me pegeli egeesi haga na esiamo silesibe. Esino niba kookaiyo moloso osee meli nei ono ka esiamo silesibe. Odoo Holo ayo nei hagee nimapoo tenelaiso. Bei, Ma Godeeye Owolo ayo goo hagee talame amapoo kitulugu olo teneeso.”

<sup>28</sup> Esem diayo nei egeese takaso, “Godeeye iyo ogoo goo talame diya ka goomogosomo?” dee takaso.

<sup>29</sup> Esem Yesuye nei dimapoo egeese takaso, “Godee yo goomogoso, yayo diye di odoo amapoo tei talame.”

<sup>30-31</sup> Esem odoo mooloogoodoo oso yimapoo egeese takaso, “Iyo namapoo tei talame, nayo

ogoo goo toowa opusomo di ka moodoolaiyo? Bei, Godeeyo to booka mapoo hogugu oso takolone, ibada amawe dio oso miwe poogoo mi mapoo silesibume, Moseseeye Kei mi ma dokodooga wo mana deli\* ee diayo nalame teneliso. Esiga Moseseeye ibada amawe dimapoo goo hagee moodooso. Esino iyo namapoo tei talame, nayo imapoo ogoo goo moodoolaiyo?” dee takaso.

<sup>32</sup> Esemé Yesuye nei dimapoo egeesee takaso, “Ayo nimapoo taka. Moseseeye nibada amawe dio mapoo Kei mi wo ee tenele. Esino mo Maye dimapoo wo egee ka tenee. Goo hedebe egeesi masi, yayo Kei mi ma dokodooga tei wodee ee nimapoo ka tenemoloso. <sup>33</sup> Esiga Godeeyo wo Kei mi ma dokodooga mi hamapoo sibeye dee taka ee aso. Bei, ayo mi odoó mapoo gie badeli ka tenemoloso.”

<sup>34</sup> Esemé nei diayo yimapoo egeesee takaso, “Wiligi odoó, biame susuga gie badeli wo egee nayo imapoo tenemelee,” dee takaso.

<sup>35</sup> Esemé Yesuye egeesee takaso, “Gie badeli teneli wo aso. Esiga odoó agayo amapoo siboga, yo see hodileime. Osoloso odoó agayo amapoo tei toga, yo see howo nala pagalaime. <sup>36</sup> Daga ayo nimapoo takolone, goo toowa opusomo di ayo moodoo ee niyo olo egeiso, dee takaso. Esino niba amapoo tei koo to. <sup>37</sup> Odoó mo Maye amapoo tenee oso amapoo sibileiso. Esiga dima kulodu odoó hee ayo peegoo habigileime. <sup>38</sup> Bei, ayo Kei

---

\* **6:30-31:** wo mana deli - Yu odooso dugo 40 ee ma kulodu miwe poogoo mi mapoo silesibume, Godeeye wo mana deli hagee diayo nalame teneliso. Mana deli hagee, wo masi heliye pepooko dooboo hadali. **6:35:** Yon 4:14

mi ma dokodooga mi hamapoo simi egee, mawo goomoga goo ee talame ka sibile. Esino mo Ma, a diye di odoo oso goomoga goo ee talame ka simi. <sup>39</sup> Egeesi ma kulodu yayo goomoga goo ee hagoso. Odoo yayo amapoo tenee dima kulodu ayo hedebe osugobalai, yo koo goomogoso. Esino hamameedee biame mapoo ayo diba wedia maga see gie badeli talame hogogadileiso. <sup>40</sup> Bei, mo Ma yo goomogoso, odoo agayo Owolo a ogoloso amapoo tei toga, diba badoboso kookaiyo gie badeli talaiso. Osoloso hamameedee biame mapoo ayo diba wedia maga see hogogadileiso.”

<sup>41</sup> Egeesee semelee biame omapoo Yesuye takolone, “A Kei mi ma dokodooga simi wo aso,” dee takeme, Yu odoo oso duloso komonolone to boowaso. <sup>42</sup> Esemе diayo egeesee takaso, “Odoo hagee Yosepeeyo owolo Yesuso. Esiga ama dio owee dio, iba gooleedoo. Esino yayo takolone, yo Kei mi maga simi, diso. Yayo kasalame egeesee ka takayo?” dee takaso.

<sup>43</sup> Esino Yesuye nei dimapoo egeesee takaso, “Nima kulodu to boowa egee molo omapoo koodobie. <sup>44</sup> Bei, edebeeyo eyo goolee amapoo sibileime. Esino Ma a diye di oso amapoo sibilame gi odoo oso amapoo sibileiso. Osoloso hamameedee biame mapoo ayo yo ta maga see hogadileiso. <sup>45</sup> Osoloso Godee maga to toloso kokodo takomo sili odoo heeso egeesee hoguguso, ‘Godeeye odoo susuga eligileiso,’ diso. Esiga odoo agayo Mayo to duloso yimaga goo gooleedoga,

---

**6:39:** Yon 10:28-29; 17:12    **6:42:** Mat 13:55    **6:44:** Yon 6:65  
**6:45:** Isa 54:13

diayo amapoo sibileiso. <sup>46</sup> Odoos heeso Ma egele. Esino hedebe Ma Godee maga simi odoos ayo Ma egeiso. <sup>47</sup> Esiga ayo nimapoo taka. Amapoo tei too odoos yo olo badoboso kookaiyo gie badeli tooso. <sup>48</sup> Gie badeli teneli wo ee aso. <sup>49</sup> Esino nibada amawe dio oso miwe poogoo mi mapoo dobolone, wo mana deli ee nolone debeiso. Esino wo mana deli ee nali odoos egee bia olo wediaso. <sup>50</sup> Esino wo hagee Kei mi maga simi. Esiga wo hagee naga odoos egee bia wedileime. <sup>51</sup> Kei mi ma dokodooga simi gie badeli teneli wo ee aso. Esiga edebeeyo wo hagee naga, yo badoboso kookaiyo gie badalaise. Osoloso wo ayo tenelai egee molo ee mo hwei, mi odoos oso gie badeli talame.”

<sup>52</sup> Esemee Yu odooso to hagee dulosoo dima kulodu to boowoolone egeese takaso, “Odoos hagosoo o hwei iyo nalame kasee tenelaiyo?” dee takaso.

<sup>53</sup> Esemee Yesuye nei dimapoo egeese takaso, “Ayo nimapoo taka. Niyo Odoos Holo mo sawo sabolo osoloso mo hwei sabolo nelega poogooga, niba gie badeli talaime. <sup>54</sup> Esiga mo hwei sabolo osoloso mo sawo sabolo nali odoos, diba badoboso kookaiyo gie badeli talaise. Osoloso hamameedee biame mapoo ayo diba wedia maga see hogogadileiso. <sup>55</sup> Mo hwei sabolo osoloso mo sawo ee tei nei dee oso. <sup>56</sup> Egeesi ma kulodu mo hwei sabolo osoloso mo sawo sabolo nali odoos oso abolo hedebe doloso ka badoso. Osoloso anosee dibolo hodobo badoso. <sup>57</sup> Esiga Ma a diye di oso gie badoga anosee ka badoso. Esiga mo

---

**6:46:** Yon 1:18

**6:47:** Yon 3:15-16

**6:48:** Yon 6:32, 58

**6:57:** 1Yon 3:24

hwei sabolo osoloso mo sawo sabolo nali odoososo amaga gie badeli talaiso. <sup>58</sup> Egeesi ma kulodu a nibada amawe diayo namo silee wo egeesinee. Bei, diayo wo egee ne oso dimapoo gie badeli tenele. Esino a Kei mi ma dokodooga simi wo tei aso. Esiga edebeeyo wo hagee naga, diba badoboso kookaiyo gie badalaiso.”

<sup>59</sup> Yesuye Kapeniyum mapoo howo gisili moso ma kulodu odoosusuga mapoo eligilone goosusuga egeesee ka taka.

*Yesuwo to ee gie badeli teneli*

<sup>60</sup> Esino Yesu yo deedee silesibili odoososo Yesuye eligi goo ee duloso egeesee takaso, “Eligi goo hagee diya koudadoo. Odoosogayoto hagee talai ka teibayo?” dee takaso.

<sup>61</sup> Egeesi ma kulodu Yesu yo deedee silesibili odoosodima kulodu to boowoogamelee ee gooleedoloso dimapoo egeesee takaso, “Goo ayo hagee takoo oso nimapoo dala teneedo? <sup>62</sup> Goo hagoso nimapoo dala teneega, niyo Odoosolo ayo see Kei mi ma dokodoo wedi pala ogoloso kasee goolaisomo? <sup>63</sup> Dio Tei oso gie badeli ka tenemoloso. Esino suso goomoga goo oso gie badeli koo tenemoloso. To ayo nimapoo taka ee Dio Tei maga simi, esiga to oso gie badeli ka tenemoloso.”

<sup>64</sup> Yesu yo daga malalo olo gooleedooso, yimapoo tei telega pagalai odoosolo ee. Osoloso yo toloso ha teli odoosomapoo tiasalai odoosonosee yo olo gooleedooso. Esiga yayo dimapoo egeesee takaso, “Odoosobonima kulodu egee do

amapoo tei koo toso. <sup>65</sup> Goo egeesi maga ayo to hagee nimapoo olo takaso, ‘Edebeeyo eyo goolee amapoo sibileime. Esino Maye amapoo sibilame kitulugu tenee odoo oso amapoo sibileiso,’ dee takooso.”

<sup>66</sup> Yesuye to hagee taka koodobume, yo deedee silesibili odoo aboso yo deedee silei gowoolone yo poogoo diso.

<sup>67</sup> Esemé Yesuye o hamamee dili odoo 12 mapoo egeesee takaso, “Niba noseé a poogoo dilei goomogosomo?” dee takaso.

<sup>68</sup> Esemé Saimon-Pitaye nei egeesee takaso, “Lodee, iba odoo ogu mapoo dileiyo? Hedebe nee to oso gie badeli ka tenemoloso. <sup>69</sup> Esiga iyo namapoo tei toso. Osoloso iba gooleedooso, no tei odoo Godee maga simi oso,” diso.

<sup>70</sup> Esemé Yesuye nei dimapoo egeesee takaso, “Ayo odoo 12 niba olo hudi magooso. Esino nima kulodu odoo hedebe Saiteneeyo tou teli odoo badoso.” <sup>71</sup> Esiga Yesuye to hageesee taka egee, Saimon-Iskaliyot eyo owolo Yudas eyo goo ee taka. Bei, Yudas yinosee Yesuwo hamamee dili odoo 12 ee ma kulodu badeli. Esino yayo hamamee Yesu ha teli odoo mapoo tiasalaiso.

## 7

### *Yesuwo omolo dio oso yimapoo tei tele poogoo*

<sup>1</sup> Esiga goo hagoso dileso koodobume, Yesu yo Yudiya mi mapoo silei gowoolone, see Gelili mi mapoo dileso siliso. Bei, Yudiya mi omapoo Yu

odoo dia wiligi odoo oso Yesu wooloomalame eli esiamo siliso. <sup>2</sup> Osoloso Yu odoo dia Waseme moso maga wo nalai biame\* olo koola tabaso. <sup>3</sup> Esemé Yesuwo omolo dio oso yimapoo egeesee takaso, “No mi hagee poogoloso see Yudiya mi mapoo di, no deedee silesibili odoo oso nayo goo toowa opusomo di moodooga ee agalame. <sup>4</sup> Bei, edebeeyo o goo ee odoo susuga oso gooleedalai goomogoga, yo goo mada koo moodoomo siliya. Esiga no goo toowa opusomo di medee woola moodoomo sile, odoo susuga oso nee goo ee ogoloso gooleedalame,” diso. <sup>5</sup> Goo egeesi ma kulodu Yesuwo omolo dio oso yimapoo tei telega debeiso.

<sup>6</sup> Esemé Yesuye nei dimapoo egeesee takaso, “Ayo Yelusalem mapoo dilei biame koo tugodo. Esino niba dilei goomogoga, wulo biame hee mapoo dilei tekepo. <sup>7</sup> Mi odoo oso niba hegilei eyo bei me. Esino diayo a hegiliso. Bei, ayo dia goo tokenee ee woola yilige buguga. <sup>8</sup> Esiga niba wo ne mapoo diyadee. Esino a dileime. Bei, mo biame tugodelega.” <sup>9</sup> Yesuye egeesee takoloso Gelili mi mapoo badebeiso.

*Waseme moso maga wo ne biame mapoo Yesuye odoo mapoo eligi*

---

**7:2:** Lev 23:34 \* **7:2:** Yu odoo dia amawe diayo miwe poogoo mi mapoo dobolone, dugoso moso tegegaloso omapoo debeliso. Biame ee goolone, Yu odooso Waseme moso maga wo nali biame mapoo homo deeso waseme moso tegegaloso omapoo debeliso. Osoloso Yu odoo dia wo nali hagee sabolo osoloso abo ee Yelusalem mapoo naliso. **7:5:** Diye 1:14

<sup>10</sup> Yesuwo omolo dio oso Waseme moso maga wo nalame Yelusalem mapoo paladee neme, Yesu yinosee hamamee palaso. Esino odoo howo woola palai gowoolone mada palaso. <sup>11</sup> Osoloso wo ne ee ma kulodu Yu odoo dia wiligi odoo oso Yesu esilone egeesee takaso, “Yesu kasomo?” dee takaso.

<sup>12</sup> Esememe odoo mooloogoodoo toowa oso mada dima kulodu Yesuwo goo maga mada takomo sile-sibulone, odoo aboso egeesee takaso, “Yesu odoo tekepo,” dee takaso. Esino odoo aboso takolone, “Haye, yo wulo gamenee goo maga odoo peegoo ka gilimado du,” dee takaso. <sup>13</sup> Esino Yu odoo dia wiligi odoo bolo obulone, diayo Yesuwo goo maga to woola takele.

<sup>14</sup> Osoloso wo ne olo domo taba mapoo, Yesuye tei moso mapoo peleso Godeeyo to eligilame bei mooloogooso. <sup>15</sup> Esememe Yu odoo oso yayo eligi goo ee duloso diya howoogadolone diayo egeesee takaso, “Odoo hagee kasi maga Godeeyo to susuga ka gooleedoowo? Bei, yo Godeeyo to gooleedeli sukulu mapoo dile,” dee takaso.

<sup>16</sup> Esememe Yesuye nei dimapoo egeesee takaso, “Ayo hagee eligi wulo mawo goolee koo eligili. Esino a diye di Godee maga simi goo ee eligili. <sup>17</sup> Esiga Godeeye goomoga goo ee talame goomoga odoo oso ayo eligi goo hagee tei Godee maga simidoo doloso gooleedalaiso. Osoloso ayo mawo goolee koo eligili goo onosee gooleedalaiso. <sup>18</sup> Edebeeyo eyo goolee eligimo siloga, yo o hu eyo nediliyo doko topoloso. Esino edebeeyo yo diye di

---

**7:15:** Mat 13:54; Luka 2:47

**7:16:** Yon 12:49; 14:10

**7:18:**

Yon 8:50



odoo oso goolee ee eligimo siloga, yo diye di odoo eyo hu ee doko toposo. Esiga yo tei goo takeli, osoloso yo gamenee koo takeli. <sup>19</sup> Moseseeye nimapoo tei magoo hogugu ee teneeso. Esino niba susuga tei magoo hagee koo dedeli. Esiga kasi maga niyo a wooloomalame ka sala?”

<sup>20</sup> Esemee odoo mooloogoodoo oso nei yimapoo egeesee takaso, “Bo holoso nama kulodu palaga, no to egeesee ka takoo. Iba no wooloomalame koo seeso,” diso.

<sup>21</sup> Esino Yesuye dimapoo nei egeesee takaso, “Niyo hasali biame mapoo ayo goo toowa opusomo di hedebe moodoo ogoloso niba susuga dio diso. <sup>22</sup> Egeesi ma kulodu niba nosee Moseseeye tei magoo ee dodolone niyo hasali biame mapoo tou teliso. Bei, niyo Moseseeye tei magoo ee dodolone holope kolo kweliso. Esino holope kolo koolame tei magoo hagee Moseseeye magele. Esino nibada amawe diayo ka magoo. <sup>23</sup> Esiga Moseseeye tei magoo gababiyaga hasali biame mapoo niyo holope kolo kweliso. Esino niyo kaseega ayo niyo hasali biame mapoo odoo paiye tekepo moodooga niyo amapoo ka komonowala?

<sup>24</sup> Esiga niyo wulo edebeeyo o suso goo moodoo ee ogoloso saga na midi. Esino tei goodee maga niyo o goo ka midi.”

### *Yesu tei Kelisowo?*

<sup>25</sup> Osoloso Yesuye to taka hagee duloso, Yelusalem odoo aboso dieso nediliyo egeesee takaso, “Odo hagee ibada wiligi odoo oso

---

**7:19:** Diye 7:53; Loum 2:21-24    **7:20:** Yon 8:48; 10:20    **7:22:** Lev 12:3; Gen 17:9-13    **7:23:** Yon 5:8-10, 16

wooloomalaigo dee takemeni osobeles? <sup>26</sup> Niba ege, yayo odoo susuga eyo howo woola eligime, odoo heeso yimapoo to hee koo takooso. Esiga ibada wiligi odoo oso goolee yo tei Keliso goolee malaiso. <sup>27</sup> Esiga Kelisoye siboga, mi yayo simi ee odoo heeso gooleedalaime. Esino mi Yesuye simi ee iba gooleedooso,” diso.

<sup>28</sup> Esemme Yesuye tei moso mapoo osee eligilone toso neligidi egeesee takaso, “O. Tei takoo. Mo goo sabolo osoloso ayo simi mi sabolo niba olo gooleedoodoo. Esino a mawo goolee maga sibilesa hamapoo koo badoso. Haye, a diye di odoo eyo goo ee tei, esino niba yo gooleedele. <sup>29</sup> Esino hebebe ayo yo ka gooleedoo. Bei, a yimaga simi osoloso yayo a nimapoo sibeye diso.”

<sup>30</sup> Esemme biame omapoo wiligi odoo diba goomogaso, Yesu omapoo talame. Esino odoo heeso yimapoo goo hee moodele. Bei, o biame tugodelega. <sup>31</sup> Esino odoo mooloogoodoo ee ma kulodu odoo aboso Yesu mapoo tei tolone egeesee takaso, “Odoo heeso sibilesa goo toowa opusomo di moodooga, goo toowa opusomo di Yesuye moodoo hagee dagadileime. Esiga Yesu hagee tei iyo hagee bamolo Keliso oso,” dee takaso.

<sup>32</sup> Esiga odoo mooloogoodoo oso Yesuwo goo maga taka ee Pelisi odoo oso duso. Esiga Pelisi odoo egee bia sabolo osoloso tei moso wiligi odoo tebisa oso tei moso gidebeli odoo diye diso, diayo dilesa Yesu talame.

<sup>33</sup> Yesuye see odoo mapoo takolone egeesee takaso, “A biame deiyepo hamapoo nibolo

hodobo badalaiso. Osoloso a diye di odoos mapoo see wedi dileiso. <sup>34</sup> Niyo a esileiso. Esino niyo a agalaime. Bei, ayo badalai mi omapoo sibilei niba tebileime,” diso.

<sup>35</sup> Esem Yu odooso dieso nediliyo dima kulodu egeese takaga meleeso, “Yo kamapoo duga iyo yo egelega ka pagalaiyo? Yo ibada odoos abo Guliki odooso debeli mi mapoo egee do mapoo dileso Guliki odoos mapoo Godeeyo to eligilame ka sabele. <sup>36</sup> Osoloso yayo imapoo takolone, iyo yo esileiso, esino iyo yo agalaime. Osoloso, yayo badalai mi omapoo sibilei iba tebileime, dee taka eyo bei ogoobo?” dee takemeleeso.

### *Gie badeli teneli howo*

<sup>37</sup> Esiga Waseme moso maga wo ne hamameedee biame egee goo toowa. Osoloso biame omapoo Yesuye toboloso to neligidi egeese takaso, “Odoos agayo howo ka na poogoosomo, yo amapoo howo nala sibeye dee.

<sup>38</sup> Osoloso Godeeyo to booka mapoo hogugu oso egeese takooso, ‘Edebeeyo amapoo tei toga, gie badeli teneli howo oso yima kuloduga gasibileiso.’” <sup>39</sup> Esiga Yesuye goo taka hagee, yimapoo tei too odoos mapoo Dio Tei tenelai goo ee takolone egeese ka taka. Esino epedee omapoo Dio Tei dimapoo tenele. Bei, Yesu yo Ama mapoo pelega.

<sup>40</sup> Esiga odoos mooloogoodoo ee ma kuloduga odoos aboso Yesuye taka to ee duloso egeese takaso, “Odoos hagee tei Godee maga to toloso

---

**7:34:** Yon 8:21; 13:36      **7:37:** Lev 23:36; Isa 55:1; Yon 4:14

**7:38:** Isa 58:11      **7:39:** Yon 16:7; 20:22; Diye 2:4      **7:40:** Yon

kokodo takomo sili odoo sibabeleso iyo bamelee osodoo,” dee takaga meleeso.

<sup>41</sup> Esemé odoo aboso egeesee takaso, “Yo Keliso,” dee takemeleeso. Esino aboso egeesee takaso, “Haye, yo Kelisonee. Bei, Keliso yo Gelili mi maga sibileime. <sup>42</sup> Bei, Godeeyo to booka mapoo hogugu oso egeesee takooso, ‘Keliso yo Deibidiyo amawe dio dima kuloduga sibileiso. Osoloso yo Deibidiye badebei mi Betilihem mapoo soomagalaiso,’ diso,” dee takaso.

<sup>43</sup> Egeeseelone Yesuwo goo maga odoo abo puloso debeiso. <sup>44</sup> Osoloso odoo aboso Yesu talame goomogaso. Esino odoo heeso yimapoo goo hee moodele.

*Yu odoo dia wiligi odoo tebisa oso  
tei tele poogoo*

<sup>45</sup> Esemé epedee omapoo tei moso gidebeli odoo oso see mosoowe wedi simi ogoloso, tei moso wiligi odoo tebisa sabolo, osoloso Pelisi odoo oso dimapoo egeesee takaso, “Bei kaseme niyo Yesu hamapoo ido sibilega ka poogoowo?” diso.

<sup>46</sup> Esemé diayo nei egeesee takaso, “Daga odoo heeso to Yesuye keli egeesee koo keli,” dee takaso.

<sup>47</sup> Esemé Pelisi odooso nei dimapoo egeesee takaso, “Niba noseé yayo eligi goo oso peegoo gilimado disomo? <sup>48</sup> Esino Pelisi odoo ima kulodu osoloso ibada wiligi odoo dima kulodu odoo heeso yimapoo tei too niyo egeisomo? Haye. <sup>49</sup> Esino odoo mooloogoodoo hagee ma kulodu,

---

**7:41:** Yon 1:46    **7:42:** Psa 89:3-4; Mica 5:2    **7:46:** Maka 1:22    **7:48:** Yon 12:42

odoo aboso Moseseeye tei magoo goo ee kibiya gooledelega tei tooso. Esiga diba Godeeyo kamana ma hemidu doso.”

<sup>50</sup> Esiga dima kulodu Pelisi odoo hee badebeiso, o hu Nikodimas. Daga yayo gesi Yesu agalame diso. Esiga yayo dimapoo egeesee takaso, <sup>51</sup> “Moseseeye tei magoo ee dodolone iyo daga odoo o goo midilega, wulo o tokenee eyo nei tenelai ee tekeponee,” diso.

<sup>52</sup> Esem Pelisi odoo abo sabolo osoloso wiligi odoo tebisa oso yimapoo egeesee takaso, “Nonosee Gelili odoowo? No Godeeyo to booka mapoo hogugu ee medee hesigaloso gooleede. Bei, Godeeyo toso egeesee takooso, Godee maga to toloso kokodo takomo sili odoo ee Gelili mi maga sibileime.”

[ <sup>53</sup> Osoloso to kesamelee omapoo koodobuloso odoo susuga dia mosopoo diyadeeso.

## 8

### *Kooka soboso adaba giso goo heli too Yesu mapoo ido simi*

<sup>1</sup> Esino Yesu Olipi mubi ma dokodoo palaso.  
<sup>2</sup> Osoloso gesikolodee Yesu yo tei moso mapoo wedi sibilesa badoboome, odoo susuga oso yimapoo simiso. Esem yayo omapoo badolone odoo eligimeleeso.

<sup>3</sup> Esem domo omapoo tei eligili odoo sabolo, osoloso Pelisi odoo oso kooka sobo heeso adaba giso goo heli too ee ogoloso, diayo yo ido sibilesa odoo howo woola tebediso. <sup>4</sup> Esem diayo Yesu

mapoo egeesee takaso, “Eligili odoo, kooka sobo hagoso adaba giso goo heli tomo sileeme ogoloso yo hamapoo ka ido simi. <sup>5</sup> Moseseeye tei magoo hogugu oso egeesee takaso, ‘Sobo heeso goo hageesee toga, yo yoso enigameleso wooloome,’ dee takooso. Esiga nayo imapoo takee, iyo sobo hamapoo goo kasee moodoolaisomo?” dee takaso. <sup>6</sup> Goo egeesi maga Yesuye to tokenee takooga ka midilame, diayo yo kukolo egeiso.\*

Esino Yesu miyomoo gauwuloso dee woluguso mi mapoo hogugu meleeso. <sup>7</sup> Esino diayo yimapoo osee woosa molome, Yesu yo toboloso dimapoo egeesee takaso, “Esiga nima kulodu odoo hee goo tokenee koo teli daga, odoo ogoso malalo sobo omapoo yoso ka enige,” diso. <sup>8</sup> Osoloso Yesu see tobu miyomoo gauwuloso dee woluguso mi mapoo hogugu meleeso.

<sup>9</sup> Esemе odoo susuga sobo egee ido simi oso Yesuwo to duloso obulone, daga adaga dimaga bei mooloogooloso hedebe du, hedebe du diso. Osoloso odoo susuga olo poogoo dulone, hedebe Yesu dio sobo egee dio omapoo poogooso. <sup>10</sup> Esemе Yesuye toboloso sobo mapoo egeesee takaso, “Sobo, no goweli odoo hamapoo debei ee

---

**8:5:** Lev 20:10; Deut 22:22-24      \* **8:6:** Biame omapoo Yu odoo oso tei magoo bakadio ee dodolone debeiso. Moseseeye tei magoo hogugu oso egeesee takaso, “Sobo heeso goo hageesee toga, yo yoso enigameleso wooloome,” dee takooso. Esino Loum gamalee eyo tei magoo hogugu oso egeesee takaso, “Goo ee tei.” Yesuye takolone, sobo egee wooloome, dee takooga, yayo Loum gamalee eyo tei magoo ee gababileiso. Esino yayo takolone, sobo egee na wooloome, dee takooga, yayo Moseseeye tei magoo ee gababileiso.

**8:7:** Deut 17:7

kasomo? Odo hee nee tokenee eyo nei namapoo dala tenelai hedebe badolo?” dee takaso.

<sup>11</sup> Esem sobo ogo nei Yesu mapoo egeese takaso, “Wiligi odo, haye, odo hee medoo,” diso.

Esem Yesuye yimapoo egeese takaso, “Anosee nee tokenee eyo nei ayo namapoo dala tenelaime. Esiga no di. Esino no tokenee see tobu na te,” dee takaso.]

*Yesu mipoo hageeyo gadeebugu*

<sup>12</sup> Esem Yesuye odo mooloogoodoo mapoo see egeese takaso, “Mipoo hageeyo gadeebugu ee aso. Esiga a dodomo sili odo yo neliga ma kulodu sileime. Esino yo gie badeli talai eligili gadeebugu ee talaiso,” dee takaso.

<sup>13</sup> Esem odo mooloogoodoo ee ma kuloduga Pelisi odo nei egeese takaso, “No wulo nee goo ee takomolo. Esiga nayo egee takoo goo ee iba tei koo toso,” dee takaso.

<sup>14</sup> Esem Yesuye nei dimapoo egeese takaso, “O. Tei takoo. A mo goo ee takooso. Esino ayo hagee takoo tei goo taka. Bei, ayo simi mi ee a gooleedoo. Osoloso ayo diles badalai mi onosee a gooleedoo. Esino ayo simi mi sabolo, osoloso ayo diles badalai mi ee, niba gooleedele.

<sup>15</sup> Esiga mi odo dia goo ee dodolone, niyo emegei dia goo ee midiliso. Esino ayo emegei dia goo ee koo midili. <sup>16</sup> Esino ayo emegei dia goo midilei gooleega, ayo medee tei goo maga dia goo midileiso. Bei, ayo mobusomo koo midili.

Esino mo Ma a diye di sabolo goo ka midili. <sup>17</sup> Esiga Moseseeye tei magoo hogugu oso egeesee takooso, ‘Goo hedebe mapoo odoo bakadio oso to hedebe onosee takooga, diayo egee takoo ee tei goo takooso,’ deliso. <sup>18</sup> Esiga anosee tei magoo egee dodolone mawo nediliyo mo goo maga tei goo takooso. Osoloso mo Ma a diye di oso mo goo maga tei goo takeliso.”

<sup>19</sup> Esem Pelisi odooso nei yimapoo egeesee takaso, “Nama kasomo?” diso. Esino Yesuye dimapoo egeesee takaso, “Mo Ma sabolo osoloso a, niba gooleedele. Niba a gooleedoo diepi, mo Ma nosee niba gooleedeliyo,” dee takaso.

<sup>20</sup> Yesuye tei moso ma kulodu emegei di molee tenee mageli koola omapoo tobodulone, goo susuga hagee eligimeleeso. Esino odoo heeso yo tele. Bei, o biame tugodelega.

### *Yesu eyo o goo taka*

<sup>21</sup> Esem Yesuye see dimapoo egeesee takaso, “Ayo peegoo duga, niyo a esileiso. Esino niba goo tokenee ma kulodu dobolone, nibada goo tokenee hapelega poogoloso wedileiso. Osoloso ayo badalai mi omapoo sibilei, niba tebileime,” dee takaso.

<sup>22</sup> Esino Yu odoo oso egeesee takaso, “Bei kasi maga Yesuye takolone, yayo badalai mi omapoo sibilei, iba tebileime, dee ka takayo? Iba gooleedele, Yesu eyo nediliyo wooloomalame ka sabele,” diso.



<sup>23</sup> Esemé Yesúye díá to dúlósó néi egeesee takaso, “Níba mípoo hamapoo debelí odoó. Esino a Kei mí má dokodooa simi. Esiga níba mí odoó. Esino a mí odoonee. <sup>24</sup> Goo egeesi mága ayo nímapoo takolone, níbada goo tokenee hapelega poogoloso wedileiso, dee ka taka. Bei, ayo mó goo\* mága taka mapoo níyo tei telega poogooga, níba níbada goo tokenee hapelega poogoloso wedileiso.”

<sup>25</sup> Esemé díayo néi egeesee takaso, “No odoó ogumo?” díso. Esemé Yesúye néi dímapoo egeesee takaso, “Ayo nímapoo elígí bei móoloo-gooloso abaga simino epedee hamapoo mó goo nímapoo olo elígíso. <sup>26</sup> Esiga ayo nímapoo tokenee odoó dee takalái goo bei mólósó. Esino a díye dí odoó oso takeme dú goo ono ayo odoó mapoo ka takómo síli. Bei, yo tei goo takelí.”

<sup>27</sup> Egeesi má kulodu Yesúye amamo goo takano, Yu odooso dúlósó medee kíbiya gooleedele. <sup>28</sup> Esemé Yesúye see dímapoo egeesee takaso, “Níyo Odoó Holo a tolósó dokodoo poudoga,\* omapoo níyo mó goo ee medee kíbiya gooleedaláiso. Osolósó ayo máwo goomoga goo koo tomo síli goo onosee níba gooleedaláiso. Bei, mó Máye amapoo taka goo hedebe ee ayo ka elígímo síli. <sup>29</sup> Esiga a díye dí odoó ee abolo hodobo badósó. Yo a koo poogoo díli. Bei, ayo

---

**8:23:** Yon 3:31 \* **8:24:** ayo mó goo - Godeeyo to Gulíkí odoó díá toso hogugu mapoo Yesúye takolone, yo aso, dee taka egee yo Keliso, Godeeye hesia dolone ka taka. **8:28:** Yon 3:14 \* **8:28:** a tolósó dokodoo poudoga - Yesúye taka hágeeyo bei ee, yo homo bulubo magoo má dokodoo yoguso enigalósó poudulósó tulugílei ee taka.

hedebe yo goomogalai goo ono tomo sili.” <sup>30</sup> Esiga Yesuye goo hagee takeme, odoo susuga yimapoo tei tooso.

*Tei goo oso odoo tokenee ma kuloduga peegoo gilimado dili*

<sup>31</sup> Eseme Yesuye Yu odoo yimapoo tei telaga odoo mapoo egeesee takaso, “Niyo ayo eligi goo hamapoo medee kibiya kookoodoloso dodomo silesiboga, niba tei mo hamamee dili odoo dalaiso. <sup>32</sup> Esiga niba tei goo ee gooleedalaiso. Osoloso tei goo oso niba nei mauwe tou teli goo maga peegoo gilimado dileiso.”

<sup>33</sup> Eseme diayo Yesu mapoo egeesee takaso, “Eibalahameeyo amawe dio ibaso. Esiga iba odoo heeso wiligi doloso badoboome, hegi goo ma kulodu nei mauwe o tou tolone ka debele. Bei kasi maga nayo imapoo takolone, ‘hegi goo ma kuloduga puo pagalaiso,’ dee ka takala?”

<sup>34</sup> Eseme Yesuye nei dimapoo egeesee takaso, “Ayo nimapoo taka. Edebeeyo goo tokenee tolone badoga, yo goo tokeneeso wiligi doloso ka badoso.

<sup>35</sup> Esiga nei mauwe tou teli odoo ee o wiligi odoo eyo soosoo sabolo kookaiyo osee koo badeli. Esino owoloye o soosoo sabolo kookaiyo osee badeliso. <sup>36</sup> Esiga Owolo ayo niba tokenee goo ma kuloduga puo poogooga, niba tokenee goo ma kuloduga tei olo puo pagalaiso. <sup>37</sup> A gooleedooso, niba Eibalahameeyo amawe dio. Esino niyo a wooloomalame ka goomogoso. Bei, ayo eligi goo ee nima kulodu malai, niba koo goomogoso.

<sup>38</sup> Mo Maye goo amapoo eligi ee ayo nimapoo ka

takomo siloso. Esino niba nosee nibada amaye takeme du goo ee tomo silesiboso.”

<sup>39</sup> Esemé diayo nei Yesu mapoo egeesee takaso, “Ibada ama ee Eibalaham,” diso.

Esemé Yesuye nei dimapoo egeesee takaso, “Niba tei Eibalahameeyo owolo dio diepi, niyo goo Eibalahameeye moodoo egeesee moodoolone debeli. <sup>40</sup> Esino tei goo Godeeye amapoo tenee ee ayo takomo sileeme, niyo a wooloomalame seeso. Esino Eibalaham goo egeesi moodele. <sup>41</sup> Esiga goo nibada amaye moodoo hedebe onosee niyo ka moodoomo siloso.”

Esemé diayo Yesu mapoo egeesee takaso, “Iba giba holonee. Esino ibada Amadee ee hedebe Godeeso,” dee takaso.

<sup>42</sup> Esemé Yesuye nei dimapoo egeesee takaso, “Godee tei nibada Ama diepi, a niyo diya goolee sabolo debeliyo. Bei, a Godee maga sibilesó hamapoo ka badoso. Yayo a diye diso. Esiga a mawo goolee sibilesó hamapoo koo badoso. <sup>43</sup> Niba kasi maga goo ayo taka ee duloso gooleedelega ka dabala? Niba goo ayo eligi ee dulei gowoolone ka seeso. <sup>44</sup> Esiga nibada ama ee Saiten. Esiga niyo o goo ogoloso yayo goomoga goo ee talame diya goomegeliso. Bei, bei mooloo-goo biame maga epedee hamapoo sibulone yo odoó wooloomali doloso badebeiso. Osoloso yo gamenee takeli odoó. Bei, yima kulodu tei goo takeli me. Osoloso yayo gamenee takooga, yayo wulo o goo ee takeli. Bei, yo gamenee takeli odoó. Osoloso gamenee takeli eyo bei yoso. <sup>45</sup> Esino ayo

nimapoo tei goo takeliso. Goo egeesi maga niyo mo to mapoo tei koo teli. <sup>46</sup> Esiga goo tokenee ayo moodoo ee niyo egeisomo? Haye, me. Ayo tei goo takomo silino, niyo kaseega mo to mapoo tei tele ka pagala? <sup>47</sup> Godeeyo odoosoo o to duloso omapoo mesimo silesibiliso. Esino niba Godeeyo odoonee. Esiga goo egeesi maga niba o to duloso omapoo mesilega ka poogooso.”

*Yesuye Eibalaham dagadi*

<sup>48</sup> Esemme Yu odooso nei Yesu mapoo egeesee takaso, “Iyo namapoo takolone no Samaliya odoosoo bo holo pala, dee takemeni ee tei taka.”

<sup>49</sup> Esemme Yesuye nei dimapoo egeesee takaso, “Mo kulodu bo holo koo badoso. Esino ayo mo Mayo hu dokodoo poudiliso. Esino niyo abolo takolone mo hu dokodoo poudilega pegeliso. <sup>50</sup> Esiga edebeeyo mo hu dokodoo poudalame ayo goo hagee koo tomo siloso. Esino odoosoo heeso diya goomogoso, edebeeyo mo hu dokodoo poudalame. Yo goo midili odoosoo. <sup>51</sup> Esiga ayo nimapoo tei goo taka. Odoosoo agayo mo to mapoo mesimo siloga, yo talaime.”

<sup>52</sup> Esemme Yu odooso Yesu mapoo egeesee takaso, “Iba epedee olo gooleedo, no tei nee kulodu bo holo bado. Bei, nayo daga egeesee takaso, ‘odoo agayo nee to mapoo mesimo siloga, yo talaime,’ diso. Esino ibada amawe Eibalaham dio osolosoo Godee maga to tolosoo kokodo takomo silesibili odoosoo diba olo wediasoo. <sup>53</sup> Esiga ibada amawe Eibalaham ee nayo dagadi doloso ka takala? Bei,

**8:46:** 2Kol 5:21; 1Pita 2:22  
3:21-22

**8:47:** 1Yon 4:6

**8:48:** Maka

**8:51:** Yon 5:24

ibada amawe Eibalaham olo taso, osoloso Godee maga to toloso kokodo takomo silesibili odo onosee olo wediaso. Egeesi ma kulodu nayo goolee no odo ogu gweliyo?” dee takaso.

<sup>54</sup> Esemé Yesuye nei dimapoo egeesee takaso, “Ayo goo tomo sili hagee mo hu dokodoo poudalame ka tomo sili diepi, goo hagee bei mauwe meliyo. Esino mo Maye mo hu dokodoo ka poudomoloso. Yo niyo takolone nibada Godee deliso. <sup>55</sup> Esino niba yo gooleede. Esino ayo yo ka gooleedoo. Esino ayo takolone, ‘a o goo gooleede,’ dee takeli diepi, a gamenee takeli odo niba egeesi masi badeliyo. Esino a o goo gooleedoo, osoloso a to yayo taka mapoo mesimo siliso. <sup>56</sup> Esiga nibada amawe Eibalaham goomogaso, ayo mipoo hamapoo simi ee agalame. Osoloso a olo sibume, yayo ogoloso diya goomogaso.”

<sup>57</sup> Esemé Yu odooso nei yimapoo egeesee takaso, “No dugo 50 tugodele. Esino nayo takolone, no Eibalaham olo egeiso, dee ka takala?”

<sup>58</sup> Esemé Yesuye nei dimapoo egeesee takaso, “Ayo tei goo nimapoo ka taka. Bei, Eibalaham soomagelega badoboome, daga a olo badebeiso.”

<sup>59</sup> Yesuye egeesee taka duloso diayo komonolone, yo toloso enigilame sino poogooso. Esemé Yesu mada wua moloso tei moso ma kuloduga peegoo diso.

## 9

*Yesuye odo howo neliga osee soomagoo ee*

*tekepo pa*

<sup>1</sup> Esiga Yesu yo dulone odoo hee egeiso. Odoo egee oweeye soomagolone howo neliga o egeesi soomagoona. <sup>2</sup> Esemé Yesu o hamamee dili odoo oso Yesu mapoo egeesee takaso, “Eligili odoo, odoo agamo goo tokenee oso yo howo neliga egeesee ka soomagoowo? O goo tokenee oso egeesee ka soomagoowo, o owee dio ama dio eyo goo tokenee maga howo neliga egeesee ka soomagoowo?” dee takaso.

<sup>3</sup> Esemé Yesuye egeesee takaso, “Odoo howo neliga hagee o goo tokenee oso egeesee ka sele, osoloso ama dio owee dio eyo goo tokenee oso egeesee ka sele. Esino odoo howo neliga soomagoo goo eyo bei ee egeesi moloso. Godeeye kitulugu goo ee yimaga woola yilige bigilame, yo howo neliga egeesee ka soomagoo. <sup>4</sup> Esiga biame osee mologa, iba odoo a diye di eyo tou ee tomo. Esino gesi olo siboga, odoo heeso tou hee talai tebileime. <sup>5</sup> Esiga ayo mipoo hamapoo osee hagee bado oso mipoo hamapoo keme masi gadeebugu ka moloso.”

<sup>6</sup> Yesu to hagee takoloso mi mapoo magawo pagamagoloso, deeso deeseegoloso omapoo beesee doloso odoo howo neliga eyo howo mapoo hediso. <sup>7</sup> Osoloso odoo omapoo egeesee takaso, “No Sailowam howo ou mapoo nee howo hapalame di,” diso. Esiga Sailowam hu eyo bei ee diye dolone takeli. Esemé odoo egee dilesó o howo hapoome tekepo paso. Esemé yo see wedi sibulone medee ogomo simiso.

---

**9:2:** Ezek 18:20; Luka 13:2, 4    **9:3:** Yon 11:4    **9:5:** Mat 5:14; Yon 8:12    **9:6:** Maka 8:23

<sup>8</sup> Egeesi ma kulodu odoo koola mapoo debeli sabolo osoloso odoo aboso yo daga eli domopoo bi howolone badoboome egei oso egeesee takaso, “Odoo hagee eli palaga bi howolone badoboomeni osobebe,” diso.

<sup>9</sup> Esememe odoo aboso egeesee takaso, “O. Odoo hedebe ogoso,” dee takemeleeso. Esino odoo aboso egeesee takaso, “Haye, odoo ogosonee, odoo hee yo masi molodoo,” dee takemeleeso. Esememe odoo eyo egeesee takaso, “Odoo egee tei aso,” dee takemeleeso.

<sup>10</sup> Esememe diayo yimapoo egeesee takaso, “Nee howo kaseme tekepo ka payo?” diso.

<sup>11</sup> Esememe yayo egeesee takaso, “Edebeeyo takolone Yesu deli oso mi mapoo magawo pagamagoloso, deeso deeseegoloso omapoo beesee doloso mo howo mapoo basago hediloso amapoo egeesee taka, a Sailowam howo ou mapoo mo howo hapalame diyena. Esememe a dileso mo howo keesee hapoono tekepo ka poowa,” diso.

<sup>12</sup> Esememe diayo yimapoo egeesee takaso, “Odoo egee kasomo?” Esememe yayo dimapoo egeesee takaso, “A gooleedele,” dee takaso.

*Pelisi odooso odoo howo neliga tekepo pa mapoo woosa*

<sup>13-14</sup> Yesuye odoo howo neliga tekepo pa hagee, Yu odooso hasali biame mapoo tekepo ka pa. Esiga odoo aboso odoo howo neliga Yesuye tekepo pa ee Pelisi odoo mapoo ido diso. <sup>15</sup> Esememe Pelisi odooso yimapoo egeesee takaso, “Nee howo kaseme tekepo ka payo?” diso. Esememe nei yayo dimapoo egeesee takaso, “Yesuye basago

beesee doloso mo howo mapoo hedime, mo howo howomoo keesee hapoono, see tekepo ka pa,” dee takaso.

<sup>16</sup> Egeesee taka duloso Pelisi odoo aboso egeesee takaso, “Yesu hagee Godee maga sibile. Bei, yo Godee maga simi diepi, ibada hasali biame mapoo tou tolone tei magoo ee gababile pegeliyo,” diso.

Esino odoo aboso egeesee takaso, “Kasee maga goo tokenee teli odoo oso goo toowa opusomo di hageesee ka moodoomo silosomo?” dee takemeleeso. Goo egeesi maga Pelisi odooso Yesuwo goo maga dieso dima kulodu domo pi meleeso.

<sup>17</sup> Osoloso Pelisi odooso odoo howo neliga tekepo pa mapoo see tobu egeesee woosaso, “Odoos nee howo tekepo pa ee odoo ogoo gooleesomo?” diso. Esemee odoo ogoo nei egeesee takaso, “Ayo goolee, yo Godee maga to tolosoko kodo takomo sili odoo gooleeso,” dee takaso.

<sup>18</sup> Esino odoo hagee daga tei howo noluguloso badebei goo omapoo Yu odoo dia wiligi odoo diba tei dele. Esiga tei goo beleso gooleedalame, diayo owee dio ama dio idooso. <sup>19</sup> Osoloso diba olo sibileso tebisamolome, wiligi odooso dimapoo egeesee takaso, “Niyo takolone, nowolo howo neliga osee soomagoogo, dee takemeni ee hagosomo? Esiga kasi maga epedee o howo olo tekepo poloso ka badosomo?” dee takaso.

<sup>20</sup> Esemee owee dio ama dio oso nei egeesee takaso, “O. Hagee tei ibada owolo howo neliga osee soomagoo oso, goo ee iba gooleedooso.



<sup>21</sup> Esino o howo kasee tekepo payo? Iba gooleedele. Osoloso odoo yo tekepo pa onosee, iba gooleedele. Esiga niso ibada owolo mapoo woosalo ege. Bei, yo olo kauwudooga, yayo o goo ee nimapoo takalai teiba,” dee takaso.

<sup>22</sup> Diayo dia wiligi odoo tebisa ogoloso obulone wulo dimapoo to hageesee ka taka. Bei, Yu odoo dia wiligi odoo oso goomoga goo hageesee olo magooso, “Edebeeyo takolone Yesu ee Keliso dee takooga, yo Yu odoo dia howo gisili moso ma kuloduga hu taloso peegoo magoo damalaiso,” dee takaso. <sup>23</sup> Goo egeesi maga owee dio ama dio oso takolone, “Yo olo kauwudooga, yayo o goo ee nimapoo takalai teiba,” dee ka taka.

<sup>24</sup> Esiga Yu odoo dia wiligi odoo oso see tobu odoo howo neliga tekepo pa ee idoloso yimapoo egeesee takaso, “Godeeyo howo woola nayo imapoo tei goo takee. Bei, odoo no tekepo pa egee goo tokenee teli odoo, iba gooleedoo.”

<sup>25</sup> Esem e odoo ogoso nei egeesee takaso, “A gooleedele, yo goo tokenee teli odoo bele, o, goo tekepo teli odoowo. Egeesi ma kulodu goo hagee a gooleedoo, a daga howo neliga badebeiso. Esino epedee hamapoo mo howo olo tekepo poloso see ka ogomo siloso.”

<sup>26</sup> Esem e diayo nei yimapoo egeesee takaso, “Odo hagosu namapoo kasee moodoome, nee howo see tekepo ka payo?” dee takaso.

<sup>27</sup> Esem e odoo ogoso nei egeesee takaso, “Ayo nimapoo goo susuga olo takaso. Esino niyo mo to medee dule. Esiga niyo bei kasalame goo egee see dulame ka sala? Esiga niba nosee yayo

di hamamee dilei goomogolone ka sala?” dee takaso.

<sup>28</sup> Esemе diayo yo manolone yimapoo egeesee takaso, “No o hamamee dili odoо. Esino iba Moseseeyo hamamee dili odoо. <sup>29</sup> Bei, Godeeye Moses mapoo to taka ee, iba gooleedooso. Esino odoо no tekepo pa ee, iba gooleedele.”

<sup>30</sup> Esemе odoо ogoѕo nei egeesee takaso, “Goo hagee kaseeyo? Yayo mo howo tekepo paso. Esino niba o goo gooleedelega ka dosomo? <sup>31</sup> Bei, iba gooleedoo, Godee yo goo tokenee teli odoо eyo to koo duli. Esino yayo o to mapoo mesiloso yayo goomoga goo tomo silesibili odoо eyo to ee duli.

<sup>32</sup> Esiga mipoo hagee bei mooloogoo maga simino epedee hamapoo, odoо heeso odoо howo neliga soomagoo ee tekepo paso dee taka goo ee iba dule.

<sup>33</sup> Esino Yesuye mo howo tekepo ka pa. Esiga yo Godee maga sibile diepi, yayo goo hee moodoolai tebile pegeliyo.”

<sup>34</sup> Esemе diayo gowoolone nei yimapoo egeesee takaso, “No gie daga soomagoo biame maga simino epedee hamapoo, no goo tokenee teli odoо doloso badebeiso. Esiga nayo kasalame imapoo goo eligilame ka sala?” dee takaso. Esemе diayo yo toloso howo gisili moso ma kuloduga peegoo ido diso.

### *Diwo howo seme*

<sup>35</sup> Esino Yu odoо dia wiligi odoо tebisa oso odoо howo neliga tekepo pa ee howo gisili moso maga peegoo ido di goo ee Yesu yo duso. Esiga yayo

odoo egee ogoloso yimapoo egeesee takaso, “No Odoo Holo mapoo tei tosomo?” dee takaso.

<sup>36</sup> Esem e odoo ogoso nei egeesee takaso, “Odoo Holo ee odoo ogumo? Amapoo takee, eseega ayo yimapoo tei ka talaiya,” dee takaso.

<sup>37</sup> Esem e Yesuye yimapoo egeesee takaso, “No yo olo egeiso. Esiga yayo epedee nobolo to egee komoloso,” diso.

<sup>38</sup> Esem e odoo ogoso nei egeesee takaso, “Lodee, a namapoo tei toso.” Osoloso yo gasuwoloso badolone Yesuwo hu dokodoo poudooso.

<sup>39</sup> Esem e Yesuye egeesee takaso, “Ayo mipoo hamapoo goo midilame simiso. Goo ee odoo howo neliga oso see medee agalame, osoloso odoo howo tekepo ee see howo neligalame,” dee takaso.

<sup>40</sup> Esem e Pelisi odoo abo koola omapoo tebisamelee oso Yesuye to egeesee taka ee duloso yimapoo egeesee takaso, “Nayo goolee, iba howo neliga goolone, egeesee ka takala?” dee takaso.

<sup>41</sup> Esem e Yesuye nei dimapoo egeesee takaso, “Niba howo neliga odoo diepi, niba goo tokenee teli odoo dele pegeliyo. Esino niyo takolone, niba howo neliga odoonee dee egee takoo oso niba goo tokenee teli odoo doloso osee ka doso.”

## 10

*Sipi be bali odoo eyo goo maga wudu taka*

<sup>1</sup> Yesuye see egeesee takaso, “Ayo nimapoo taka. Edebeeyo sipi be beele ma kulodu osulu maga gadilega, see eli hee maga sibilesu kulodu

gaduga, yo heli teli odooso. <sup>2</sup> Esino osulu maga gadili odoos ee tei sipi be bali odoos oso. <sup>3</sup> Esiga osulu gibadeli odoos oso osulu yadeliso, sipi be bali odoos oso kulodu gadilame. Osoloso sipi beso dia bali odoos eyo to duliso. Osoloso dia bali odoos dia hu hesigaloso, beele ma kuloduga peegoo gilimado diliso. <sup>4</sup> Osoloso yayo o sipi be susuga peegoo gilimado dileso, daga yayo malalo duga, diba yima hamamee diliso. Bei, diba o to gooleedooga. <sup>5</sup> Esino diba odoos heeso di hamamee koo dili. Esino ee ma kulodu odoos heeso diba sibilame haga, diayo yimaga kukulo dileiso. Bei, diba odoos egeeyo to gooleedelega.”

<sup>6</sup> Yesuye wudu takolone odoos mapoo hageesee eligiso. Esino wudu taka goo eyo bei ee diba medee kibiya gooleedele.

### *Yesu yo osulu*

<sup>7</sup> Osoloso Yesuye dimapoo see egeesee takaso, “Ayo nimapoo taka. Sipi be beele eyo osulu ee aso.\* <sup>8</sup> Esino a sibilega badoboome, odoos susuga daga malalo sibadee egee bia ee heli teli odoos. Esiga sipi beso dibada to dulosos mesile. <sup>9</sup> Osulu aso. Edebeeyo amaga gaduga, yo Godeeye wiligi doloso badeli goo mapoo gadilesos, kookaiyo badobosos gie badeli talaisos. Osoloso yo siloga, Yesuye medee bamalaisos. <sup>10</sup> Esiga heli teli odoos ee wulo heli talame, osoloso odoos wooloomalame, osoloso tokenee palame ka sibili. Esino ayo simi hagee, niyo gie badeli tolosos, goo tekepo susuga ee tolone dabalame ka simi.”

---

\* **10:7:** Edebeeyo Godeeye wiligi doloso badeli goo mapoo gadili ee Yesu maga ka gadili. **10:8:** Jer 23:1-2; Ezek 34:2-3

*Yesu sipi be medee bali odo*

<sup>11</sup> “Esiga sipi be medee bali odo ee aso. Egeesi ma kulodu sipi be medee bali odo oso o sipi be ee gooloogalame o gie badeli teli mapoo mageliso.

<sup>12</sup> Esino nei talame tou teli odo oso sipi be medee belega pegeliso. Bei, yo sipi be bali odoonee, osoloso sipi be hagee tei onee. Esiga dobu so simi ogoloso sipi be omapoo poogoloso yo pulo diliso. Eseega dobu soso sibilesi sipi be abo wooloomaga, abo kukulo diliso. <sup>13</sup> Bei, nei talame tou teli odo oso sipi be medee goolega, wulo pulo diliso.

<sup>14-15</sup> Esiga sipi be medee bali odo ee aso. Egeesi ma kulodu mo Maye mo goo ee gooleedoloso ka badoso. Osoloso ayo mo Mayo goo onosee gooleedoloso ka badoso. Goo egeesi masi mo sipi beso a gooleedoloso ka doso, osoloso ayo diba gooleedoloso ka badoso. Esiga mo sipi be ee gooloogalame ayo mo gie badeli teli mapoo magalaiso. <sup>16</sup> Osoloso mo sipi be abo\* dono, diba mooloogoodoo hagee ma kulodu mauwe. Esiga a goomogoso, diba nosee gilimado sibilame. Osoloso diayo mo to duleiso. Osoloso diba soosoo hedebe doloso doga, bali odo hedebe so bamalaiso.

<sup>17</sup> Esiga mo Maye a diya gweliso. Bei, ayo mo gie badeli ee teli mapoo magalaiso, osoloso see ka talame. <sup>18</sup> Esiga odo heeso mo gie badeli ee amaga peedee dalaime. Esino mawo

---

**10:11:** Psa 23:1; Yili 7:17    **10:12:** Diye 20:29    **10:14-15:** Mat 11:27; 1Yon 3:16    **10:16:** Isa 56:8; Ezek 34:23    \* **10:16:** sipi be abo - odo hagee Yu odoonee ee takooso. Osoloso mooloogoodoo hagee Yu odo ee takooso.    **10:17:** Pil 2:8-9

goomoga goo ee dodolone, ayo mo gie badeli ee wulo wulayo tenelaiso. Esiga ee ma kulodu, ayo mo gie badeli ee odoo halo teli mapoo magalalai amapoo kitulugu moloso, osoloso see peedee dalai amapoo kitulugu moloso. Bei, goo hagee mo Maye ayo moodoolame amapoo kitulugu sabolo olo takaso.”

<sup>19</sup> Esememe Yu odooso Yesuwo to duloso dieso dima kulodu toso agadigilone abo piso. <sup>20</sup> Egeeseelone odoo aboso egeesee takaso, “Yo bo holo peleso badolone ka halaboomo silo. Esiga o to na dui,” dee takaga meleeso.

<sup>21</sup> Esino odoo aboso egeesee takaso, “Odo bo holo pala oso goo tekepo hageesi kasee takomo sileiyo? Osoloso bo holoso odoo howo neliga tekepo palai teibayo?” dee takaga meleeso.

*Yu odooso Yesu mapoo  
tei tele poogoo*

<sup>22</sup> Esiga wau biame mapoo Yelusalem mi mapoo Yu odooso dia tei moso osulu ya ee gooleebugulone wo neso.\* <sup>23</sup> Osoloso wo ne biame omapoo Yesuye tei moso tegei beelee ee ma kulodu Solomonowo hau mapoo sileeso. <sup>24</sup> Esememe Yu odooso yo ogoloso sibilesa tobolo sidiboloso yimapoo egeesee takaso, “Iba biame susuga nee goo mapoo diya goolone ka doso. Esiga nayo

\* **10:22:** Daga hoogoo Siliya biaso Yu odoo sabolo ha temeleso Yelusalem peedee buguso. Osoloso diayo tei moso mapoo be wooloso, siloso dia godee mapoo teneeso. Esiga tei moso ee Godeeyo howo woola tokenee paso. Osoloso see hamamee Yu odooso Siliya bia habuguloso Yelusalem see dieso peedee dooso. Osoloso see tobu tei moso ee Godeeyo dalame peegoo magoloso see osulu yaso.

imapoo woola takee, no tei Kelisowo?” dee takaso.

<sup>25</sup> Esemé Yesúye nei dimapoo egeesee takaso, “Ayo nimapoo olo takaso. Esino niyo mo to mapoo tei tele. Esiga goo toowa opusomo di ayo mo Mayo hu maga moodeli oso nimapoo mo goo ee eligiso. <sup>26</sup> Esino niyo tei koo toso. Bei, niba mo sipi benee. <sup>27</sup> Mo sipi beso mo to duliso. Osoloso a diba gooleedoo. Osoloso diayo ama hamamee dedeliso. <sup>28</sup> Osoloso ayo dimapoo kookaiyo badoboso gie badeli teneliso. Osoloso diba Godee maga pileime. Osoloso diba mo dee maga odoó heeso peedee dalaime. <sup>29</sup> Mo Maye mo sipi be hagee amapoo olo teneeso. Osoloso yayo kitulugu oso odoó susuga oso kitulugu ee dagadi. Esiga odoó heeso mo Mayo dee maga peedee dalai tebile. <sup>30</sup> A mo Ma sabolo hedebe.”

<sup>31</sup> Esemé Yu odooso Yesú enigilame yo see tobu misigaso. <sup>32</sup> Esemé Yesúye nei dimapoo egeesee takaso, “Mo Maye amapoo kitulugu teneme, ayo nibada howo woola goo tekepo moodoomo sileeso. Esino goo tekepo susuga ayo moodoo ee ma kulodu goo hee kaso tokenee daga, niyo a wooloomalame ka sala?” dee takaso.

<sup>33</sup> Esemé see Yu odoó dia wiligi odoó tebisa oso egeesee takaso, “Nayo goo tekepo moodoo maga iyo no wooloomalame koo seeso. Esino nayo Godeeyo goo maga to tokenee taka ee duloso no wooloomalame ka seeso. Bei, no wulo odoó wuluge, esino see nayo takolone, no Godee, dee takeliso.”

<sup>34</sup> Esemé Yesúye nei dimapoo egeesee takaso,

“Nibada tei magoo ee ma kulodu Godeeye egeesee takooso, ‘Niba godee,’ deliso. <sup>35</sup> Egeesi ma kulodu iba gooleedoo, Godeeyo to booka mapoo hogugu oso tei goo takooso. Esiga Godeeye o to mapoo tei teli odoo mapoo takolone, diba godee, deliso. <sup>36</sup> Esiga ayo takolone, a Godeeyo Owolo doloso ka takano, bei kasi maga niyo takolone, ayo Godeeyo goo maga to tokenee takoo, dee ka takala? Bei, mo Maye a hesialoso mipoo hamapoo sibeye diso.

<sup>37</sup> Esiga ayo mo Maye goomoga goo ee mood-elega badoga, niyo to ayo taka mapoo tei tele ka peegee. <sup>38</sup> Esino niyo to ayo taka mapoo tei tele poogolone, wulo goo ayo hagee tomo silo ee ogoloso to ayo taka mapoo tei ka te. Bei, niyo egeesee seega, mo Ma asalo hedebe doloso hagee do goo ee niba gooleedalaiso.”

<sup>39</sup> Esemе odoo susuga oso to hagee duloso Yesu see talame seme, Yesu dimaga peegoo diso.

<sup>40</sup> Osoloso Yesu see Yoden howo dalo sooweleso, Yoneeye daga odoo howo olugumelee mi omapoo badebeiso. <sup>41</sup> Esemе odoo susuga oso yimapoo sibilesо egeesee takaso, “Yoneeye goo toowa opusomo di moodoomo sile. Esino yayo Yesuwo goo maga taka goo susuga ee tei goodoo,” dee takaga meleeso. <sup>42</sup> Esemе odoo susuga omapoo debeli oso Yesu mapoo tei tooso.

## 11

### *Lasaleseeeye ta*

<sup>1</sup> Betani mi mapoo badeli odoo hee paiye



badebeiso, o hu Lasales. Osoloso omoo Meli dio Mata dio onosee Betani mi omapoo debeli. <sup>2</sup> Meli hagoso hamamee Lodeeyo homo mapoo mopoodoosoo sooloso o wuduso talaiso. <sup>3</sup> Esiga Meli dio Mata dio odoo hee mapoo dia to takaso, yayo dilesa Yesu mapoo takalame. Esemе yayo dilesa Yesu mapoo egeesee takaso, “Lodee, odoo no gooma ee paiyega badoso,” dee takaso.

<sup>4</sup> Esino Yesu to hagee duloso egeesee takaso, “Paiye ogooso yo talaime. Esiga goo hagoso peledabalaiso, edebeeyo goo hagee ogoloso Godeeye kitulugu sabolo osoloso Owolo ayo kitulugu ee gooleedalame,” dee takaso. <sup>5</sup> Esiga ee ma kulodu Yesuye Mata dio, omolo Meli dio, osoloso Lasales diya gweliso. <sup>6</sup> Esino yo Lasalesee ye paiye goo ee duloso saga dilega, biame bakadio omapoo badebeiso.

<sup>7</sup> Biame bakadio poogoloso Yesuye o hamamee dili odoo mapoo egeesee takaso, “Iba see Yudiya mi mapoo wedi dimo,” dee takaso.

<sup>8</sup> Esemе o hamamee dili odoo oso yimapoo egeesee takaso, “Eligili odoo, no omapoo bado-boome, Yu odooso no yoso wooloomalame sino poogooso. Esiga no see kasalame mi omapoo wedi dilame ka sala?” dee takaso.

<sup>9</sup> Esemе Yesuye egeesee takaso, “Biame hedebe ma kulodu osoko howo 12 moloso. Esiga edebeeyo biame siloga, yo takodee bigileime. Bei, yo

gadeebugu ma kulodu siloga.\* <sup>10</sup> Esino edebeeyo gesi siloga, yo takodee bigileiso. Bei, yimapoo gadeebugu mega.”

<sup>11</sup> Yesuye to hagee takoloso see egeesee takaso, “Ibada odoo Lasales yo tiamoloso. Esiga ayo yo tidibigileiso,” dee takaso.

<sup>12</sup> Esemee o hamamee dili odoo oso egeesee takaso, “Lodee, yo wulo tiaga, see weidileiso,” dee takaso.

<sup>13</sup> Esino Yesuye taka goo ee ma kulodu Lasales yo tei olo ta neme ka taka. Esino Yesu o hamamee dili odoo oso goolee Lasales wulo tiamolo gooleeso.

<sup>14</sup> Esemee Yesuye dimapoo woola egeesee takaso, “Lasales olo ta moloso. <sup>15</sup> Esiga a goomogoso, ayo niba halo yo agalame dile. Esino ayo yimapoo goo moodoo ee niso ogoloso amapoo tei talaiso. Esiga yimapoo dimo.”

<sup>16</sup> Esemee Tomas, o hu hee Didimas deli, oso Yesu o hamamee dili odoo abo mapoo egeesee takaso, “Iba nosee Yudiya mi mapoo dimo, Yesu bolo hodobo talame,” dee takaso.

*Odoo wedia hogogaduloso see  
gie badeli teneli ee Yesu yoso*

<sup>17</sup> Yesuye sibileso Betani mi mapoo peledoboloso egeino, Lasales bi ma kulodu tamelee biame bakadio bakadio di poogoloso molome egeiso. <sup>18</sup> Betani mi hagee Yelusalem mi maga

---

\* **11:9:** To hageeyo bei ee egeesi moloso. Yesu yo gadeebugu. Yayoo o hamamee dili odoo dibolo hodobo egee bado goo maga, diayo goo kodilei bei mauwe. Bei, Godeeye goomoga goo ee talame yayoo biame teiba dimapoo teneeso. **11:16:** Maka 14:31

haga hoogoonee, wulo kilomita bakadio hedebe di egeesi. <sup>19</sup> Osoloso Meli dio Mata dio omolo Lasalesee ye ta maga goohele sabolo doboome, Yu odoo aboso dibolo hodobo dabalame, Yelusalem maga sibadeeso.

<sup>20</sup> Esemé Mataye Yesuye simi goo ee duloso, yo eli domopoo tugodalame diso. Esino Meli yo mosopoo badebeiso. <sup>21</sup> Esemé Mataye Yesu tugodoloso yimapoo egeese takaso, “Lodee, no hamapoo badebei diepi, molo telega pegeliyo. <sup>22</sup> Esino a gooleedoo, goo hagee ma kulodu, nayo ogoo goo ee Godee mapoo woosaga, Godeeye goo egee namapoo tenelaiso,” dee takaso.

<sup>23</sup> Esemé Yesuye yimapoo egeese takaso, “Nomolo see hogabileiso,” diso.

<sup>24</sup> Esemé Mataye nei yimapoo egeese takaso, “A gooleedoo, yo biame hamameedee mapoo odoo wedia oso hogogabuoga, yinosee omapoo hogadileiso,” dee takaso.

<sup>25</sup> Esemé Yesuye yimapoo egeese takaso, “Odoowedia maga hogogaduloso see gie badeli teneli ee aso. Esiga edebeeyo amapoo tei toloso badoboso toga, yo kookaiyo gie badalaiso. <sup>26</sup> Osoloso edebeeyo amapoo tei toga, o dio ta-laime, esino yo kookaiyo gie badalaiso. Esiga Mata no goo hamapoo tei tosomo?”

<sup>27</sup> Esemé Mataye nei yimapoo egeese takaso, “O, Lodee, a goo hamapoo tei toso. Bei, no Keliso, Godeeyo Owolo, mipoo hamapoo sibileigo dee takemelee ee noso,” dee takaso.

<sup>28</sup> Mataye to hagee taka koodobuloso see wedi dileso omolo Meli mapoo mada egeesee takaso, “Eligili odoo olo sibilesa bado. Esiga yayo no agalai goomogona,” dee takaso. <sup>29</sup> Meli to hagee duloso toboloso Yesu agalame saga diso.

<sup>30</sup> Yesu mosopoo pelededelega, Mataye dileso yo tugodoo mi omapoo osee badebeiso. <sup>31</sup> Esem Yu odooso Meli pidilone diba yibolo hodobo mosopoo debeiso. Esino yayo saga toboloso di ogoloso yima hamamee diso. Diayo goolee Meli bi mapoo dileso pisilei gooleeso.

<sup>32</sup> Esino Meliye Yesuye badebei mapoo dileso o homo beiyopoo gauwuloso badolone egeesee takaso, “Lodee, no hamapoo badebei diepi, molo telega pegeliyo,” dee takaso.

<sup>33</sup> Yesuye Meli dio osoloso Yu odoo abo Melibolo sibadee oso hodobo pupusiga molome ogoloso su hegi sabolo badolone diya gooheselo. <sup>34</sup> Osoloso yayo dimapoo egeesee takaso, “Niyo yo kapoo magooba?” diso. Esem diayo nei egeesee takaso, “Lodee, no agalame ibolo hodobo sibe,” dee takaso.

<sup>35</sup> Esem Yesu yinosee piaso.

<sup>36</sup> Esem Yu odooso goo egee ogoloso egeesee takaso, “Yesuye Lasales diya gweli goo ee niso ege,” diso.

<sup>37</sup> Esino odoo aboso egeesee takaso, “Odoo hagoso odoo howo neliga ee tekepo paso. Esiga bei kasi maga yayo Lasales telega pagalame pidile ka poogoowo?” dee takaso.

*Yesuye Lasales ta maga see hogadi*

<sup>38</sup> Yesu su hegi osee molone, Lasales magoo wulu ou miyopoo simiso. Osoloso wulu ou ee yo toowaso kisiso.

<sup>39</sup> Osoloso Yesuye egeesee takaso, “Yo egee peegoo bidibigi,” diso.

Eseme Lasaleseeyo omoo Mataye egeesee takaso, “Lodee, o kou ee wulu ma kulodu melee biame bakadio bakadio di egeesi poogooga, olo hune koko,” dee takaso.

<sup>40</sup> Eseme Yesuye nei yimapoo egeesee takaso, “Ayo namapoo daga takolone egeesee takaso, nayo tei toga, no Godeeye kitulugu ee agalaiso,” diso.

<sup>41</sup> Eseme odoo aboso yo toowa wulu ou kisi ee peegoo bidibuguso. Eseme Yesuye dokodoo bolone egeesee takaso, “Ma, ayo namapoo goomoga to ka taka. Bei, ayo namapoo taka goo ee nayo duga. <sup>42</sup> Osoloso a gooleedoo, nayo biame susuga ayo namapoo taka goo ee nayo duliso. Esino odoo hamapoo egee tebisamolo oso nayo a diye di goo mapoo tei talame, goo hagee ayo ka taka.”

<sup>43</sup> Yesuye egeesee takoloso to neligidi egeesee takaso, “Lasales, no wulu ma kuloduga peegoo gasibe,” dee takaso. <sup>44</sup> Eseme Lasales o dee sabolo, osoloso o homo bodo sabolo, osoloso o mudu ee dugo semeso tiegisa sabolo wulu ma kuloduga peegoo gasibilesa tobudume egeiso. Eseme Yesuye dimapoo egeesee takaso, “Dugo egee puobigi, osoloso yo diye dee,” dee takaso.

*Yesu wooloomalame eli esia  
(Mat 26:1-5; Maka 14:1-2; Luka 22:1-2)*

<sup>45</sup> Esiga Yu odoosusuga Meli agalame sibadee oso goo Yesuye moodoo ee ogoloso yimapoo tei tooso. <sup>46</sup> Esino odoos aboso dilesogoo Yesuye moodoo ee Pelisi odoomapoo takaso. <sup>47</sup> Esiga tei mosowiligi odootebisa saboloso osoloso Pelisi odoosoo Yu odoodia wiligi odoomooloogoodoo Sanhedelin deli ee gilimadoloso dimapoo egeesee takaso, “Iyo kasee selaisomo? Bei, odoohagoso goo toowamudu opusomodi bei moodoogamosiliso. <sup>48</sup> Iyo wulobaga, odoosusuga oso yimapoo teitalaiso. Osoloso Loum gamalee odoosoo ibada tei mosoeeguobuguloso ibada odootokenee palaiso,” dee takaso.

<sup>49</sup> Esemedimakulodu odoohetebadebeiso, o hu Kayapas. Dugomapoo yayo tei mosowiligi odootoboloso badolone, odoomooloogoodoo mapoo egeesee takaso, “Niba googoolee mauwe odoosoo. <sup>50</sup> Esiga niba koo gooleedolo? Odoohedebesoo odoosusuga ee halotalaitakepo. Egeeseega, Yu odoosusuga ibatokenee palaime,” diso.

<sup>51</sup> Esiga Kayapaseeye taka goohagee, wulo eyo goolee takele. Esino yayo dugomapoo tei mosowiligi odootoboloso badoboome, Yesuye Yu odoohalotalai gooe Godeeye yimapoo eligime, yayo egeesee ka taka. <sup>52</sup> Esino hedebe Yu odoohalotalaime. Esino Godeeyoo doomi opusomodi mapoo egeedo ee see hedebe dalame ka talai. <sup>53</sup> Esiga biame omaga bei mooloogoloso dulone Yu odoodia wiligi odootebisa oso Yesu wooloomalame eli esiameleeso.

---

**11:45:** Yon 7:31**11:46:** Luka 16:31**11:52:** Yon 10:16**11:53:** Yon 5:18

<sup>54</sup> Goo egeesi maga Yesu see Yu odoo dia howo woola koo sili. Esino yayo o hamamee dili odoo sabolo mi egee poogoloso, see miwe poogoo mi koola mapoo mi hee, Epelaim deli, mapoo dileso debeiso.

<sup>55</sup> Osoloso Godeeye Gababia wo nalai biame olo koola tooboome, Yu odoo dia mi pepuso maga Yelusalem mapoo palaso, Godeeyo howo woola diba medee mopoodoo doloso tekepo dabalame.\*

<sup>56</sup> Osoloso diayo Yelusalem mapoo dobolone Yesu esiamo silesibiso. Egeeseelone tei moso ma kulodu mooloogodoloso dieso nei woosa nei woosa demeleso, “Niyo kasee gooleedo? Yesu wo ne hamapoo sibileisomo?” dee takaga meleeso.

<sup>57</sup> Esino tei moso wiligi odoo tebisa sabolo osoloso Pelisi odoo oso to kitulugu sabolo odoo susuga mapoo egeese takaso, “Odo heeso Yesuye badebei egei daga, imapoo takee, egeeseega iyo dileso yo ka talaiya,” dee takaso.

## 12

*Meliye Yesuwo homo mapoo mopoodoo soo soo*

*(Mat 26:6-13; Maka 14:3-9)*

<sup>1</sup> Gababia wo nalai ee biame 6 malalo hoogoo molome, Yesu yo Lasalesee yo mi Betani mapoo see wedi diso. Lasales hagee daga Yesuye ta maga hogadi ee yoso. <sup>2</sup> Osoloso habe mi omapoo diayo

---

\* **11:55:** Biame omapoo Yu odoo diba Godeeyo howo woola subugo mauwe dabalame, dia adaga dia goo ee dodolone, dia su medee hapoloso gala wooloso, siloso Godee mapoo teneliso.

**12:1:** Yon 11:1, 43    **12:2:** Luka 10:40

Yesuwo nei toowa mopoodoo dooso. Osoloso Mataye nei piso. Osoloso Lasales yinosee ee ma kulodu dibolo hodobo dobolone Yesubolo nei nameleeso. <sup>3</sup> Esemé Meliye mopoodoo soo tekepo nad deli i salama soo lita botoloo gegelee egeesi toloso Yesuwo homo mapoo sooso. Osoloso o homo o wuduso taso. Esemé mopoodoo soo oso sisigage oso moso kulodu tiadooso. Mopoodoo soo tekepo hagee molee toowaso teli.

<sup>4</sup> Esino domo omapoo Yesu o hamamee dili odoos hee badebeiso, o hu ee Yudas-Iskaliyot. Odoos hagoso hamamee Yesu ha teli odoos mapoo tiasalaiso. Osoloso yayo egeesee takaso, <sup>5</sup> “Mopoodoo soo tekepo hagee molee ko\* 300 oso teli. Esino bei kasi maga mopoodoo soo tekepo hagee, iyo odoos mapoo teneloso nei molee toloso bi mauwe odoos mapoo tenele ka poogoowo?” dee takaso. <sup>6</sup> Esino Yudaseeye to hageesee taka egee, yo bi mauwe odoos ee sooloo dolone to hagee ka takele. Esino yo heli teli odooga to hageesee ka taka. Bei, yayo Yesu o hamamee dili odoos dia molee ee gibadolone abo mada heli temelee.

<sup>7</sup> Esemé Yesuye egeesee takaso, “Meliye goo egee moodoo ogoloso yimapoo goo hee na moodee. Bei, yayo goo egeesi moodoo egee a toga mi doosalai ee gooleebugulone ka moodoo. <sup>8</sup> Osoloso bi mauwe odoos oso biame susuga nibolo dabalaiso. Esino a biame susuga nibolo badalaime,” dee takaso.

---

**12:3:** Luka 7:37-38      \* **12:5:** molee ko hagee denaliyus deli ee, biame hedebe mapoo tou too eyo nei hedebe hageesee teliso.

**12:8:** Deut 15:11



*Wiligi odoo oso Lasales  
wooloomalame to mou*

<sup>9</sup> Esiga biame domo omapoo Yu odoo mooloo-goodoo toowa oso Yesuye Betani mi mapoo sibilesa badebei goo ee duloso Yesu agalame dulone, Lasales yinosee agalame diyadeeso. Bei, Yesuye yo ta maga see hogadiso. <sup>10</sup> Goo egeesi maga tei moso wiligi odoo tebisa oso Lasales onosee wooloomalame to mousa. <sup>11</sup> Bei, Lasales see hogadi eyo goo maga Yu odoo aboso dia wiligi odoo ee poogoloso see Yesu mapoo tei tooso.

*Yesuye Yelusalem mi mapoo gadi*

*(Mat 21:1-11; Maka 11:1-11; Luka 19:28-40)*

<sup>12</sup> Osoloso biame hee mapoo odoo mooloo-goodoo toowa Yelusalem mapoo Gababia wo ne mapoo di odoo oso Yesu sibosogo di goo ee duso. <sup>13</sup> Osoloso diayo weiyo kookoloso Yesu tugodalame dulone to neligidi egeese takomo diyadeeso,

“Iba Godeeyo hu dokodoo poudoomo.

Odoo Godeeyo hu maga kitulugu sabolo egee sibo, yo wiligi odoo Godeeye pidiye dee.

Osoloso Isalael odoo dia wiligi odoo, yo Godeeye pidiye dee,” dee takomo diyadeeso.

<sup>14</sup> Biame domo omapoo Yesuye donki be gie kauwa ogoloso o wagi ma dokodoo biaso. Goo peledaba hagee Godeeyo to booka mapoo hogugu sabolo tebilame ka seeso. Bei, Godeeyo toso egeesee takooso,

<sup>15</sup> “Yelusalem odoo, niba haga na ebi.

Nibada wiligi odoo donki be pe eyo wagi ma dokodoo buloso siboso,” diso.

<sup>16</sup> Esino biame omapoo Yesuwo hamamee dili odoo oso goo hagee medee kibiya gooleede. Esino Yesu ta maga hogaduloso hamamee goo susuga Yesu mapoo moodoo oso Godeeyo to booka mapoo hogugu sabolo tobume, goo ee ogoloso gooleedooso.

<sup>17</sup> Esiga Yesuye Lasales ta maga hogaduloso see wulu ou ma kuloduga peegoo gasibilame i goo ee egei odoo mooloogoodoo hagee biaso odoo abo mapoo takalame diyadeeso. <sup>18</sup> Esemee odoo susuga oso goo toowa opusomo di Yesuye moodoo ee duga, diba Yesu tugodalame diso. <sup>19</sup> Esemee Pelisi odooso dieso dima kulodu egeese takaso, “Niso ege. Iba kitulugu olo me poogoo. Bei, odoo susuga oso yima hamamee deedeeso,” dee takemeleeso.

*Yesuye eyo talai goo ee edidi taka*

<sup>20</sup> Osoloso Guliki odoo aboso odoo Yelusalem mapoo Gababia wo ne mapoo paladee sabolo palaso, Godeeyo hu dokodoo poudalame.

<sup>21</sup> Osoloso diba dileso Gelili mi ma kulodu mi pepooko Betesaida mapoo badeli odoo hee Pilipi mapoo egeese takaso, “Emegei, iba Yesu agalai goomogo,” dee takaso. <sup>22</sup> Esemee Pilipiye Endulu takala dileso obakadio Yesu takalame diso.

<sup>23</sup> Esemee Yesuye nei dimapoo egeese takaso, “Odo Holo ayo toowa doloso badalai biame ee olo siboso. <sup>24</sup> Esiga ayo nimapoo ka taka. Ede-beeyo ko mi mapoo segele poogooga, ko egee see

opusomo dalaime. Esino ko hedebe onosee osee malaiso. Esino ko mi mapoo sogoloso opusomo doloso pologa, bou dia gasibilesa kauwuloso ko okopolo palaiso.\* <sup>25</sup> Esiga edebeeyo o gie badeli ee eyo diya goodogoga, o gie badeli ee osugobalaiso. Esino edebeeyo mipoo hamapoo badolone o gie badeli goodogelega badoga, odo egee o gie badeli osugobalaime. Esino yo badoboso kookaiyo gie badeli talaiso. <sup>26</sup> Esiga edebeeyo mo tou talai goomogoga, yo a deede sibe. Eseega, yo ayo egee bado mi omapoo yayo abolo hodobo badalaiso. Esiga mo tou teli odo ee mo Maye o hu dokodoo poudileiso.

<sup>27</sup> Epedee hamapoo a su diya hegi moodoo. Esiga ayo mo Ma mapoo takolone, ‘Ma, dala amapoo egee sibo nayo peegoo magee,’ dee takalai tekepowa? Haya, tekeponee. Bei, a dala egee talame mipoo hamapoo ka simi. <sup>28</sup> Esiga Ma, nayo toowa doloso egee bado goo ee odo mapoo eligi.”

Eseme toso Kei mi ma dokodooga egeesee taka, “Ayo toowa doloso egee bado goo ee odo mapoo olo eligiso. Osoloso ayo dimapoo see eligileiso,” dee takaso. <sup>29</sup> Esino odo mooloogoodoo omapoo tebisamelee oso to hagee dulosoo egeesee takaso, “Kei woo,” diso. Osoloso odo aboso takolone, momaiyeso Yesu mapoo to takoo, dee takaso.

<sup>30</sup> Osoloso Yesuye see egeesee takaso, “To taka hagee a pidilame ka takele. Esino niba pidilame ka taka. <sup>31</sup> Esiga Godeeye mi odo dia goo midilei

---

\* **12:24:** Yesuye wudu taka hagee, eyo toloso see hogadilei goo sabolo, osoloso edebeeyo yimapoo tei talai goo maga ka taka.

**12:25:** Mat 16:25    **12:27:** Psa 6:3; 42:5; Mat 26:38

biame ee hagoso. Osoloso mipoo hageeyo wiligi odo Saiten ee Godeeye daga dileiso. <sup>32</sup> Esiga ede-beeyo a toloso mi hamaga dokodoo poudoga, \* ayo odo susuga amapoo gido sibileiso.” <sup>33</sup> Yesuye taka hagee, eyo talai goo ee kasee tomoba dolone ka taka.

<sup>34</sup> Esemee odo mooloogoodoo oso egeesee takaso, “Ibada tei magoo oso egeesee taka duliso, Keliso yo badoboso kookaiyo badalaiso, dee take-liso. Esino bei kasi maga nayo takolone, Odo Holo yo toloso mi hamaga dokodoo poudileiso, dee ka takeliyo? Osoloso Odo Holo hagee odo ogumo?” dee takemeleeso.

<sup>35</sup> Esemee Yesuye dimapoo egeesee takaso, “Gadeebugu oso biame deiyepo nibolo malaiso. Esiga gadeebugu nimapoo mologa, niba gadeebugu ee ma kulodu silesibe, neligaso niba gooloogeyaga. Egeesi ma kulodu niba neliga ma kulodu silesiboga, niba niso egee du eli ee medee ogoloso gooleedalaime. <sup>36</sup> Esiga gadeebugu nimapoo osee egee molo mapoo tei te. Niyo egeesee seega, niba gadeebugu eyo owolo dio dalaiso.” Yesu to hagee takoloso koodobuloso peegoo dileso dimaga mada wuaso.

*Yu odooso Yesu mapoo  
tei tele poogoo*

<sup>37</sup> Yesuye goo toowa opusomo di susuga odo howo woola moodoogaso. Esino edebeeyo

---

**12:32:** Yon 3:14 \* **12:32:** Yesuye taka hageeyo bei ee, yo homo bulubo magoo ma dokodoo yoguso enigaloso pouduloso tulugilei ee taka. **12:33:** Yon 19:6 **12:34:** Psa 110:4; Isa 9:7; Dan 7:14

**12:35:** Yon 8:12 **12:36:** Epe 5:8

yimapoo tei tele. <sup>38</sup> Esiga Godee maga to toloso kokodo takomo sili odo Aisayaye taka goo sabolo tebilame, goo hagoso peledabaso. Aisayaye egeesee takaso,

“Lodee, odo agayo iyo taka goo ee tei ka toba?

Osoloso Lodeeye kitulugu ee odo ogu bia dimapoo ka yilige buguba?” dee takaso.

<sup>39</sup> Esiga edebeeyo Yesu mapoo tei talai tebile. Bei, Aisayaye see egeesee takaso,

<sup>40</sup> “Godeeye odo susuga dia howo gooloogooso. Osoloso yayo diba goo goole pagalame moodooso, dia howoso kibiya egelega pagalame, osoloso diayo medee kibiya gooleedelega pagalame, osoloso see Godee mapoo wedi sibilesotekepo pelega pagalame.”

<sup>41</sup> Aisayaye Yesuye toowa doloso badeli goo ee ogoloso o goo maga egeesee ka taka.

<sup>42</sup> Esino odo abo sabolo osoloso Yu odo dia wiligi odo abo oso Yesu mapoo tei tooso. Esino diba Pelisi odoobolo obulone, diayo tei too goo ee woola yilige bigile. Bei, Pelisi odooso dia hu howo gisili moso ma kulodu magoo ee tabigiyaga.

<sup>43</sup> Osoloso diayo Godee maga goomoga talai haga goole poogoloso, hee odo maga goomoga talai ono diya gweliso.

<sup>44</sup> Esemee Yesuye to neligidi egeesee takaso, “Edebeeyo amapoo tei toga, yo hedebe amapoo tei koo toso. Esino a diye di odo omapoo noseetei toso. <sup>45</sup> Osoloso edebeeyo a ogoga, yo a

diye di odo onosee ogoso. <sup>46</sup> Esiga ayo mipoo hamapoo neliga ma kulodu keme masi poudo simiso. Egeesi ma kulodu edebeeyo amapoo tei toga, yo neliga ma kulodu osee badalaime.

<sup>47</sup> Esiga edebeeyo mo to duloso mesilega poo-googa, ayo o goo midileime. Bei, ayo mipoo hamapoo simi hagee, odo goo midilame ka sibile. Esino odo dia gie badeli ee pidilame ka simi. <sup>48</sup> Esino edebeeyo a gowoolone mo to telega poogooga, Godeeye goo midilei biame mapoo to ayo taka oso nei dia goo ee midileiso. <sup>49</sup> Bei, a mawo gooleeso to hagee ka takele. Esino mo Ma, a diye di oso to ayo takalai sabolo osoloso ayo kasee takalai goo ee, yayo amapoo takaga, ayo egeesee ka taka. <sup>50</sup> Esiga Godeeye taka to hagoso odo mapoo gie badeli tosibiliso. Goo egeesi maga mo Maye amapoo taka goo ee see nimapoo ka takomoloso.”

## 13

### *Yesuye o hamamee dili odo dia homo howo hapoo*

<sup>1</sup> Yu odooso Gababia wo nali biame olo koola tooboome, Yesu yo mipoo hagee poogoloso see Ama mapoo palai biame ee olo koola toobo, doloso gooleedooso. Esiga yayo mipoo hamapoo gie badolone, o hamamee dili odo ee sooloo deliso. Esino yayo diba diya sooloo deli goo ee epedee dimapoo eligiso.

<sup>2</sup> Osoloso Yesuye o hamamee dili odo sabolo habe nei nolone debeiso. Esino ee ma kulodu

Saimon-Iskaliyoteeyo owolo Yudas mapoo Saitenso goo goolee olo teneeso, yayo Yesu ha teli odoo\* mapoo tiasalame. <sup>3</sup> Osoloso Amaye goo susuga ee balame kitulugu Yesu mapoo tenee goo ee yo olo gooleedooso. Osoloso yo Godee maga simi, esiga yo see Godee mapoo wedi palai goo ee yo olo gooleedooso. <sup>4</sup> Osoloso nei nolone debei maga toboloso o dugo sage tamagoloso see dugo howo i tali ee toloso o bagi mapoo booso. <sup>5</sup> Osoloso katolo mapoo howo salama soloso o hamamee dili odoo hedebe hedebe di eyo homo hapoloso, dugo howo i tali o bagi mapoo boo oso howo i ka ta domo dilame bei mooloogooso.

<sup>6</sup> Egeeseelone Saimon-Pitayo homo hapalame seme, yayo egeesee takaso, “Lodee, nayo mo homo hapalame ka sala?” dee takaso.\*

<sup>7</sup> Esemé Yesuye egeesee takaso, “Goo ayo hagee moodoo eyo bei no epedee koo gooleedoso. Esino no hamamee gooleedalaiso,” diso.

<sup>8</sup> Esemé Pitaye egeesee takaso, “Nayo mo homo hapalaime,” diso. Esemé Yesuye nei yimapoo egeesee takaso, “Ayo nee homo hapelega poo-goga, no mo hamamee dili odoonee,” dee takaso.

<sup>9</sup> Esemé Saimon-Pitaye see egeesee takaso, “Lodee, nayo hedebe mo homowe ono na hapee. Esino mo dee sabolo osoloso wiligi sabolosee hapee,” diso.

---

\* **13:2:** Yesu mapoo ha teli odoos ee Yu odoos dia wiligi odoos tebisa ee takooso. **13:3:** Yon 3:35; 16:28 \* **13:6:** Homo hapeli ee nei mauwe tou teli odoos dia tou. Esiga Yesuye o hamamee dili odoos dia homo hapoo ee ogoloso diya dio diso. Bei, Yesu yo dia wiligi odooga.

<sup>10</sup> Esemé Yesúye egeesee takaso, “Odoó howo sauwe ee o su mapoo subugo me meleeya. Esiga hedebe o homowe hapalai tekepo. Esiga niba olo subugo mauwe. Esino nima kulodu odoó hee subugo sabolo badoso.” <sup>11</sup> Osoloso Yesu yo ha teli odoó mapoo tiasalai odoó ee, yo olo gooleedooso. Esiga yayo egeesee ka taka, “Odoó hee nima kulodu subugo sabolo badoso,” dee ka taka.

<sup>12</sup> Yesúye o hamamee dili odoó dia homo hapaga koodobuloso o dugo sage kaloso wedi sibilesó bulone egeesee takaso, “Niba goo ayo epedee nimapoo moodoo eyo bei gooleedoo-somo?” <sup>13</sup> Esiga niyo amapoo takolone, ‘eligili odoó,’ osoloso ‘Lodee,’ deliso. Niyo amapoo egeesee takeli ee tei goo. Ee aso. <sup>14</sup> Esiga nibada eligili odoó osoloso nibada Lodee ayo nibada homo ka hapooso. Esiga niyo nee odoowo homo nei hapoo nei hapoo dolone ka debee. <sup>15</sup> Goo ayo nimapoo hagee edidi ee peedee. <sup>16</sup> Esiga ayo nimapoo taka. Odoó tou nei mauwe teli oso o wiligi odoó dagadilesó koo badoso. Osoloso to tosili odoó oso yo diye di odoó ee dagadilesó koo badoso. <sup>17</sup> Egeesi ma kulodu niyo goo hagee gooleedoloso peedeega, Godeeye goo hagee ogoloso nimapoo goomogalaiso.

<sup>18</sup> Esiga goo ayo hagee takoo, haga odoó susuga nimapoo koo takooso. Bei, odoó ayo hesiga ee, a olo gooleedooso. Esino Godeeyo to booka mapoo hogugu oso egeesee takooso, ‘Odoó abolo wo nolone badebei oso amapoo ha talaiso.’ To

---

**13:10:** Yon 15:3; 6:64, 70-71    **13:14:** Mat 20:28; Luka 22:27

**13:15:** Pil 2:5; Kol 3:13; 1Pita 2:21    **13:16:** Mat 10:24    **13:18:**

Psa 41:9



hagoso gooso peledabalai sabolo tebilame ka hogugu. <sup>19</sup> Esiga goo hagee peledabelega mologa, ayo nimapoo malalo ka taka. Goo hagoso tei peledobooga, niyo a tei Kelisodoo doloso tei ka talame. <sup>20</sup> Esiga ayo nimapoo taka. Edebeeyo odoo ayo diye di ee idoga, yayo a idoso. Osoloso edebeeyo a idoga, mo Ma a diye di ee idoso.”

*Yesu yo tiasalai odoo eyo goo taka*

*(Mat 26:20-25; Maka 14:17-21; Luka 22:21-23)*

<sup>21</sup> Yesuye to hagee taka koodobuloso su hegi sabolo badolone, o hamamee dili odoo mapoo egeesee takaso, “Ayo nimapoo taka. Odoo heeso nima kuloduga a ha teli odoo mapoo tiasalaiso,” dee takaso.

<sup>22</sup> Esememe o hamamee dili odoo oso dieso dima kulodu nei ogo nei ogo dolone egeesee gooleeso, “goo hagee odoo ogu mapoo takabele,” dee gooleeso. <sup>23</sup> Osoloso Yesu o hamamee dili odoo dima kulodu odoo hee Yesuye diya gooma ee\* yima koola ogolone badebeiso. <sup>24</sup> Esememe Saimon-Pitaye odoo omapoo howo gisoloo goso, Yesuye odoo ogu taka beleso yayo yimapoo woosalame.

<sup>25</sup> Esememe yayo Yesu mapoo bouwa molone yimapoo egeesee takaso, “Lodee, odoo agayo no ha teli odoo mapoo ka tiasalaiyo?” dee takaso.

<sup>26</sup> Esememe Yesuye nei egeesee takaso, “Ayo wo i mapoo oluguloso teneega, odoo oso a ha teli odoo mapoo tiasalaiso.” Osoloso Yesuye wo toloso i mapoo oluguloso Saimon-Iskaliyoteeyo

---

**13:19:** Yon 14:29; 16:4    **13:20:** Mat 10:40    \* **13:23:** Yonee eyo nediliyo o hu dokodoo poudilei goomegele. Esiga o hu woala hesile.

owolo Yudas mapoo teneeso. <sup>27</sup> Yudaseeye wo teme, Saitenso o kulodu palaso. Esemе Yesuye yimapoo egeesee takaso, “Nayo goo talame egee gooleemolo goo ee saga moodee,” diso. <sup>28</sup> Egeesi ma kulodu Yesuye Yudas mapoo egeesee taka goo eyo bei ee o hamamee dili odoo diba medee kibiya gooleedele. <sup>29</sup> Esiga odoo aboso goolee, Yudaseeye Gababia wo nalame bi abo talame di, dee takoo gooleeso. Osoloso odoo aboso goolee, ee molee odoo bi mauwe mapoo tenelame di, dee takoo gooleeso. Bei, Yesu o hamamee dili odoo dia molee ee Yudaseeye gibadeliga. <sup>30</sup> Osoloso gesi Yudaseeye wo Yesuye tenee ee toloso peegoo gadiso.

*Kokodo takeli to dia*

<sup>31</sup> Yudas olo peegoo dime, Yesuye egeesee takaso, “Epedee Odoo Holo ayo toowa doloso badeli goo ee woola yilige bigileiso. Osoloso Godeeye toowa doloso badeli goo ee amaga woola yilige bigileiso. <sup>32</sup> Esiga Godeeye toowa doloso badeli goo ee amaga woola yilige buguga, nei Godee eyo Odoo Holo ayo toowa doloso badeli goo onosee woola yilige bigileiso. Esiga goo hagee saga moodoolaiso.

<sup>33</sup> Esiga mo odoo, ayo biame deiyepo nibolo hodobo badalaiso. Osoloso a duga, niyo a esileiso. Esino niyo a agalaime. Esiga ayo Yu odoo dimapoo taka goo ee see tobu nimapoo ka taka. Niba mi ayo hagee du mapoo dilei tebile.

<sup>34</sup> Esiga kokodo takeli to dia hagee ayo nimapoo

ka taka. Niyo nee odoo nei sooloo dolo, nei sooloo dolo dolone ka dabalame. Ayo niba goolee sabolo egee bado egeesee masi, nee odoo nei sooloo dolo, nei sooloo dolo dolone ka debee.

<sup>35</sup> Egeesi ma kulodu niyo emegei nei sooloo dolo, nei sooloo dolo dolone dogo, odoo susuga oso niba tei mo hamamee dili odoodoo doloso gooleedalaiso.”

*Pitaye Yesuwo goo gagadilei goo ee*

*Yesuye taka*

*(Mat 26:31-35; Maka 14:27-31; Luka 22:31-34)*

<sup>36</sup> Esino Saimon-Pitaye egeesee takaso, “Lodee, no kapoo dilame ka sala?” diso. Esemé Yesuye nei egeesee takaso, “No epedee ayo hagee du mapoo sibilei tebile. Esino no see hamamee sibileiso,” dee takaso.

<sup>37</sup> Esemé Pitaye see egeesee takaso, “Lodee, bei kaseega ayo epedee nobolo sibilei tebile ka molosomo? Ayo no halo talame olo mopoodoo doloso ka badoso,” dee takaso.

<sup>38</sup> Esemé Yesuye nei egeesee takaso, “No tei a halo talame mopoodoo doloso ka badosomo? Esiga ayo namapoo tei goo taka. Kolokolo takel-ega mologa, nayo mo goo gagadilei ee bakadio hedebe dalaiso,” dee takaso.

## 14

*Eli hedebe Yesuso*

*Ma Godee mapoo palai*

<sup>1</sup> Esemé Yesuye egeesee takaso, “Niba goo haga koudulone na debee. Esino niba Godee mapoo tei tolone amapoosee tei te. <sup>2</sup> Bei, mo Mayo

moso mapoo debi bei moloso. Esiga goo hagee tei goonee diepi, ayo goo hagee nimapoo takele pegeliyo. Esiga ayo omapoo niyo dabalai debi ee moodoolame dileiso. <sup>3</sup> Osoloso ayo omapoo dileso debi mopoodoo doloso see sibilesa niba gilimadoloso abolo hodobo palaiso. Osoloso niba mi omapoo abolo hodobo dabalaiso. <sup>4</sup> Esiga ayo hagee du eli ee niba olo gooleedooso.”

<sup>5</sup> Esemé Tomaseeye Yesu mapoo egeesee takaso, “Lodee, mi nayo egee du, iba gooleedele. Nayo egee du eli ee iyo kasee gooleedalaiyo?” dee takaso.

<sup>6</sup> Esemé Yesuye egeesee takaso, “Eli aso. Osoloso tei goo takeli eyo bei aso. Osoloso gie badeli eyo bei aso. Esiga odo heeso eli hee maga Ma Godee mapoo palaimé. Esino yo hedebe amaga Ma mapoo ka palai. <sup>7</sup> Niyo mo goo gooleedoo diepi, niba mo Ma noseé gooleedeliyo. Esino epedee domo hamaga niyo yo olo gooleedooso. Osoloso yo olo egeiso.”

<sup>8</sup> Esemé Pilipiye egeesee takaso, “Lodee, nayo Ma imapoo eligi, iba hemisileiya,” dee takaso.

<sup>9</sup> Esemé Yesuye nei Pilipi mapoo egeesee takaso, “Pilipi, ayo biame susuga nibolo hodobo badebeiso. Esino egeesi ma kulodu nayo a gooleedelega osee ka badosoba? Esiga edebeeyo a ogoga, yo Ma olo egeiso. Esiga bei kasi maga nayo amapoo takolone, ‘Ma imapoo eligi,’ dee ka takala? <sup>10</sup> Ayo mo Ma sabolo hedebe doloso egee bado sabolo, osoloso mo Maye abolo hedebe

---

**14:3:** Yon 12:26    **14:6:** Yon 11:25; Loum 5:1-2    **14:7:** Yon 8:19    **14:9:** Yon 12:45; Kol 1:15; Hib 1:3    **14:10:** Yon 12:49

doloso egee bado goo mapoo no tei telega ka badosoba? Esiga to ayo nimapoo hagee takomo silo mawo goolee koo takomo siloso. Esino Maye abolo badolone yayo amaga o goo ee ka tomoloso. <sup>11</sup> Esiga ayo takolone, ayo mo Ma sabolo hedebe doloso egee bado sabolo, osoloso mo Maye abolo hedebe doloso badoso, dee egee takoo goo omapoo tei te. Esino niyo to ayo taka mapoo tei telega poogooga, goo toowa opusomo di ayo moodoo ee ogoloso to ayo taka mapoo tei dee.

<sup>12</sup> Esiga ayo nimapoo taka. Edebeeyo amapoo tei toga, goo toowa opusomo di ayo moodeli egeesi masi yayo moodolaiso. Osoloso goo toowa opusomo di abo yayo moodooga, oso ayo moodeli ee dagadileiso. Bei, a mo Ma mapoo duso. <sup>13</sup> Osoloso niyo mo hu maga ogoo goo ee woosaga, ayo goo egee moodolaiso, Maye toowa doloso egee bado goo ee Owolo amaga ka yilige bigilame. <sup>14</sup> Esiga niyo amapoo mo hu maga ogoo goo talame woosaga, ayo goo egee moodolaiso.”

*Yesuye Dio Teiso sibilei goo ee taka*

<sup>15</sup> “Niyo a gooleega, niyo ayo kokodo taka goo mapoo mesimo silesibileiso. <sup>16</sup> Osoloso ayo Ma mapoo woosalaiso, yayo pidili odoo hee nimapoo tenelame. Pidili odoo hagoso kookaiyo nibolo hodobo osee badalaiso. <sup>17</sup> Pidili odoo egee Dio Tei ee takooso. Yayo tei goodee ee eligiliso. Esino mi odooso yo talai tebile. Bei, diayo yo ogoloso koo

---

**14:11:** Yon 10:38    **14:12:** Maka 16:19-20    **14:13:** Mat 7:7;  
 Yon 15:16    **14:15:** Yon 15:10; 1Yon 5:3    **14:16:** Yon 14:26;  
 15:26; 16:7    **14:17:** Yon 16:13

gooleedeli. Esino niba o goo olo gooleedooso. Bei, yo nibolo hodobo badoso. Osoloso nima kulodu badalaiso.

<sup>18</sup> Esiga ayo niba gilibo holo masi wulo domopoo poogoloso badalaime. Esino a see tobu nimapoo wedi sibileiso. <sup>19</sup> Osoloso biame deiyepo poogoloso mi odoo oso a see agalaime. Esino niyo a see agalaiso. Egeesi ma kulodu a gie badeliga, niba nosee gie dabalaiso. <sup>20</sup> Egeesi ma kulodu a ta maga see hogadiga, ayo mo Ma sabolo hedebe doloso egee bado goo ee, niba gooleedalaiso. Osoloso niyo abolo hedebe doloso egee do goo sabolo, osoloso ayo nibolo hedebe doloso egee bado goo ee gooleedalaiso. <sup>21</sup> Esiga edebeeyo ayo kokodo taka to ee duloso mesimo siloga, odoo egee a diya goolee sabolo badoso. Osoloso odoo a diya goolee sabolo badeli mapoo mo Maye yo sooloo dolone ka badoso. Osoloso anosee odoo egee diya sooloo dolone ka badoso. Osoloso ayo mo goo ee yimapoo yilige bigileiso.”

<sup>22</sup> Esemé Yudas-Iskaliyot nee, esino Yudas heeso egeesee takaso, “Lodee, bei kasi maga nayo nee goo ee mi odoo mapoo yilige bigile poogoloso, see imapoo ka yilige bigileiyo?” dee takaso.

<sup>23</sup> Esemé Yesuye nei egeesee takaso, “Edebeeyo a diya gooleega, yayo goo ayo eligi mapoo mesimo sileiso. Osoloso mo Maye yo diya sooloo dalaiso. Osoloso mo Ma asalo sibileso yibolo hodobo badalaiso. <sup>24</sup> Esino edebeeyo a goolega badoga, yo goo ayo eligi mapoo mesiloso koo siloso. Egeesi ma kulodu goo ayo eligime niyo

du ee, ayo mawo goolee eligimo sile. Esino eligi hagee mo Ma, a diye di oso taka ee eligi.

<sup>25</sup> Esiga ayo nibolo hodobo osee badolone, goo susuga hagee nimapoo olo takaso. <sup>26</sup> Esino mo Maye mo hu maga Dio Tei ee nimapoo meiyee dalaiso. Osoloso yayo niba pidilone badolone goo susuga nimapoo eligileiso. Osoloso goo susuga ayo nimapoo taka ee see niyo goolee sabolo dabalame, yayo nibada goo goolee pileiso.

<sup>27</sup> Esiga mesili goo ayo nimapoo ka tonowa. Mo mesili goo ayo nimapoo hagee tenee ee mi odooso mesili goo egeesinee. Esiga niba goo diya koudulone ebia sabolo na debee.

<sup>28</sup> Esiga ayo nimapoo takolone, ‘a mo Ma mapoo peleso badoboso see nimapoo ka wedi sibileisogo,’ dee taka goo ee, niba olo duso. Esiga niyo a tei diya goolee sabolo debei diepi, ayo mo Ma mapoo pologa niba goomegeliyo. Bei, yayo toowa doloso badolone, a dagadilesa ka badoga. <sup>29</sup> Egeesi ma kulodu goo egee peledebel-ega molome, ayo goo susuga hagee nimapoo olo takaso, goo ogoso hamamee peledobooga ogoloso niyo tei ka talame. <sup>30</sup> Esiga ayo niba eligi ee koodobilei olo koola toobooso. Bei, mi odo dia wiligi odo Saiten olo sibo. Yayo a dagadilei yimapoo kitulugu mauwe. <sup>31</sup> Esino ayo mo Ma diya goolee sabolo egee bado goo ee mi odo oso ogoloso gooleedalame, to mo Maye amapoo taka ee ayo tobuloso moodeliso.

Esiga niba tebise, iba dimo.”

# 15

## *Yesu tei homokoko su*

<sup>1</sup> “Esiga tei homokoko sudee aso. Osoloso mo Maye homo su ee ka gibadoso. <sup>2</sup> Osoloso homo dee amaga agaga oso ko pelega mologa, yayo kookooloso peegoo togobiseliso. Esino homo dee ko peli eyo dee abo ee kookeliso, oso see homokoko okopolo palame. <sup>3</sup> Egeesi ma kulodu goo ayo nimapoo eligi oso niba homo dee abo egeesi masi olo kookooloso subugo mauwe ka doso. <sup>4</sup> Esiga niba amapoo oluguloso ka debee. Eseega ayo nimapoo oluguloso badalaiso. Esiga dee obusomo molone ko palai mauwe. Esino dee oso homo su mapoo oluguloso mologa, ko palaiso. Goo egeesi maga, niba amapoo olugulega dogo, homokoko palaime. Esino niyo amapoo oluguloso dogo, homokoko okopolo palaiso.

<sup>5</sup> Esiga homokoko su aso. Osoloso homo dee ee nibaso. Egeesi ma kulodu edebeeyo amapoo sibilesos oluguloso badoga, ayo yimapoo oluguloso badalaiso. Eseega yo homokoko okopolo palaiso. Esino niba a mauwe dogo, niyo goo hee moodoolai tebileime. <sup>6</sup> Esiga edebeeyo amapoo sibilesos olugulega dogo, yo homo dee ko koo peli koodolosos peegoo togobugoo egeesi masi moloso. Esiga homo dee egee sioga misiga magolosos dou mapoo toodeliso. <sup>7</sup> Goo egeesi maga niyo amapoo oluguloso dobolone, ayo eligi goo omapoo mesimo silesibulone, niyo ogoos goo talame amapoo woosaga, niba goo egee talaiso. <sup>8</sup> Esiga niyo homokoko okopolo polosos mologa, oso mo Mayo



hu dokodoo poudiliso, osoloso niba mo hamamee dili odoo doloso egee do goo ee yilige bigiliso.

<sup>9</sup> Esiga mo Maye a diya sooloo dolone egee bado egeesi masi ayo niba diya sooloo dolone ka badoso. Esiga niba ayo sooloo deli goo ee ma kulodu debbe. <sup>10</sup> Egeesi ma kulodu ayo mo Maye kokodo taka to omapoo mesimo silone, yayo sooloo deli ma kulodu ka badoso. Osoloso hedebe egeesi masi niyo ayo kokodo taka to omapoo mesimo silesiboga, niba nosee ayo sooloo deli goo ee ma kulodu dabalaiso.

<sup>11</sup> Esiga goo hagee ayo nimapoo olo takaso, goomoga goo amapoo egee molo niyo talame. Osoloso nimapoo goomoga goo oso kauwuloso ka malame. <sup>12</sup> Esiga ayo kokodo taka to hagoso. Ayo niba sooloo deli egeesi masi niyo nee odoo nei sooloo dolo, nei sooloo dolo dolone ka debbe. <sup>13</sup> Egeesi ma kulodu edebeeyo o odoo diya sooloo dolone, yo halo o su teli mapoo magalai, goo oso toowa ka moloso. <sup>14</sup> Esiga niyo ayo kokodo taka to mapoo mesimo siloga, niba tei mo odoo. <sup>15</sup> Esiga niba ayo wulo mo tou teli odoo dee koo takooso. Bei, tou teli odoo ee o wiligi odoo eyo goo ee yo gooleedele. Esino niba tei mo odoo deeso. Bei, mo Maye amapoo taka goo susuga ee ayo nimapoo olo eligiso. <sup>16</sup> Egeesi ma kulodu niyo a ka hesile. Esino ayo niba ka hesiga, niyo homokoko okopolo palame. Homokoko egee kookaiyo moloso osee malaiso. Niyo egeesee solone, ogoo goo talame mo hu maga mo Ma

mapoo woosaga, yayo nimapoo tenelaiso. <sup>17</sup> Esiga ayo nimapoo kokodo taka to ee hagoso. Niyo nee odoosoo nei sooloo dolo, nei sooloo dolo dolone ka debee.”

*Mi odoosoo oso heiga goo*

<sup>18</sup> “Mi odoosoo oso niba heigoga, daga diayo a heigoso doloso gooleede. <sup>19</sup> Esiga niba mi odoosoo sabolo hedebe doloso ka debei diepi, diayo niba dia odoosoo dolone diya goolee sabolo debeliyo. Esino ayo niba mi odoosoo dima kuloduga olo hesiaso, niyo dibolo hedebe doloso debelega pagalame. Goo egeesi maga diayo nimapoo heiga ka moloso. <sup>20</sup> Esiga to ayo nimapoo taka ee medee goolee. Bei, ayo egeese takaso. Wulo tou teli odoosoo oso o wiligi odoosoo ee dagadilesosoo koo badoso. Egeesi ma kulodu edebeeyo amapoo dala olo teneega, diayo niba nose dala tenelaiso. Osolosoo diayo ayo eligi goo mapoo mesiega, diba nose niyo eligi goo mapoo mesileiso. <sup>21</sup> Esino niba mo odoosoo, diayo goo susuga hagee nimapoo moodoolaiso. Bei, a diye di odoosoo ee diba gooleedele.

<sup>22</sup> Egeesi ma kulodu ayo sibilesosoo dimapoo to takele diepi, Godeeye dia goo tokenee midilei ee pegeliyo. Esino epedee hamapoo ayo sibilesosoo olo takaso. Goo egeesi maga goo tokenee diayo moodoo ee Godeeye midileiso. Esino diayo to nei takalai tebileime. <sup>23</sup> Edebeeyo a heigoga, yo mo Ma nose heigoso. <sup>24</sup> Esiga goo toowa opusomosoo di ayo moodoomosoo silee egeesi odoosoo

---

**15:17:** Yon 13:34

**15:19:** Yon 17:14

**15:20:** Yon 13:16

**15:23:** Luka 10:16

heeso moodoomo sile. Osoloso ayo dima kulodu goo hageesee moodele diepi, Godeeye dia goo tokenee midilei ee pegeliyo. Esino diayo goo toowa ayo moodoo ee egeliso. Esino diayo mo Ma asalo imapoo heiga ka moloso. <sup>25</sup> Esiga goo hagee olo peledabaso, Godeeyo to booka mapoo hogugu oso taka sabolo tebilame. Bei, Godeeyo toso egeesee takooso, 'Diayo wulo goo mauwe amapoo heiga ka moloso,' deliso.

<sup>26</sup> Ayo niba pidilame Dio Tei nimapoo diye dalaiso. Dio Tei oso mo Ma maga sibiliso, osoloso tei goodee eligiliso. Osoloso Dio Tei oso sibilesa, mo goo ee woola yilige bigileiso. <sup>27</sup> Osoloso niba nose niyo mo goo odoo mapoo yilige bigi. Bei, niba daga bei mooloogoo biame omaga abolo hodobo sileeso."

## 16

<sup>1</sup> "Esiga niyo tei too goo maga peegoo diyaga, ayo goo susuga hagee nimapoo olo takaso. <sup>2</sup> Bei, odoo aboso nibada hu howo gisili moso ma kulodu egee molo taloso niba peegoo hasiso bigileiso. Osoloso odoo aboso tei too odoo ee piliguga, diayo goolee Godeeyo tou to dee goolai, biame ee sibileiso. <sup>3</sup> Esiga diayo goo hageesee nimapoo moodoolaiso. Bei, mo goo sabolo osoloso mo Mayo goo ee diba gooleedelega. <sup>4</sup> Esiga goo hagee ayo nimapoo olo takaso. Egeesi ma kulodu goo hagoso tei peledobooga, niba to ayo taka ee gooleebigileiso."

*Dio Tei oso sibilei eyo goo taka*

“Esiga ayo daga Godeeyo tou bei mooloogolone a nibolo hodobo badebeiso. Goo egeesi maga, ayo goo hagee nimapoo takele. <sup>5</sup> Esino a epei odoo a diye di mapoo duso. Esino nima kulodu odoo heeso amapoo takolone, a kapoo diala, doloso koo woosa. <sup>6</sup> Esiga ayo takolone, a epei dileiso, dee taka goo ee niyo duloso niba diya ka gooholoso. <sup>7</sup> Esino ayo tei goo nimapoo ka taka. Ayo niba poogoloso duga, goo oso niba pidileiso. Bei, a duga, nei ayo Dio Tei nimapoo diye dalaiso, yayo niba pidilame. Esino a dilega poogooga, Dio Tei ee nimapoo sibileime.

<sup>8</sup> Egeesi ma kulodu Dio Tei siboga, yayo mi odoo mapoo goo tokenee eyo goo maga tei goo takalaiso. Osoloso odoo Godeeyo howo woola tekepo dabalai goo onosee takalaiso. Osoloso Godeeye goo midilei goo eyo bei onosee takalaiso. <sup>9</sup> Esiga Dio Tei oso goo tokenee eyo goo maga tei goo takolone, amapoo tei tele pagalai goo ee mi odoo dia goo tokenee toowa ka moloso, dee takalaiso. <sup>10</sup> Osoloso a mo Ma mapoo hagee polo see niyo a agalaime. Goo ogooso Godeeyo howo woola tekepo badalai goo ee yilige bigileiso. <sup>11</sup> Osoloso Dio Tei oso Godeeye goo midili goo ee tei goo takolone, mi odoo dia goo ee midileiso, dee takalaiso. Bei, mi odoo dia wiligi odoo Saiteneeyo goo ee olo midiso.

<sup>12</sup> Esiga amapoo goo bei moloso, ayo nimapoo takalai. Esino epedee niyo goo bei egee gooleedalai tebile. Esiga ayo goo egee nimapoo

takalaime. <sup>13</sup> Esino Dio Tei oso nimapoo si-boga, yayo niba tei goo susuga mapoo gilimado dileiso. Yayo eyo goolee takalaime. Esino yayo to ayo takeme du goo ee takomo sileiso. Osoloso hamamee goo ogooso peledabalai ee yayo nimapoo eligileiso. <sup>14</sup> Esiga Dio Tei oso to ayo yimapoo takalai ee see nimapoo takalaiso. Goo egeesi maga yayo mo hu dokodoo poudileiso. <sup>15</sup> Esiga goo susuga mo Maye toloso hagee molo ee mo. Goo egeesi maga ayo takolone, Dio Tei oso to ayo taka ee nimapoo takalaiso, dee ka taka.”

*Goohele goo oso  
goomoga goo tosibileiso*

<sup>16</sup> “Biame deiyepo badoboso hamamee niyo a agalaime. Esino see biame deiyepo poogoloso hamamee niyo a see agalaiso.”

<sup>17</sup> Esiga Yesuwo hamamee dili odoo aboso dieso nediliyo egeesee takaso, “Yayo imapoo takolone, biame deiyepo badoboso hamamee iyo yo agalaime, doloso see, biame deiyepo poogoloso hamamee iyo yo see ka agalai, dee taka goo eyo bei ee ogoobo? Osoloso yayo takolone, yo Ama mapoo dia, dee taka goo eyo bei ee ogoobo?

<sup>18</sup> Osoloso yayo imapoo takolone, biame deiyepo, dee taka goo eyo bei ogoobo? Iba to yayo taka eyo bei medee koo gooleedo,” dee takemeleeso.

<sup>19</sup> Yesuye o hamamee dili odoo oso yimapoo woosalo agalame debei goo ee, yo olo gooleedoloso dimapoo egeesee takaso, “Ayo nimapoo takolone, ‘biame deiyepo badoboso hamamee niyo a agalaime,’ dee taka sabolo

osoloso, ‘see biame deiyepo poogoloso hamamee niyo a see ka agalai,’ dee taka goo omaga niyo amapoo woosalame ka dabala? <sup>20</sup> Egeesi ma kulodu ayo nimapoo taka. Niba gooholone pisileiso. Esino mi odoo ee goomogalaiso. O, tei takoo, niba goohalaiso. Esino goohele goo oso nimapoo goomoga goo tosibileiso. <sup>21</sup> Esiga niba medee goolee, soboso holo soomagoo biame omapoo yo dala teliso. Esino yo holo soomagoloso hamamee eyo dala too goo ee boobado bigiliso. Bei, yayo holope soomagoo goo maga diya goomogolone. <sup>22</sup> Esiga niba egeesi masi doso. Bei, niba epedee goohele sabolo doso. Esino a see wedi sibilesi niba agalaiso. Eseega domo omapoo niba diya goomogalaiso. Goomoga goo hagee odoo heeso nimaga peedee dalaime. <sup>23</sup> Biame omapoo niyo goo hee talame amapoo woosalaime. Esino ayo nimapoo tei taka. Niyo ogoo goo talame mo hu maga Ma mapoo woosaga, yayo nimapoo tenelaiso. <sup>24</sup> Esiga niyo daga goo abo talame mo hu maga woosalo egele. Esino epedee hamaga dulone niyo ogoo goo talame mo hu maga woosaga, niyo goo egee talaiso. Eseega goomoga goo nimapoo egee molo ee kauwuleiso.”

*Yesuye mi odoo dia wiligi  
odoo ee dagadi*

<sup>25</sup> “Esiga ayo goo susuga hagee takomo silone, wulo wudu takomo sileeso. Esino biame siboga, ayo goo susuga ee see nimapoo wulo wudu takomo sileime. Esino ayo Mayo goo ee nimapoo woola takomo sileiso. <sup>26</sup> Esiga biame omapoo

nibada goo ee ayo Ma mapoo woosalaime. Bei, niyo nibada goo ee mo hu maga Ma mapoo woosamalaiso. <sup>27</sup> Bei, niyo tei tolone, a tei Ma maga simi doloso, a diya goolee sabolo egee do goo maga Maye niba diya sooloo dolone ka badoso. <sup>28</sup> Esiga ayo Maye badeli mi maga mipoo hamapoo simiso. Osoloso see epedee mipoo hagee poogoloso Maye badeli mi mapoo ka wedi poloso,” dee takaso.

<sup>29</sup> Esemee o hamamee dili odoosoo yimapoo egeese takaso, “Epedee nayo goo hagee imapoo wulo koo wudu takoo. Esino nayo goo susuga hagee imapoo woola yilige buguso. <sup>30</sup> Esiga iba tei toso, no tei Godee maga simiga. Bei, goo susuga ee no diya gooleedoo. Osoloso odoosoo heeso namapoo woosalame gooleemelee ee ogoloso daga nayo yimapoo nei takeliso,” dee takaso.

<sup>31</sup> Esemee Yesuye nei egeese takaso, “Niba epedee tei tosomo? <sup>32</sup> Esino niba medee dui. Biame olo sibileiso, osoloso olo simiso, niyo a poogoloso nibada mosopoo kukulo dilei. Esino a mobusomo koo badeli. Bei, mo Maye abolo hodobo badeliso. <sup>33</sup> Niyo amapoo tei too goo maga nimapoo mesie goo oso malame, ayo goo susuga hagee nimapoo olo takaso. Niba mipoo hamapoo dala ma kulodu dabalaiso. Esino niba ebilega medee kibiya debee. Bei, mipoo hagoso kitulugu ee ayo dagadilesosoo ka badoso.”

## 17

*Yesuye o su halo Godee mapoo taka*

<sup>1</sup> Yesu to hagee taka koodobuloso, Kei mi ma dokodoo bolone egeese takaso, “Ma, mo biame olo siboso. Esiga Nowolo ayo toowa doloso badeli goo ee odoo susuga mapoo eligi, Nowolo ayo nei nayo toowa doloso badeli goo ee odoo susuga mapoo eligilame. <sup>2</sup> Bei, odoo susuga ee balame nayo Nowolo amapoo kitulugu olo teneeso, see ayo odoo nayo amapoo tenee dimapoo kookaiyo badoboso gie badeli tenelame. <sup>3</sup> Osoloso kookaiyo badoboso gie badeli goo ee, tei Godee hedebe no gooleedalai sabolo, osoloso nayo diye di odoo, Yesu Keliso a gooleedalai ee takooso. <sup>4</sup> Tou nayo amapoo tenee ee ayo hosudoo maga, ayo mipoo hamapoo badolone, nayo toowa doloso badeli goo ee odoo susuga mapoo eligiso. <sup>5</sup> Esiga Ma, mipoo hagee moodelega molome, ayo nobolo badolone ayo toowa doloso badebeiso. Esiga goo egee see epedee amapoo tenee.”

*Yesuye o hamamee dili odoo halo Godee mapoo taka*

<sup>6</sup> “Ma, mipoo hagee ma kuloduga odoo nayo amapoo tenee mapoo ayo nee goo olo eligiso. Hagee nee odoo, nayo amapoo teneeso. Osoloso diayo nee to mapoo mesimo silesibiliso. <sup>7</sup> Esiga goo susuga nayo amapoo tenee ee, namaga siboso doloso diba epedee olo gooleedooso. <sup>8</sup> Osoloso eligi goo nayo amapoo tenee ee, see ayo dimapoo teneme, see diayo eligi goo omapoo tei tooso.



Osoloso ayo namaga simi goo ee, diba olo gooleedooso. Osoloso diba nosee nayo a diye di goo mapoo tei tooso.

<sup>9</sup> Esiga ayo namapoo hagee takoo mi odoo halo koo takooso. Esino odoo nayo amapoo tenee ee halo namapoo ka taka. Bei, odoo hagee nee odoo. <sup>10</sup> Egeesi ma kulodu odoo hagee bia ee ibada odoo. Diba mo odoo osoloso diba nosee nee odoo oso. Osoloso ayo toowa doloso badeli goo ee dimaga woola yilige bigiliso. <sup>11</sup> Esiga a mipoo hagee poogoo dileiso. Bei, a namapoo olo siboso. Esino mo hamamee dili odoo oso mipoo hamapoo osee dabalaiso. Ma, no tei. Nee hu oso kitulugu amapoo tenee oso odoo hagee bia medee bamelee, nayo abolo hedebe doloso egee bado egeesee solone, diba nosee dieso hedebe doloso dabalame. <sup>12</sup> Egeesi ma kulodu ayo dibolo hodobo badolone, nee hu oso kitulugu nayo amapoo tenee goo oso ayo diba medee bameleeso. Esemee odoo hee osugobelee. Esino odoo hee Godee maga pileigo dee taka hedebe ono osugobaso, Ma Godee nee to booka mapoo hogugu oso taka sabolo tebilame.

<sup>13</sup> Esiga a namapoo olo siboso. Esino a mipoo hamapoo osee badolone, goo hagee ayo namapoo ka taka, goomoga goo amapoo egee molo oso mo hamamee dili odoo dima kulodu toowa doloso malame. <sup>14</sup> Esiga ayo nee to dimapoo olo takaso. Esino mi odoo oso diba heigaso. Bei, a mi odoonee, egeeseelone diba nosee mi odoo doloso koo doso. <sup>15</sup> Esiga Ma, ayo namapoo hagee takoo, nayo mo hamamee dili odoo mi hamaga peegoo

gilimado dilame koo takooso. Esino diba Saitenso tokenee peeyaga nayo medee balame ka taka. <sup>16</sup> Esiga a mi odoonee, egeeseelone diba nosee mi odoo doloso koo doso. <sup>17</sup> Nee to ee tei goo. Esiga nayo nee to omaga diba nee odoo dalame peegoo pi magee. <sup>18</sup> Esiga nayo a diye di egeesee solone, ayo diba nosee mipoo hagee ma kulodu diye deeso. <sup>19</sup> Osoloso ayo diba halo a namapoo teneeso, diba nosee tei nee odoo doloso peegoo pi magoloso ka dabalame.”

*Yesuye tei telaga odoo halo  
Godee mapoo taka*

<sup>20</sup> “Esiga ayo hedebe mo hamamee dili odoo ee halo namapoo koo takooso. Esino diayo eligi goo ee duloso edebeeyo amapoo tei talai odoo sabolosee diba halo ka takooso. <sup>21</sup> Osoloso Ma, ayo namapoo to egeesee ka taka. Ayo nobolo hedebe doloso egee bado, egeesee solone nei nayo abolo hedebe doloso ka badoso. Egeesee solone diba nosee hedebe doloso dabalame ka taka. Osoloso diba nosee ibolo hedebe doloso dabalame ka taka. Egeeseega mi odoo oso a tei nayo diye di goo mapoo tei ka talame. <sup>22</sup> Esiga toowa doloso badeli goo nayo amapoo tenee ee, see ayo dimapoo teneeso, diba dieso hedebe doloso dabalame. Egeesi ma kulodu iba nosee hedebe doloso egeesee ka doso. <sup>23</sup> Esiga ayo dibolo hodobo badoso, osoloso nayo abolo hodobo badoso. Iyo egee do egeesi masi diba nosee hedebe doloso dabalai a goomogo. Eseega mi odoo oso goo egee ogoloso a tei nayo diye di goo ee

gooleedalaiso. Osoloso nayo a diya sooloo dolone egee bado, egeesee solone nayo tei telaga odoos diya sooloo dolone egee bado goo sabolo mi odoos gooleedalaiso.

<sup>24</sup> Esiga Ma, tei telaga odoos nayo amapoo tenee hagee bia ee ayo badalai mi mapoo abolo hodobo dabalai, a goomogoso. Osoloso toowa doloso badeli goo ee nayo amapoo tenee ee diayo agalai, a goomogo. Mipoo moodelega molome, nayo a sooloo dolone, toowa doloso badeli goo egee nayo amapoo teneeso.

<sup>25</sup> Esiga Ma, hedebe no tekepo. Mi odoos oso no gooleedele. Esino ayo no ka gooleedoo. Osoloso nayo a diye di goo ee tei telaga odoos diba olo gooleedoos. <sup>26</sup> Ayo nee goo dimapoo olo yilige buguso, osoloso see yilige bigileiso, nayo a sooloo dolone egee bado goo egeesi masi oso dima kulodu ka malame. Osoloso anosee dibolo hodobo badalame.”

## 18

### *Edebeeyo Yesu too*

*(Mat 26:47-56; Maka 14:43-50; Luka 22:47-53)*

<sup>1</sup> Yesuye Godee mapoo taka koodobuloso, see o hamamee dili odoos sabolo Kidilon howo tolobo dalo diso. Osoloso mi omapoo olipi segei homolee meleeso. Esemme Yesuye o hamamee dili odoos sabolo omapoo gadiso.

<sup>2</sup> Egeesi ma kulodu Yudas, Yesu ha teli odoos mapoo tiaseli odoos onosee homolee ee yo gooleedoo. Bei, biame abo mapoo Yesuye o hamamee dili odoos sabolo omapoo dilesos mooloogoodeliso.

<sup>3</sup> Esiga Yudaseeye Loum ha teli odoos mooloo-goodoo sabolo osoloso tei moso gidebeli odoos gilimado simiso. Tei moso gidebeli odoos hagee bia ee tei moso eyo wiligi odoos tebisa sabolo osoloso Pelisi odoos oso ka diye di. Diayo sibulone keme sabolo, egime sabolo, osoloso ha teli bi toloos sibilesos peledabaso.

<sup>4</sup> Esemes Yesuyes goos susuga yimapoo peledabalai ee yo olo gooledolosos malalos tobolosos dimapoo egeesees takasos, “Niba odoos ogu esiamos silala?” diso.

<sup>5</sup> Esemes diayos neis yimapoo egeesees takasos, “Iba Nasalet odoos Yesu ee esiamos sila,” diso. Esemes Yesuyes neis dimapoo egeesees takasos, “Niyo egees esiamos silo odoos ee aso,” diso. Epedees egeesees semelees mapoo Yesu ha teli odoos mapoo tiaselis odoos Yudas yinosees omapoo dibolos hodobos tebidisos. <sup>6</sup> Esemes Yesuyes dimapoo takolones, odoos egees aso, dees taka dulosos diba badayos dilesos miyomoo misigedibaso.

<sup>7</sup> Esemes Yesuyes sees tobus dimapoo egeesees woosasos, “Niba odoos ogu esiamos silala?” Esemes sees diayos neis yimapoo egeesees takasos, “Iba Nasalet odoos Yesu ee esiamos sila,” dees takasos.

<sup>8</sup> Esemes Yesuyes neis egeesees takasos, “Odoos egees aso dolosos ayo nimapoo olo takasos. Esiga niyo tei a esiamos silesibogas, odoos abolos hagees silesibos diba nosees diyes dalais tekepos.” <sup>9</sup> Esiga goos hagosos egeesees peledabaso. Bei, Yesuyes dagas o hamamees dilis odoos sabolos silesibulones takas to sabolos tebilame. Bei, yayos egeesees ka takas, “Ma, odoos nayo

amapoo tenee ee ayo diba medee bameleeso, odoo hee peegoo osugobe, ” dee takaso.

<sup>10</sup> Esemme Saimon-Pitaye o kaiya tadoloso tei moso wiligi odoo taba eyo tou teli odoo hee Malakuseeyo dulu deedee dokolo ee kobuguso.

<sup>11</sup> Esemme Yesuye Pita mapoo egeesee takaso, “Nee kaiya egee o moso mapoo toose. Maye dala amapoo tenelame egee molo, ayo talai tekepo,” dee takaso.

<sup>12</sup> Esemme Loum ha teli odoo mooloogoodoo toowa sabolo, osoloso dia wiligi odoo taba sabolo, osoloso Yu odoo dia tei moso gidebeli odoo oso Yesu toloso dee tiaso. <sup>13</sup> Osoloso diayo yo Kaya-paseeyo nalobo Anas mapoo ido diso. Kayapas hagosu dugo omapoo tei moso wiligi odoo toboloso badebeiso. <sup>14</sup> Kayapas hedebe hagosu daga Yesuwo goo maga Yu odoo dia wiligi odoo mapoo takolone, “Odoo hedebeso odoo susuga ee halo talai tekepo,” dee ka taka.

### *Pitaye Yesuwo goo gagadi*

*(Mat 26:69-70; Maka 14:66-68; Luka 22:54-57)*

<sup>15</sup> Edebeeyo Yesu toloso ido dime, Saimon-Pita dio osoloso Yesu o hamamee dili odoo hee dio hamamee diso. Esino tei moso wiligi odoo taba oso odoo Pitabolo di ee\* yo olo gooleedooso. Esemme yayo Yesuye di hamamee deedee dileso, tei moso wiligi odoo taba eyo moso\* beelee ee

---

**18:11:** Mat 26:39    **18:14:** Yon 11:49-51    \* **18:15:** Odoo Pitabolo di ee Yonee.

\* **18:15:** tei moso wiligi odoo taba eyo moso hagee Anaseeyo moso. Daga yayo tei moso wiligi odoo toboloso badoboome, see hamamee Kayapaseeye o debi tooso. Esino edebeeyo takolone, Anas yo tei moso eyo wiligi odoo taba doloso osee takeliso.

ma kulodu gadiso. <sup>16</sup> Esino Pita yo beele osulu miyopoo tebidiso. Esemе odoо Pitabolo simi oso see osulu miyopoo wedi dilesо, sobo osulu gibadeli mapoo takoloso, Pita kulodu ido diso.

<sup>17</sup> Esemе sobo ogoso Pita ogoloso yimapoo egeesee woosaso, “No noseе, Yesu o hamamee dili odoо hee nosomo?” dee takaso. Esemе Pitaye nei egeesee takaso, “Haye, asonee,” diso.

<sup>18</sup> Biame omapoo tei moso wiligi odoо taba eyo tou teli odoо abo sabolo osoloso tei moso gidebeli odoо diba diya kekeisime, dou toloso dou halagameleeso. Esemе Pita yinosee dilesо dibolo hodobo tobudulone dou hameleeso.

*Tei moso wiligi odoо taba oso  
Yesu mapoo woosa*

*(Mat 26:59-66; Maka 14:55-64; Luka 22:66-71)*

<sup>19</sup> Biame omapoo tei moso wiligi odoо taba oso Yesu yayo eligi goo sabolo, osoloso o hamamee dili odoо dia goo ee yimapoo woosaso.

<sup>20</sup> Esemе Yesuye nei yimapoo egeesee takaso, “Odoо susuga eyo howo woola ayo goo susuga hagee takomo sileeso. Osoloso ayo ibada howo gisili moso mapoo osoloso tei moso ma kulodu peleso odoо mapoo eligimo siliso. Bei, Yu odoо susuga oso sibilesо omapoo mooloogoo deliso. Egeesi ma kulodu ayo goo hee mada takele. <sup>21</sup> Esiga bei kasi maga nayo amapoo ka woosowala? Nayo odoо ayo eligime du mapoo woose. Bei, to ayo taka ee, diba gooleedooga.”

<sup>22</sup> Yesuye goo hagee takeme, tei moso gibadeli odoо hee koola omapoo tebidi oso Yesuwo mudu mapoo kobugulone egeesee takaso, “Nayo ibada

tei moso wiligi odoo taba mapoo to nei egeesee takalai tekeponee,” diso.

<sup>23</sup> Esemé Yesúye odoo yo kobugu mapoo nei egeesee takaso, “To ayo taka ee ma kulodu to tokenee hee taka daga, nayo goo egee woola odoo susuga hamapoo yebigi. Esino ayo tei goo takano, bei kasalame nayo a ka kobuguwo?” dee takaso. <sup>24</sup> Esemé Yesú o dee tia şabolo osee tobudume, Anaseeye tei moso wiligi odoo taba Kayapas mapoo ido diye diso.

*Pitaye Yesuwo goo see tobu gagadi*

*(Mat 26:71-75; Maka 14:69-72; Luka 22:58-62)*

<sup>25</sup> Saimon-Pita dou holone osee tobudume, odoo aboso yo ogoloso yimapoo egeesee takaso, “No Yesú o hamamee dili odoo hee nosomo?” diso. Esemé Pitaye egeesee takaso, “Haye, asonee,” diso.

<sup>26</sup> Esemé tei moso wiligi odoo taba eyo tou teli odoo hee omapoo tebidiso, yo odoo Pitaye dulu kobugu sabolo soosoo hedebe. Osoloso yayo Pita mapoo egeesee takaso, “Ayo no Yesubolo olipi segei homolee ma kulodu sileeme egeiso,” diso. <sup>27</sup> Esemé Pitaye see tobu egeesee takaso, “Odoo egee asonee,” diso. Esemé epedee omapoo kolokolo takaso.

*Yesu Paillet mapoo ido di*

*(Mat 27:1-2, 11-14; Maka 15:1-5; Luka 23:1-5)*

<sup>28</sup> Gesikolodee Yu odoo dia wiligi odoo oso Yesú Kayapaseeyo moso abaga see Loum gamalee odoo Paillet mapoo ido diso. Esino diba moso ee ma kulodu gadilega peegoo debeiso. Bei,

diba goomegele, diayo Yu odoonee dia moso ma kulodu gaduga goo oso diba subugo kauwe dolone Gababia wo nelega peegeeyaga.\* <sup>29</sup> Esem Paillet peegoo dilesu tobudulone dimapoo egeesee takaso, “Odooo hagoso goo kasi moodoowo, esiga niyo yo hamapoo ka ido simiyo?” dee takaso.

<sup>30</sup> Esem diayo nei yimapoo egeesee takaso, “Odooo hagee goo hee tele diepi, iyo yo namapoo ido sibile pegeliyo,” diso.

<sup>31</sup> Esem Pailleteeye dimapoo egeesee takaso, “Niso yo ido dilesu nibada tei magoo sabolo tebilame o goo midi,” dee takaso.

Esem Yu odooo dia wiligi odooo oso nei egeesee takaso, “Iyo yo wooloomalai goomogo. Esino iyo odooo wooloomalai Loum gamalee odooso imapoo kitulugu tenele,” <sup>32</sup> Esiga goo hagoso olo peledabaso, Yesuye eyo talai goo ee takomo silee sabolo tebilame.

<sup>33</sup> Yayo egeesee taka duloso Paillet yo see moso kulodu gadilesu badolone, Yesu idolosu yimapoo egeesee takaso, “No tei Yu odooo dia wiligi odooo taba nosomo?” dee takaso.

<sup>34</sup> Esem Yesuye nei egeesee takaso, “Nayo amapoo egee woosa ee no goolee takala, o, odooo heeso mo goo ee namapoo takaga ka takala?” diso.

<sup>35</sup> Esem Pailleteeye nei egeesee takaso, “Hagee mo goonee. Bei, a Yu odoonee. Teiyo? Esino nee odooo sabolo, osoloso tei moso wiligi odooo tebisa

---

\* **18:28:** Yu odooo dia tei magoo oso egeesee takooso, “Yu odooo oso Yu odoonee dia moso ma kulodu gaduga, yo subugo kauwe badalaso.” **18:31:** Yon 19:6-7 **18:32:** Yon 3:14; 12:33

**18:35:** Yon 1:11



oso no amapoo ido simiso. Esiga no goo kasi moodoowo?”

<sup>36</sup> Esemé Yesuye nei egeesee takaso, “Ayo wiligi doloso badeli goo ee mipoo hamaga koo siboso. Egeesi ma kulodu ayo wiligi doloso badeli goo ee mipoo hamapoo meli diepi, Yu odooso a teyaga, mo tou teli odooso a galalo biligeliyo. Esino ayo wiligi doloso badeli goo ee mipoo hamaga koo siboso,” dee takaso.

<sup>37</sup> Esemé Paileteeye see egeesee takaso, “Esiga no tei wiligi odo. Teiyo, ha?” diso.

Esemé Yesuye nei egeesee takaso, “Nayo amapoo takolone, a tei wiligi odo, dee takemeni, ee tei taka. A mipoo hamapoo soomagooso, ayo odo mapoo tei goodee takomo silame. Esiga edebeeyo tei goo ma kulodu dogá, diba mo to dulone ka doso.”

<sup>38</sup> Esemé Paileteeye nei egeesee takaso, “Tei goo ee ogoobo?” diso.

*Paileteeye Yesu wooloomalame  
kitulugu tenee*

*(Mat 27:15-31; Maka 15:6-20; Luka 23:13-25)*

Pailet see peegoo gadilesó tobudulone Yu odo dia wiligi odo tebisa mapoo egeesee takaso, “Ayo odo hamapoo goo hee koo ogo. <sup>39</sup> Esino ayo nibada adaga dia goo ee dodolone, niyo Gababia wo ne biame mapoo, ayo odo hee neliga moso ma kuloduga peegoo tamageliso. Esiga ayo Yu odo nibada wiligi odo hagee peegoo tamagalai, niba goomogosomo?” dee takaso.

<sup>40</sup> Esemé diayo toso neligidi nei egeesee takaso, “Haye, odo egee peegoo tamagalai, iba koo goomogo. Esino nayo Balabas ono peegoo ka

tamagee,” dee takaga meleeso. Esino Balabas hagos Loum odoo dia wiligi odoo tebisa mapoo ha temeleso.

## 19

<sup>1</sup> Osoloso Pailteeye o ha teli odoo mapoo takolone, Yesu toloso we tiso weeye, diso. <sup>2</sup> Esem diayo yo wooloso we ti sidoloso, o wiligi mapoo mediso, osoloso wiligi odoo tebisa oso kali dugo bige sage yimapoo kadiso. <sup>3</sup> Osoloso diayo yo manolone yimapoo takolone, “Yu odoo dia wiligi odoo taba, iyo nee hu dokodoo poudoso,” dolone o mudu mapoo kobugu demeleeso.

<sup>4</sup> Esem Pailteeye see o moso kuloduga peegoo gadilesu tobudulone odoo mooloogoodoo mapoo egeese takaso, “Niso be, ayo Yesu nimapoo ido sibileiso, ayo yimapoo goo hee egele poogoo goo nimapoo ee eligileiya,” dee takaso. <sup>5</sup> Yayo egeese takeme, Yesu we ti sidoo o wiligi mapoo mediloso dugo bige sage ka sabolo peegoo gasimiso. Esem Pailteeye dimapoo egeese takaso, “Niso ege, odoo hagos,” diso.

<sup>6</sup> Esem epedee omapoo tei moso wiligi odoo tebisa sabolo, osoloso tei moso gidebeli odoo oso yo ogoloso toso neligidi egeese takaso, “Yo homo bulubo magoo ma dokodoo yoguso enige. Yo homo bulubo magoo ma dokodoo yoguso enige,” dee takemeleso.

Esem Pailteeye dimapoo egeese takaso, “Niso yo homo bulubo magoo ma dokodoo yoguso enigilame ido di. Bei, ayo yimapoo goo hee koo ogo,” diso.

<sup>7</sup> Esemе Yu одоо dia wiligi одоо tebisa oso nei yimapoo egeesee takaso, “Ibada tei magoo oso egeesee takooso, yo talai tekepo. Bei, yayo takolone, yo Godeeyo Owolo, dee takeliso,” diso.

<sup>8-9</sup> Esino Paillet goo hagee duloso diya obulone, see moso kulodu gadilesa tobudulone, Yesu mapoo egeesee takaso, “No одоо ogu biayo?” dee takaso. Esemе Yesuye Pailleteeye taka to eyo su nei takele. <sup>10</sup> Esemе Pailleteeye yimapoo egeesee takaso, “Nayo amapoo to nei takele poogoosoba? Bei, no gooledeleyo, ayo no peegoo tamagee dee takalai, osoloso no homo bulubo magoo ma dokodoo yoguso enige dee takalai, amapoo kitulugu moloso?” dee takaso.

<sup>11</sup> Esemе Yesuye nei yimapoo egeesee takaso, “Kitulugu epedee namapoo egee molo ee no goolee tele. Esino kitulugu hagee Godeeye namapoo ka tenee. Esiga одоо a tolosa namapoo tenee eyo goo tokenee oso nee goo tokenee ee dagadilesa ka moloso,” diso.

<sup>12</sup> Pailleteeye to hagee duloso, Yesu peegoo tamagalai yo goomogaso. Esino Yu одоо dia wiligi одоо tebisa oso to neligidi egeesee takaso, “Одоо agayo eyo nediliyo takolone yo wiligi одоо, dee takomo siloga, yo Loum wiligi одоо Sisa mapoo ha toso. Osoloso nayo одоо hagee peegoo tamagoga, no Sisayo odoonee,” dee takaga meleeso.

<sup>13</sup> Pailleteeye to hagee duloso, Yesu peegoo ido sibilesa, yo goo midili одоо oso bili mapoo biaso. Bili mi egee takolone, yopoo mi, deliso. Osoloso

Hibulu toso takolone, Gabata, deliso. <sup>14</sup> Esiga goo hagee diayo Gababia wo nali sadee ee ma kulodu dia hasali biame ee mopoodoo dalai biame mapoo ka peledaba. Epedee omapoo osoko howo olo oo domo talai koola tabaso. Esemе Pailteeye Yu odoo mapoo egeesee takaso, “Niso ege. Nibada wiligi odoo hagosо,” dee takaso.

<sup>15</sup> Esemе diayo toso neligidi egeesee takaso, “Yo wooloome. Yo wooloome. Yo homo bulubo magoo ma dokodoo yoguso enige,” dee takemeleeso.

Esemе Pailteeye dimapoo egeesee takaso, “Niba goomogosomo, ayo nibada wiligi odoo ee homo bulubo magoo ma dokodoo yoguso enigilei?” dee takaso.

Esemе tei moso wiligi odoo tebisa oso nei yimapoo egeesee takaso, “Ibada wiligi odoo hedebe Sisaso, odoo hee me,” diso.

<sup>16</sup> Esemе Yesu homo bulubo magoo ma dokodoo yoguso enigilame, Pailteeye yo dimapoo teneeso. Esemе o ha teli odoo oso Yesu toloso ido diso.

*Yesu homo bulubo magoo ma dokodoo yoguso eniga*

*(Mat 27:32-44; Maka 15:21-32; Luka 23:26-43)*

<sup>17</sup> Ha teli odoo oso Yesu toloso ido dulone, o homo bulubo magoo ee eyo eimaloso mi hee eyo hu wiligi ki mi deli mapoo ido diso. Mi hagee Hibulu toso takolone Gologota deli. <sup>18</sup> Osoloso mi omapoo diayo Yesu homo bulubo magoo ma dokodoo yoguso enigaloso tuluguso. Osoloso odoo bakadio onosee homo bulubo magoo mapoo yoguso enigaloso, odoo hee Yesuwo

deedee dokolo tulugu, osoloso hee dobusu dokolo tulugu diso.

<sup>19</sup> Osoloso Pailteeye o odoo mapoo takolone, to hogugiye dee takeme, diayo to hageesee hoguguloso Yesuwo oo poogoo ma dokodooga kalamaso, “Yesu Nasalet odoo, Yu odoo dia wiligi odoo taba.”

<sup>20</sup> Esiga to hogugu hagee Yu odoo dia to sabolo, osoloso Loum odoo dia to sabolo, osoloso Guliki odoo dia to oso hogugu. Esiga odoo susuga to hogugu egee ogoloso hesigaso. Bei, Yesu homo bulubo magoo ma dokodoo yoguso eniga mi ee Yelusalem maga haga hoogoonee. <sup>21</sup> Egeesi ma kulodu tei moso wiligi odoo tebisa oso sibilesos Paillet mapoo egeesee takaso, “Nayo to hogugulone, yo Yu odoo dia wiligi odoo taba doloso na hogugi. Esino hageesee hogugi, ‘Odoos hagoso takolone, yo Yu odoo dia wiligi odoo taba, dee takomo siliso,’ dee,” dee takaso.

<sup>22</sup> Esemee Pailteeye nei dimapoo egeesee takaso, “To ayo hogugu hagee osee hogugu malaiso,” dee takaso.

<sup>23</sup> Ha teli odoo bakadio bakadio di oso Yesu homo bulubo magoo ma dokodoo yoguso enigaloso, o dugo diesono domo puloso tooso. Osoloso o sedi sage edebeeyo dusele poogoo sabolo diayo tooso. <sup>24</sup> Osoloso ha teli odoo dieso nei takoo nei takoo dolone egeesee takaso, “Iba dugo hagee wulo domo na didamo. Esino dugo hagee odoo agayo toowa beleso yoso dasigeli hee dasigaloo gomo,” diso. Osoloso goo hagoso olo peledabaso,

Godeeyo to booka mapoo hogugu sabolo tebilame. Bei, Godeeyo to oso egeesee takoso, “Diayo mo dugo diesono puloso tooso.

Osoloso mo dugo sage ee talame yoso dasigeli hee dasigaso,” diso.

Esiga ha teli odoosoo oso egee moodooso.

<sup>25</sup> Egeesee somolome, Yesuwo owee sabolo, osoloso oweeyo omolo sabolo, osoloso Kolopaseeyo osobo Meli sabolo, osoloso Meli-Magadalin oso Yesu homo bulubo magoo ma dokodoo molome, koola omaga tebisamolone balaga meleeso. <sup>26</sup> Esemee Yesuye owee sabolo osoloso o hamamee dili odoosoo yayo diya gweli diba koola mapoo tebisamolome ogoloso owee mapoo egeesee takaso, “Mo wee, odoosoo hagee nowoloso,” dee takaso. <sup>27</sup> Osoloso see o hamamee dili odoosoo hedebe omapoo egeesee takaso, “No ege, noowee hagoso,” diso. Biame domo omaga Yesuwo hamamee dili odoosoo hagoso o moso mapoo Meli ido dileso medee bameleeso.

### *Yesuye ta*

*(Mat 27:45-56; Maka 15:33-41; Luka 23:44-49)*

<sup>28</sup> Esiga goosoo hagoso dileso koodobume, tou susuga Godeeye Yesu mapoo tenee ee yayo olo hosudoosoo doloso gooleedoosoo. Egeeseelone Godeeyo to booka mapoo hogugu sabolo tebilame egeesee takaso, “A howo na poogoo,” diso. <sup>29</sup> Mi omapoo wain i koo hadali\* katolo mapoo keesoo

---

**19:25:** Mat 27:55-56      **19:26:** Yon 13:23      **19:28:** Psa 22:15

**19:29:** Psa 69:21      \* **19:29:** wain i koo hadali - bi mauwe odoosoo sabolo osoloso ha teli odoosoo wain i koo hadali naliso, howo nala pegelega pagalame.

ee magoo meleeso. Esemе odoо heeso homo sage toloso su mapoo dugo tialogoloso, wain i omapoo olugu doloso yayo nalame, Yesuwo maga mapoo heligiso. <sup>30</sup> Esemе Yesuye wain i egee olo naloso egeesee takaso, “Goo susuga olo hosudooso,” dee takaso. Osoloso oo goobodo buloso taso.

<sup>31</sup> Esiga biame egee Yu odooso hasali biame ee mopoodoo deli biame oso. Esino dia hasali biame egee goo diya toowa. Bei, Godeeye Gababia goo ee Yu odooso gooleebigili sadee ee ma kulodu hasali biame egee meleeso.\* Goo egeesi maga Yu odoо dia wiligi odoо tebisa oso dia hasali biame mapoo odoо ta eyo kou ee homo bulubo magoo ma dokodoo osee malai, diba goomegele. Esiga diayo Paillet mapoo egeesee takaso, “Odoо homo bulubo magoo ma dokodoo egee molo saga wedilame, dibada homo gebisa poogoloso, dia kou miyomoo tomeilesa peegoo todi,” dee takaso. <sup>32</sup> Esemе ha teli odoо oso dileso odoо hee Yesuwo dee deedee dokolo eniga eyo homo gebisa poogooso. Osoloso see odoо hee Yesuwo dee dobusu dokolo eniga eyo homo onosee gebisa poogooso. <sup>33</sup> Esino diayo sibilesa egeino, Yesu olo taneme, o homo gebisa pegele. <sup>34</sup> Esino ha teli odoо heeso o molo toloso Yesuwo ho hodio mapoo guso. Esemе haga booloogelega, sawo sabolo osoloso howo sabolo moloso gu omaga sooso.

<sup>35</sup> Esiga goo hagoso peledaba egei odoо\* oso goo hamaga tei goo takaso. Osoloso yo gooleedoo, yo

---

**19:31:** Deut 21:22-23 \* **19:31:** Godeeye Gababia goo ee Yu odooso gooleebigili sadee ee ma kulodu, diayo Tasdee biame gesi mapoo Gababia wo naliso. **19:35:** Yon 21:24 \* **19:35:** Odoо hagee Yonee

tei goo takeli. Egeesi ma kulodu goo yayo taka hamapoo niyo tei talame ka taka.

<sup>36</sup> Esiga goo hagoso tei peledabaso, Godeeyo to booka mapoo hogugu oso taka sabolo tebilame. Bei, Godeeyo to oso egeesee takooso, “O ki hee gebisa pagalaima,” dee takooso.

<sup>37</sup> Osoloso Godeeyo to hogugu heeso see egeesee takooso, “Edebeeyo odoo dieso moloso gu mapoo balaga malaiso,” dee takooso.

*Yesu mi doosoo*

*(Mat 27:57-61; Maka 15:42-47; Luka 23:50-56)*

<sup>38</sup> Osoloso hamamee, odoo hee Alimatiya mi mapoo badeli, o hu Yosep, yayo Yesuwo kou talame Paillet mapoo dilesa woosaso. Yosep hagee Yesu o hamamee dili odoo hee yoso. Esino yo Yu odoo dia wiligi odoo tebisa ee bolo obulone, mada Yesuye di hamamee diliso. Esem Paillete-eye yimapoo kitulugu teneeso, yayo Yesuwo kou talame. Esem Yosepeeye dilesa Yesuwo kou ee homo bulubo magoo ma dokodooga miyomoo tomeilesa peegoo todiso. <sup>39</sup> Esem Nikodimase-eye yo pidimo diso. Nikodimas hagee daga gesi Yesu agalame di odoo oso. Yayo sisigageli bi medee tekepo Yesuwo kou mapoo hedilame todiso. Sisigageli bi medee tekepo hagoso hegi ee 30 kilo egeesi masi. <sup>40</sup> Osoloso odoo bakadio oso Yesuwo kou toloso, Yu odooso odoo toga mi dooseli goo ee dodolone, sisigageli bi medee tekepo oso Yesuwo kou mapoo hediloso dugo

---

**19:36:** Psa 34:20; Exo 12:46; Num 9:12      **19:37:** Zec 12:10; Yili 1:7      **19:39:** Yon 3:1-2



semeso tiegisaso. <sup>41</sup> Egeesi ma kulodu Yesu homo bulubo magoo ma dokodoo eniga mi eyo koola omapoo homolee meleeso. Homolee ee ma kulodu bi dia yo ou poogoo mapoo daga odoo tayo kou magele poogoo meleeso. <sup>42</sup> Esiga dia hasali biame bei mooloogalai koola tooboome, diayo Yesuwo kou toloso saga yo ou poogoo ee ma kulodu magooso. Bei, yo ou poogoo egee haga hoogooneega.

## 20

### *Bi mosoowe molo egei*

*(Mat 28:1-8; Maka 16:1-8; Luka 24:1-12)*

<sup>1</sup> Sadee toowa gesikolo mi hadobilega molome, Meli-Magadalineeye Yesuwo bi agalame diso. Yayo sibilesa egeino, yo toowaso wulu ou kisi ee peegoo bidigamo dilesa molome egeiso. <sup>2</sup> Esemeliye see hoguo dilesa Saimon-Pita dio osoloso Yesuwo hamamee dili odoo yayo diya gweli mapoo egeese takaso, “Lodeeyo kou peegoo todina. Osoloso diayo o kou todilesa magoo mi ee, iba gooleedele,” dee takaso.

<sup>3</sup> Esemeliye Pita dio osoloso o hamamee dili odoo hee egee dio bi mapoo agalame diso. <sup>4</sup> Diba hoguo diyadaga molome, o hamamee dili odoo heeso Pita dagadilesa bi mapoo peledabaso. <sup>5</sup> Osoloso yo gauwuloso yo ou poogoo ma kulodu keese egeino, hedebe dugo seme Yesuwo kou tiegisa ono molome egeiso. Esino yo yo ou poogoo ma kulodu gadile. <sup>6</sup> Esemeliye Saimon-Pitaye hamamee sibilesa peledoboloso, yo ou poogoo ma kulodu gadilesa egeino, dugo Yesuwo kou tiadoo hedebe

ono omapoo molome egeiso. <sup>7</sup> Osoloso dugo Yesuwo wiligi tiadoo ee medee tiadoloso obusomo peegoo magoo molome egeiso. <sup>8</sup> Esemee dili odoo hee bi mapoo daga malalo peledaba oso yo ou poogoo ma kulodu gadiso. Yo gadilesi goo hagee ogoloso tei tooso. <sup>9</sup> Egeesi ma kulodu Godeeyo to booka mapoo hogugu oso takolone, yo ta maga hogaduloso gie badalaiso, dee taka goo eyo bei ee, diba medee kibiya gooleedelega osee debeiso. <sup>10</sup> Osoloso o bakadio see mosopoo wedi diso.

*Yesuye Meli-Magadalin  
mapoo peledaba  
(Mat 28:9-10; Maka 16:9-11)*

<sup>11-12</sup> Esino Meli-Magadalin bi ma peegoo to-budulone pusumeleeso. Yo omapoo pusulone gauwuloso, yo ou poogoo ma kulodu keesee egeino, Godeeyo momaiye bakadio dugo heliye kalagaloso doboome egeiso. Momaiye heeso Yesuwo wiligi poogoo dokolo buo, osoloso heeso kai poogoo dokolo buo doloso doboome egeiso.

<sup>13</sup> Esemee momaiye bakadio oso yimapoo egeesee takaso, “Sobo no, bei kaseega ka pusumalala?” dee takaso.

Esemee Meliye dimapoo egeesee takaso, “Diayo mo Lodeeyo kou ee peegoo todina. Esino diayo o kou magoo ee a gooleedele,” diso. <sup>14</sup> Meliye to egeesee takoloso bidi toboloso keesee egeino, Yesu tobudo egeiso. Esino yayo goolee, Yesu odoo hee gooleeso.

15 Esemе Yesuye yimapoo egeesee takaso, “Sobo no, bei kaseega ka pusumalala? Osoloso no odoo ugu esiamo silala?” dee takaso.

Esemе Meliye goolee yo homolee mapoo tou teli odoo oso bele dolone yimapoo egeesee takaso, “Emegei, nayo Yesuwo kou peegoo todilesa ka magoo daga, mi egee amapoo takee. Eseega ayo dilesa o kou egee ka talaiya,” dee takaso.

16 Esemе Yesuye yimapoo egeesee takaso, “Meli,” diso.

Esemе Meliye bidi toboloso yimapoo Hibulu toso egeesee takaso, “Laboni.” To hageeyo bei ee eligili odoo dolone ka takooso.

17 Esemе Yesuye yimapoo egeesee takaso, “A nayo na gide. Bei, a mo Ma mapoo wedi pele. Esino nayo dilesa mo hamamee dili odoo mapoo takee, ‘A mo Ma Godee mapoo palame ka seeso. Ma Godee hedebe onosee dibada Godee osoloso nibada Godee,’ dee takee,” diso.

18 Esemе Meli-Magadaliineeye see wedi sibilesa Yesu o hamamee dili odoo mapoo egeesee takaso, “Ayo Yesu olo egeiso,” diso. Osoloso goo susuga Yesuye yimapoo taka ee see yayo dimapoo takaso.

*Yesuye o hamamee dili odoo mapoo peledaba*

*(Mat 28:16-20; Maka 16:14-18; Luka 24:36-49)*

19 Sadee toowa habe omapoo Yesu o hamamee dili odoo oso Yu odoo dia wiligi odoo tebisa ee bolo obulone, hodobo mooloogoo doloso moso osulu medee kisigaloso debeiso. Esemе omapoo Yesuye sibilesa peledoboloso tobudulone

dimapoo egeesee takaso, “Mesie goo oso nibolo osee mele dee,” dee takaso. <sup>20</sup> Yayo to egeesee takoloso tobudulone, o dee boowo sabolo, osoloso o ho hodio mapoo moloso gu eyo boowo ee dimapoo eligiso. Esemé Yesu o hamamee dili odooso yo ogoloso diya goomogaso.

<sup>21</sup> Osoloso Yesuye see tobu dimapoo egeesee takaso, “Mesie goo oso nibolo osee mele dee. Esiga Maye a diye diga, ayo niba noseé diye deeso,” dee takaso. <sup>22</sup> Yesuye goo hagee takoloso see dimapoo magaso hologoo nilone egeesee takaso, “Niba Dio Tei te,” diso. <sup>23</sup> Osoloso see dimapoo egeesee takaso, “Niyo odoó heeyo goo tokenee boobado buguga, odoó egee bia dia goo tokenee ee hapoloso boobado bigileiso. Esino niyo odoó heeyo goo tokenee boobado bigilega poo-goga, odoó egee bia dia goo tokenee ee hapoloso boobado bigileime,” dee takaso.

*Tomaseeye Yesu ogoloso tei too*

<sup>24</sup> Esino Yesu o hamamee dili odoó hee Tomas, o hu hee Didimas\* deli, yo Yesuye o hamamee dili odoó mapoo dileso peledaba biame mapoo yo omapoo badele. <sup>25</sup> Esemé Yesu o hamamee dili odoó oso yimapoo egeesee takaso, “Iba Lodee olo egeiso,” dee takaga meleeso. Esino Tomaseeye dimapoo egeesee takaso, “A niyo egee takoo duloso epedee tei talaimé. Esino a mawo o dee boowo ogoloso mo dee woluguso omapoo sigo, osoloso o ho hodio mapoo moloso gu eyo boowo

---

**20:20:** Yon 16:22; 1Yon 1:1    **20:23:** Mat 16:19    \* **20:24:** Didimas hu eyo bei ee biame hedebe mapoo bakadio soomagoo dolone ka takooso.

ee ogo doloso mo deeso omapoo sigoga, a tei ka talai,” dee takaso.

<sup>26</sup> Osoloso sadee hedebe poogoloso hamamee, Yesu o hamamee dili odoososo hedebe mapoo mooloogoo doloso debeiso. Biame omapoo Tomas yinosee dibolo hodobo omapoo badebeiso. Esino diba osulu susuga kisigaloso doboome, Yesuye diayo debei domo mapoo peledoboloso tobudulone egeese takaso, “Mesie goo oso nibolo osee mele dee,” diso. <sup>27</sup> Osoloso tobudulone Tomas mapoo egeese takaso, “Nee dee wolugu oso mo dee boowo hamapoo sigolo ege. Osoloso mo ho hodio mapoo moloso gu eyo boowo mapoo nee deeso sige. No goo haga na egege, esino amapoo tei te,” dee takaso.

<sup>28</sup> Esem Tomaseeye nei yimapoo egeese takaso, “Mo Lodee osoloso mo Godee,” diso.

<sup>29</sup> Esem Yesuye yimapoo egeese takaso, “Nayo a egeiga, amapoo tei ka toso. Esino ede-beeyo a egelega poogoloso wulo amapoo tei toga, Godeeye nei dimapoo diya goomogalaiso,” dee takaso.

*Yoneeye to booka hamapoo  
hogugu goo eyo bei*

<sup>30</sup> Esiga Yesuye o hamamee dili odoososo dia howo woola goo toowa opusomo di abo hee moodoog-amo siliso. Esino goo egee booka hagee ma kulodu hogugule. <sup>31</sup> Esino to hagee hoguguso, niyo Yesu yo tei Kelisodoo doloso goo omapoo tei talame. Osoloso niyo yo tei Godeeyo Owolodoo

doloso goo omapoo tei talame. Osoloso yimapoo tei too goo maga gie badeli ka talame.

## 21

*Yesuye Gelili abei mapoo o hamamee dili odoo mapoo peledaba*

<sup>1</sup> Osoloso see hamamee Yesu o hamamee dili odoo oso Gelili abei\* palaga mapoo doboome, yayo omapoo peledabaso. Goo hagoso egeesee peledabaso.

<sup>2</sup> Biame omapoo Yesu o hamamee dili odoo hagee biaso hodobo debeiso. Saimon-Pita, osoloso Tomas (o hu hee Didimas), osoloso Gelili mi toowa ee ma kulodu mi pepooko Kana mapoo badeli odoo hee Nataniyol, osoloso Sebediyo owolo bakadio, osoloso Yesu o hamamee dili odoo bakadio omapoo debeiso. <sup>3</sup> Esemе Saimon-Pitaye o odoo mapoo egeesee takaso, “A pei olugulei dia,” diso. Esemе odoo aboso egeesee takaso, “Iba nobolo hodobo siba,” dee takaso. Esemе diba du mapoo hodobo tebisaso. Esino diba gesi di kobumo sileeno, di hedebe gile.

<sup>4</sup> Egeeseelone gesikolodee Yesuye abei palaga mapoo tobudume egeiso. Esino Yesu o hamamee dili odoo du ma kulodu tebisamolone Yesu ogoloso, diayo goolee yo odoo hee gooleeso. <sup>5</sup> Esemе Yesuye abei palaga maga tobudulone dimapoo egeesee idagaso, “Emegei, niba di gili-gasomo?” diso. Esemе diayo nei egeesee takaso, “Haye, iba di hedebe gile,” dee takaso.

---

\* **21:1:** Gelili abei eyo hu hee ee Taibiliyes.    **21:3:** Luka 5:4-7

<sup>6</sup> Esemé Yesuye dimapoo egeesee takaso, “Nibada pei toloso see deedee dokolo mapoo olugi, egeeseega niba di giligileiso,” diso. Esemé diba Yesuwo to duloso goo egeesi moodooso. Esemé di bei dia pei ma kulodu galagadiso. Esemé diayo dia pei pouduloso du ma kulodu magalai tebile poogooso.

<sup>7</sup> Esemé Yesu o hamamee dili odoó hee yayo diya gweli oso Pita mapoo egeesee takaso, “Egee yo Lodeedoo,” diso. Pitaye to egeesee taka duloso o dugo tigamagoo see kaloso Yesu mapoo tabuo dilame howomoo bologobuguso. <sup>8</sup> Esino Yesu o hamamee dili odoó aboso du sumo dulone, dia pei ee di sabolo howo kulomooga abei pee mapoo gisibamo diso. Bei, diayo pei olugu omaga widi pee ee haga hoogoonee, wulo 100 mita egeesi. <sup>9</sup> Osoloso diba sibilesó dia du gimagoloso mubi mapoo daboogoloso egeino, dou hoo mapoo di sabolo wo sabolo si molome egeiso.

<sup>10</sup> Esemé Yesuye dimapoo egeesee takaso, “Di niyo epedee giliga egee abo hamapoo tosibe,” dee takaso.

<sup>11</sup> Esemé Saimon-Pitaye du ma kulodu daboogoloso pei di sabolo widi pee mapoo gisibamo dileso booboosée mapoo gisibu magooso. Pei ee ma kulodu di toowa bei, 153 egeesi molome egeiso. Esino pei ma kulodu di bei galaga dino dia pei tologo bigile. <sup>12</sup> Esemé Yesuye dimapoo egeesee takaso, “Niba nei nalame sibadee,” diso. Esino Yesu o hamamee dili odoó dima kulodu odoó heeso Yesu mapoo takolone, “no odoó ogumo?” dee takele. Bei, diba

olo gooleedoo, yo tei Lodee. <sup>13</sup> Esemé Yesuye di sabolo wo sabolo toloso dimapoo teneeso.

<sup>14</sup> Esiga Yesu ta maga hogaduloso hamamee, o hamamee dili odoo mapoo peledaba hagoso bakadio hedebe diso.

*Yesu dio Pita dio*

<sup>15</sup> Osoloso diba nei naloso koodobuloso, Yesuye Saimon-Pita mapoo egeesee takaso, “Saimon, Yoneeyo owolo, nayo a gweli oso odoo hagee biaso a gweli ee dagadusomo?” dee takaso.

Esemé Pitaye nei egeesee takaso, “O, Lodee. Ayo no diya goolee sabolo hagee bado goo ee, no gooleedoo,” diso.

Esemé Yesuye nei yimapoo egeesee takaso, “Mo sipi be ee nayo medee poopomelee,” dee takaso.

<sup>16</sup> Osoloso Yesuye see tobu egeesee takaso, “Saimon, Yoneeyo owolo, nayo a diya goolee sabolo badosomo?” diso.

Esemé yayo nei Yesu mapoo egeesee takaso, “O, Lodee. Ayo no diya goolee sabolo hagee bado goo ee, no olo gooleedoo,” dee takaso.

Esemé Yesuye yimapoo egeesee takaso, “Mo sipi be nayo medee bamelee,” diso.

<sup>17</sup> Osoloso see bakadio hedebe di mapoo Saimon-Pita mapoo egeesee takaso, “Saimon, Yoneeyo owolo, nayo a diya goolee sabolo badosomo?” dee takaso.

Esemé Pita to hedebe hagonosee Yesuye bakadio hedebe di taka ee dulooso diya gooheso. Esiga yayo nei egeesee takaso, “Lodee, goo susuga no gooleedooso. Osoloso ayo no diya goolee



sabolo hagee bado goo ee, no olo gooleedooso,” diso.

Eseme Yesuye yimapoo egeesee takaso, “Mo sipi be nayo medee poopomelee. <sup>18</sup> Esiga ayo namapoo tei taka. No gie kauwa mapoo bi medee mopoodoo doloso no goomoga mi mapoo diliso. Esino no adaga poloso badoga, odo heeso nee dee mapoo tiso bagagoloso, no mi nayo goweli mapoo gisibado dileiso.” <sup>19</sup> Yesuye Pita mapoo taka hagee, Pitaye dooboo kasee talai goo ee taka. Esiga Pitaye ta maga Godeeyo hu dokodoo poudileiso. Osoloso Yesuye yimapoo mapoo egeesee takaso, “No a deedee,” diso.

<sup>20</sup> Eseme Pitaye bidi toboloso egeino, o hamamee dili odo Yesuye diya gweli oso dima miligiyopooga sibume egeiso. Yesuwo hamamee dili odo hagee biaso daga o hamamee dili odo sabolo nei nolone dobolone, Yesu mapoo bouwa melee oso, yimapoo egeesee ka woosa, “Lodee, odo agayo no ha teli odo mapoo ka tiasalaiyo?” dee taka odo ee hagoso. <sup>21</sup> Eseme odo ogoso dima hamamee simi ee ogoloso, Pitaye Yesu mapoo egeesee takaso, “Lodee, odo hamapoo kasee moodoolaisomo?” dee takaso.

<sup>22</sup> Eseme Yesuye yimapoo egeesee takaso, “Yo osee badoga, ayo see wedi sibilesos yo agalai, a goomogoga, egeesee selaiso. Esino egee nee goonee. No wulo a deedee,” dee takaso. <sup>23</sup> Eseme Yesu o hamamee dili odo egee talaime, dee taka goo ee tei telaga odo abo mapoo dudobuguso. Esino Yesuye takolone odo egee talaime, dee

takele. Yo wulo egeesee taka, “Yo osee badoga, ayo see wedi sibilesa yo agalai, a goomogoga, egeesee selaiso. Esino egee nee goonee,” dee ka taka.

<sup>24</sup> Esiga Yesu o hamamee dili odoo hagoso goo susuga yayo egei ee booka hamapoo hoguguso. Iba gooleedooso, goo susuga yayo hogugu ee tei goo.

<sup>25</sup> Esiga Yesuye goo hagee sabolo osoloso goo abo sabolo olo moodooso. Esino goo susuga egee booka hamapoo hogugule. Esino goo susuga egee booka abo mapoo hogugu diepi, mipoo hamapoo booka bei meliyo. Egeeseelone booka magalai debi me meliyo.

**Godeeyo To Tekepo**  
**Portions of the New Testament in the Odoodee**  
**language of Papua New Guinea**  
**Sampela hap Nupela Testamen long tokples Odoodee**  
copyright © 2006, 2015, 2017 Wycliffe Bible Translators, Inc.

Language: Odoodee

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-30

---

PDF generated using Haiola and XeLaTeX on 21 Feb 2024 from source files dated 31 Aug 2023  
ffb0eddd-0f6e-5201-89ab-6fcbfcaebeba